

Älönžil n-Ÿisa Älmasex wa iktäb Exya

Äšqjəš

¹ S-tizarät, a-s wär t-illa a dd-ixlakän, wär t-illa a t-illän a säl Wa s-itawänna Mäjräd, Mäjräd ill'e ħur-Mässinäħ, Mäjräd ənta a-s Mässinäħ.

² Ill'e s-tizarät ħur-Mässinäħ,

³ ənta a-s dd-ixlāk Mässinäħ häřät iket-net, wär t-illa a dd-ixlakän ar s-ənta,

⁴ ənta a ässodärän häřät iket-net, tämudreten-däħ ihakk a-s ännur i-dägg-adəm;

⁵ ännur, ämiläwlaw däħ-tihay mäšan, unjäynät sär-s.

⁶ Osä-dd ähaləs dd-äsimašäl Mässinäħ s-isəmet Exya,

⁷ i-ad-umas tajuhe, amənän dägg-adəm s-ännur wa fäll-hasän-itajäyha.

⁸ Wär-ämoos ənta iman-net ännur, tajuhe-net a ämoos.

⁹ Ännur-i-hi, ənta a-s wa n-tidət dd-osän äddunya i-ad-impləwlaw fäll-dägg-adəm, arr tiṭṭawen-näsän.

¹⁰ Wa s-itawänna Mäjräd, ijjäš-dd äddunya, təbnä-dd sär-s mäšan, tunjäy s-ad-t-təzzəy,

¹¹ osä-dd ännur äkall-net mäšan, wär t-äqbelän imälan-net,

¹² hagd a-wen-däħ däħ, wi t-äqbälnen, omänän sär-s, äsdabät-tän ad-umasän aratan n-Mässinäħ.

13 Aratän-en, tiwit-näsän, wär tämoos ta n-täsa wäla ta n-erhet n-taḡessa wäla erhet n-ägg-adəm, ti n-Mässinäḡ.

Mäjräd, iqqäl-dd ägg-adəm

14 Mäjräd, ämoos-dd ägg-adəm, izzäḡ-dd jere-näḡ ännufläy däḡ-ännuḡmät d-tidət, näjjunfä däḡ-älxurmät-net, älxurmät daḡ wa ikarräš Alyaḡ s-wär-il' Abba i säl ənta.

15 Ənta-en-däḡ a fäll-äjjəyha ännäbi Exya a-s innä s-afälla: «Ad-hi-dd-išrəy ere hi-ojārən fäl-a-s ill'-e härwa wär dd-äxlekäḡ.»

16 Nəjräw iket däḡ-nänäḡ ejädär-nänäḡ däḡ-älxurmät n-ännuḡmät-net, ajäraw nəja-däḡ, ilkam-as iyyän

17 fäl-a-s, əmmək wa s-ija Mässinäḡ Ättäwrät däḡ-äfuss n-ännäbi Mosa, ənta daḡ a-s ija ännuḡmät-net d-tidət-net däḡ-äfuss n-ḲisaÄlmasex.

18 Mässinäḡ, wär tilla ere s-käla t-inhäy mäšan, Rure-s wa n-iyyan ḡur-s izzäḡän, äsbayän-anäḡ-t-dd.

Tajuhe ta ij' Exya fäll-Ḳisa

(Mätti 3:11-12; Marḡəs 1:7-8; Luḡa 3:15-17)

19 Ənta da tajuhe ta ij' Exya a-s sār-s dd-äšmäšälän imänokalän n-käl-Älyähud wi hänen Yärussalam, käl-tikutawen d-dägg-Lewi i-ad-t-səstənän d-a-wa ämoos.

20 Wär hasän-iffer iman-net, inn'-asän: «Wädden näkk a-s Älmasex.»

21 Oläsän-t asəstan: «Adiš mi tämoosäd? Ämmuukkän käyy a-s ännäbi Ḳəli?» Inn'-asän: «Wär t-ämoosäḡ.» Ənnän-as: «Adiš käyy a-s

ännäbi wa s-ənnän ännäbitän ilkam a dd-ass?»
Inn'-asän: «Äbo!»

²² Oläsän-as tənna: «Adiš, mi tämoosäd?
Nārha älwižab nāwwāy i-äddinät wi hanāḡ-dd-
äšmašälnen, ma tənned, mi tämoosäd?»

²³ Inn'-asän:
«Näkk a-s wa äseyären dāḡ-tenere, janney:
<šəssiḡədät tabarät dat-Emäli>,
s-əmmək wa s-tän-innä ännäbi Saya.†»

²⁴ Äddinät-win-dāḡ sār-s dd-ämešälnen, i n-
taggayt ta n-käl-faris.

²⁵ Oläsän-t asəstan daḡ, ənnän-as: «Adiš mafäl
salmaḡäd äddinät dāḡ-aman a-s wädden kāyy
a-s Älmasex wäla, Ḣəli wäla ännäbi wa s-
ätwänna?»

²⁶ Äwwežäb-asän, inn'-asän: «Näkk, aman a
dāḡ-salmaḡāḡ äddinät mäšan, ill'-e jere-wän ere
wār təzzeyäm,

²⁷ ad-hi-dd-išrəy, wār-änhäjjāḡ wäla-dāḡ d-ad-
ädəsāḡ issal n-tifädelen-net fäl mijraw-i-dāḡ hi-
ija.»

²⁸ Tadäbayt ta n-Bitanya təwärat asälim n-
Ḣurdəni wa n-atāram a dāḡ-itajj a-wa-dāḡ,
dihən-dāḡ ad-isalmaḡ Exya äddinät dāḡ-aman.

Ḣisa, Ašāḡol n-Mässināḡ

²⁹ Ašäl wa n-ḡarät-wen, inhāy Exya Ḣisa ikk'-
e-hi-dd, innä i-tamətte: «Ənhəywät-ak Ašāḡol n-
Mässināḡ wa itakkäsän ibäkkäḡän n-äddunya!

³⁰ Ənta-i-dāḡ a fäll-hawän-ənney: ad-hi-dd-
išrəy ere hi-ojārän fäl-a-s ill'-e härwa wār dd-
äxlekāḡ;

† **1:23 1:23** A-wa ännäbi dd-äzzarän i-Ḣisa, älolāy dāḡ-isälan-net
əssayät timaḡ n-awätay dat-tiwit-net.

³¹ năkk iman-in, ibda wăr t-əzzeyăx măšan, i-ad-dd-ibbuyən i-kăl-Işrayil, oseḡ-dd i-ad-salmaḡăx dăḡ-aman.»

³² Olăs daḡ Exya ajøyh, inna: «Hannăyăx Unfas Šăddijăn, ifal-dd išənnawăn dăḡ-ännuḡ n-tedăbert mällät har fälla-s äsjăn, izzăḡ fälla-s.

³³ Kăla t-əlleḡ wăr t-əzzexăḡ măšan, wa hi-dd-ăşmaşălän i-ad-salmaḡăx dăḡ-aman, inn'-ahi: <Ere wa s-tənhăyăd Unfas har fälla-s äsjăn, izzăḡ fälla-s, ənta a ihakkăn Unfas Šăddijăn.>

³⁴ Năkk daḡ, ənhăyăḡ-t, äjjøyhăḡ a-s ənta a-s Rure-s n-Măssinăḡ.»

Inəṭṭulab n-Ŷisa wi äzzarnen

³⁵ Aşăl wa n-ḡarăt-wen, ibdad Exya d-inəṭṭulab-net əssin dăḡ-edăgg-wənnin-dăḡ a-s iswăd,

³⁶ inhăy Ŷisa okay ḡas, innă: «Ənhəywăt-ak Aşăḡol n-Măssinăḡ!»

³⁷ Əslän inəṭṭulab-net wi n-əssin i-măjrăd-wen-dăḡ ij' Exya ḡas, əlkămăn i-Ŷisa.

³⁸ Ăşnăşlăm Ŷisa ḡara-s, inhăy a-s əlkămăn-as ḡas, inn'-asăn: «Ma tărham?» Ənnăn-as: «Răbbi, a-wen əlmăḡna-net: Ălḡalim! Ənde d-təzzaḡăd?»

³⁹ Inn'-asăn: «Əyyăwăt, ad-t-tənhəyăm.» Əḡlän, ənhăyăn dihad izzăḡ, əzzăḡăn ḡur-s aşăl-en-dăḡ. Itajj a-wen s-takkăşt.

⁴⁰ Inəṭṭulab wi n-əssin əslänen i-măjrăd wa ij' Exya fáll-Ŷisa ḡas əlkămăn-as, iyyăn dăḡ-săn Idris wa n-əŋḡa-s n-Simyön Bəṭrus;

⁴¹ Idris-en-däx a osän äŋŋa-s Simyon, inn'-as: «Ëyyäw, nəjräw Älmasex». Älmasex, älmäxna-net: Wa innəfränän.

⁴² Ilwäy Idris Simyon s-ÿisa. Ikna ÿisa akäyad däx-Simyon, inn'-as: «Wädden isəm-näk: Simyon ägg Yunəs? Ad-käy-iwär isəm Sefas». Sefas, älmäxna-net: Tähunt.†

Ilkäm Fəlibb d-Natanähil i-ÿisa

⁴³ Ašäl wa n-ɖarät-wen, ikka ÿisa teje ta n-Galila a-s ämmoqqäs d-Fəlibb, inn'-as: «Fəlibb, əlkəm-ahi.»

⁴⁴ Fəlibb hagd Idris d-Bəṭrus, iket-näsän, i n-tayrəmt ta n-Bäṭsayda.

⁴⁵ Iglä Fəlibb ənta-däx har osa Natanähil, inn'-as: «Ašäl-i, nəjräw ere wa s-ij' ännäbi Mosa isälan-net däx-Äṭṭäwrät, əlläyen daɣ ännäbitän s-ass-net: a t-ämoosän ÿisa wa n-ägg Yusəf n-tayrəmt ta n-Näširät.»

⁴⁶ Inn'-as Natanähil: «Ajän Näširät, a tət-dd-ifəl a olayän?» Inn'-as Fəlibb: «Ëyyäw, ənhəyt.»

⁴⁷ Inhäy ÿisa Natanähil ikk'-e-hi-dd ɣas, innä: «Ašäl-i-š, hannäyäɣ U-Bänu-Işrayil n-ägg-aläšäl wär ha täkkärzäzzäl.»

⁴⁸ Inn'-as Natanähil: «Ënde hi-təzzäyäd?» Inn'-as ÿisa: «Hannäyäɣ-käy härwa wär käy-dd-iɣra Fəlibb, a-s ija a-wen, telled-t daw-tele n-ašar.»

⁴⁹ Iɖkäl Natanähil eməsli-net, innä: «Älɣalim, käyy a-s Rure-s n-Mässinäɣ, käyy a-s ämänokal n-Işrayil!»

† 1:42 1:42 Sefas däx-Tälyunanit a has-itawännen: Bəṭrus.

⁵⁰ Inn'-as Ȳisa: «Ȳas a-wa-däx fäl hak-ønney hannäyăx-kăy härwa telled-t daw-tele n-ašar a fäl tomănad? Elməd a-s ilkam dăx-k ad-tenhöyäd härătän ojärnen a-wen-dăx temyäre.

⁵¹ Alleyex-awăn s-tidət tădduuttet† a-s ad-tenhöyäm išennawăn ämerăn, tenhöyäm day änjălosăn n-Măssinăx tiwənən tizəbbun-dd fäll-Ägg-ägg-adəm.»

2

Iji n-Măssinăx wa äzzarăn ija Ȳisa

¹ Kărađ išilan đarăt-a-wen, ij' azli dăx-hintătiwăxra ma-s n-Ȳisa dăx-taxrəmt n-Kăna ta n-Galila;

² ätwăxr'-in day Ȳisa s-azli-en-dăx ənta d-inəttulab-net.

³ Ęmdăn aman n-lăxnăb wi äxxiimmărnen tamăswanen dăx-azli Ȳas, tənn'-as ma-s: «Äddinăt ya, äbas lan aman n-lăxnăb wi äxxiimmărnen əswăn.»

⁴ Inn'-as Ȳisa: «Anna, tazidert, ässağăt-in, wăr dd-iwweđ härwa.»

⁵ Tənnă ma-s i-inaxdimăn: «A hawăn-innă-dăx, təjəm-t.»

⁶ Ęllan-t dihen săđis ixsas măqqornen əknanen dăx-tăhunt s-təggatän kăl-Ălyăhud älwălla s-aman-wi tăn-hănen; hak iyyăn dăx-ixsas-en-dăx, itiwəy temede n-lităr.

⁷ Innă Ȳisa i-inaxdimăn: «Ęđkărăt-dd ixsas-i-hi aman»; əđkărăn-tăn har imawăn-năsăn.

† **1:51 1:51** Dăx-Tălyunanit: Amin, amin (S-tidət, tidət).

8 Inn'-asän day: «Elkewät ämära, tawøyem i-ere-wa ännihädän däx-imənsiwän»; jän a-wa hasän-inna.

9 Äkräbbät emännähäd n-imənsiwän aman n-läxnäb wi äxxiimmärnen s-wär-issen e-s t-dd-hän kud-däx əssanän inaxdimän-wi tän-dd-əlkäwnen siha s-dd-hän; iyrä-dd ämazlay,

10 inn'-as: «Wär t-illa ere s-wädden aman n-läxnäb wi äxxiimmärnen äzednen a isaswa äddinät har tän-ijməd ənniyät təzzar, išəsrøy-tän-dd wi wären əkna täzude mäšan, käyy wi äzednen a təššəsräyäd.»

11 Iji n-Mässinäx wa-däx ija Yisa däx-Käna ta n-Galila a-s iji-net wa äzzarän, äsnäfaläl-dd sār-s tārna-net dat-äddinät, omänän sar-s inəttulab-net.

12 Ätrara Yisa darät-a-wen, ikka tayrəmt ta n-Qäfärnaxum äddeew d-ma-s d-ayətma-s d-inəttulab-net mäšan, wär-əhoja dihen.

*Iššəšdäj Yisa ehän n-ämudd wa mäqqārän
(Mätti 21:12-13; Marqəs 11:15-18; Luqa 19:45-46)*

13 Ohäz-dd ämudd n-käl-Älyähud wa n-Faşka xas, äjožäy Yisa, ikka Yärussalam.

14 Ogäz-dd däx-ehän n-ämudd wa mäqqārän ättužzar n-iwdesän d-tihatten d-tidäberen d-käl-amähaš äqqiimän däx-s,

15 iknä-dd ebärtäk n-iyunan, ad-tän-isattäx əntäned d-tihatten-näsän d-iwdesän-näsän, išamähaš izärfan n-käl-amähaš, isibräxwil tisəskar-näsän,

16 ijanna i-ätužžar n-tidäberen: «Ækkəsät a-wa diha, wär jem ehän n-Abba-nin ehän n-mamäla.»

17 Innä a-wen ɣas, əktän-dd inəttulab-net a-s iktab dəɣ-mäjräd n-Mässinäɣ a-s:

«Tədgaz-ahi tärha n-ehän-näk.»

18 Eɣgädän-dd sār-s imizārän n-käl-Älyähud, ənnän-as: «Ma ämoos iji n-Mässinäɣ wa s-täddobed iji-net i-ad-hanäɣ-səfləsäd a-s a-wa jed ämära-däɣ, led sār-s.»

19 Inn'-asän: «Ändät ehän n-ämudd-wa-däɣ ad-hawän-t-dd səbdədäɣ dəɣ-käraɢ išilan.»

20 Ənnän-as käl-Älyähud: «Käh! Ajän wädden ehän n-ämudd-wa-däɣ, əkkožät timərwen n-awätay d-säɢis a ija ibinnəw təzzar imdä, ɣas əndek dihad ila əmmək ad-t-dd-səbdədäd käy dəɣ-käraɢ išilan?»

21 Ij'-asän ɤisa mäjräd-wen-däɣ mäšan, wär-əjrehän a-s ehän n-ämudd wa s-hasän-ihä isälan-net, taɣəssa-net ənta iman-net.

22 Šamad dd-inkär ɤisa jer-inəmmuttan a dd-əktän inəttulab-net tifer-tin-däɣ ija, omänän s-a-wa ənnän əlkəttabän d-a-wa innä ənta iman-net.

23 Äzzäman-wen-däɣ n-ämudd wa n-Faška ässakäy dəɣ-Yärussälam, omänän sār-s ädinät äjjootnen hannäynen ijitän n-Mässinäɣ wi itäj,

24 mäšan wär tän-ifles ed izzay-tän iket-däɣ-näsän,

25 wär-ämyatär dəɣ, ad-has-äjjäyh äwadəm wäl' iyyän fäll-iiyyän ed, issan d-iman-net a-wa ihän ulh n-e d t-illäm ägg-adəm.

3

Edäwänne wa ija ʕisa d-Nikodem däḡ-isälan n-tiwit ta täynayät.

¹ Ehäḍ iyyän, osä-dd iyyän däḡ-imänokalän n-käl-Älyähud la taggayt ta n-käl-faris s-isəm-net Nikodem ʕisa,

² inn'-as: «Äḡalim,† nössan a-s käyy äḡalim dd-äšimasäl Mässinäḡ a tämoosäd fäl-a-s ijitän n-Mässinäḡ wi täjjäd, wär t-illa ere äddooben iji-näsän ar s-ad-t-idhal Mässinäḡ.»

³ Äwwežäb-as ʕisa, inn'-as: «Älleḡeḡ-ak s-tidät tädduuttet† a-s a ikkäs äwadəm wär-ija tiwit ta täynayät dd-fälät išənnawän, wär mad-inhöy Təmmənəya ta n-Mässinäḡ.»

⁴ Inn'-as Nikodem: «Ḃndek əmmək wa s-mad-iwəy äwadəm wäššärän? Ajän äddobät ad-iqqəl täsa n-ma-s, äj-dd tiwit ta s-sänatät?»

⁵ Inn'-as ʕisa: «Älleḡeḡ-ak s-tidät tädduuttet a-s ere wärän iwa s-aman d-Unfas Šäddijän, wär-e ijjəš Təmmənəya n-Mässinäḡ

⁶ fäl-a-s, a-wa dd-torāw taḡəssa, i n-taḡəssa, a-wa dd-orāw Unfas daḡ, i n-Unfas.

⁷ Wär-itäqqänet eḡäf-näk fäl-a-s innin ənneḡ-ak: <Wär hawän-t-təlla ar tiwit ta täynayät dd-fälät išənnawän.>

⁸ Wädden aḍu itəhhal siha s-irha, salläd i-eməsli-net mäšan, wär tössenäd siha s-dd-iha wäla siha s-ikka, a-wen-däḡ daḡ, a ij' äwadəm iket-net dd-iwan s-Unfas n-Mässinäḡ.»

† 3:2 3:2 Däḡ-ʕäbranəyya: Rəbbi. † 3:3 3:3 Däḡ-Tälyunanit: Amin, amin: (S-tidät, tidät).

⁹ Issəstän Nikodem Ƴisa daɣ, inn'-as: «Ǝndek əmmək wa s-mad-äj a-wen?»

¹⁰ Inn'-as Ƴisa: «Ǝnd'-e-d-il' əmmək a-s käyy älyalim n-Işrayil oğdähän d-a-wa-däɣ, uhən-däɣ wär käy-hen isälan n-a-wen-däɣ?

¹¹ Älleɣeɣ-ak s-tidət tädduuttet a-s nətajj isälan n-a-wa nəssän, nətajäyha daɣ fäll-a-wa nənhäy mäšan käwäneɗ, wär tärɗem s-tajuhe-nänäɣ.

¹² Ƴas, kunta wär hi-təfləsäm dihad hawän-əssewäläɣ däɣ-isälan n-härätän wi n-äddunya, əndek əmmək wa s-hi-mad-təfləsäm afäl hawän-əssewäläɣ däɣ-isälan wi n-tidət əlkämnen n-işənnawän?

¹³ Wär t-illa ere iwwaɗän işənnawän kunta wädden ere wa-tän-dd-ifälän, a-wen a t-ämoosän Ägg-ägg-adəm-i däɣ-sän izzäɣän.

¹⁴ Əmmək-wa-däɣ s-issärjäj ännäbi Mosa taşşält däɣ-tenere, əmmək-wen-däɣ daɣ a-s ilzam, ad-itwəɗkəl Ägg-ägg-adəm,

¹⁵ dihen, ere sār-s omänän-däɣ, ad-ijrəw tämudre täɣlälät

¹⁶ fäl-a-s, Mässinäɣ, ija i-äddunya tärha-ta-däɣ fäl ikfa Rure-s wa n-iyyän i-ere sār-s omänän-däɣ, wär-e ämmät, änn-ak, ad-ijrəw tämudre ta täɣlälät;

¹⁷ Mässinäɣ, wär dd-äşmaşäl Rure-s s-äddunya i-ad-tät-işräɣ, änn-ak i-ad-tät-iɣləs.

¹⁸ Ere sār-s omänän, wär t-e-işräɣ mäšan, ere sār-s wärän omen, äru d-itbät äşşäreɣa-net fäl-a-s, wär-omen s-Rure-s n-Mässinäɣ wa n-iyyän.

¹⁹ Äddälil n-äşşäreɣa-en, ənta da: osä-dd

ännur äddunya mäšan, ässofän dägg-adəm ti-hay ed timaşalen-näsän ti läbasnen.

²⁰ Äwadəm itamašalän a läbasän härkuk äššunjät ännur, wär dawa-s dd-itəmmil ed äksuð ad-dd-əffukkärän erk imojjan-net

²¹ mäšan, ere iglan fäl tidət, wär-äksuð ad-dd-äkk ännur i-ad-dd-infiləl a-s imojjan-net, Mässinäx a-s əssəbab-näsän.»

Tajuhe ta s-sənatät ija Exya wa n-Enəsselmäx fäll-Ÿisa

²² Darät-a-wen, ikka Ÿisa d-inəttulab-net teje ta n-Älyähudəyät, əzzäxän dihen-däx, ad-isalməx äddinät.

²³ A-s ija a-wen, Exya ənta, tisən-t-dd äddinät, isalməx-tän däx-edägg s-isəm-net Anun däx-ihəz n-tadəbayt ta n-Saləm fäl-a-s, əjjətän aman dihen.

²⁴ A-wen itajj härwa wär hin-ätwäjär Exya däx-takärmüt.

²⁵ Tənkär tamxənnant jer-inəttulab n-Exya d-ägg-Älyähud iyyän däx-isälan n-älwälla wa išäšdajän xas,

²⁶ əkkän-t-dd, ənnän-as: «Älyəlim,[†] ähaləs wa s-käla dər-s tärtäyäd fäll-täjəyhäd fäll-ašrut n-ejäns n-Ÿurdəni wa iyyäðän, äməra isalməx ənta-däx, takkän-t äddinät iket-näsän.»

²⁷ Inn'-asän Exya: «Ägg-adəm, wär-e äj ar a-wa dər-t-äskälläf Mässinäx.

[†] 3:26 3:26 Däx-Ÿäbranəyya: Rābbi.

²⁸ Wădden, tăjjøyhăm iket-năwăn a-s  nney: <Năkk, wăr-ămoosăy Ălmasex, ămişel  as a dd-je  data-s.>

²⁹ N ssan a-s ămazlay  nta a ilăn t mazlayt m şan, amidi n-ămazlay-i  ur-săn t-illăn  sij d,  sid w t-t em sli n-ămazlay wa s-is ll.  lm d t a-s ted wit-ten-d y it jj amidi n-ămazlay, a je  n kk-d y  m ra, ted wit-in da , t jlay, t mda.

³⁰ Im aret is m-net, ifn zet wa-nin.»

Is lan n-Wa dd-if l n i ennaw n

³¹ «Ere wa dd-if l n i ennaw n, oj r  ddin t iket-n s n, ere wa dd-if l n  kall, i n- kall, wăr mad- j da  ar is lan n- kall-i-d y m şan, ere wa dd-if l n i ennaw n, [oj r  ddin t iket-n s n ed]

³²  nta is lan n-a-wa inh y d-a-wa isl  a itajj m şan, wăr t-illa ere t-iflas n.

³³ Ere wa t-ifl s n,  ssiitb t t nna n-M ssin y

³⁴ f l-a-s, ere wa dd- şmaş l M ssin y, a-wa inn  M ssin y a ijanna ed  sin fl y-t M ssin y d y-isuf n-Unfas-net.

³⁵ Abba ikna t rha n-Rure-s, h r t iket-net a ija d y-ifass n-net.

³⁶ Ere wa om n n s-Rure-s, ijraw t mudre ta t yl l t, ere wa s r-s w r n omen, wăr mad-inh y t mudre ta ih kk M ssin y ed, insa f lla-s a k r n-M ssin y.»

4

Tu-S marit ta tom n t s- isa

1 Ilmäd Ƴisa a-s əslän käl-faris a-s ojarän inəttulab wi isälmaḡ ənta, uhən wi isälmaḡ Exya, a-wen-däḡ a äḡelän.

2 Tidət a-s, Ƴisa ənta iman-net, wär t-illa ere ässilmäḡ, inəttulab-net ḡas a salmaḡnen äddinät.

3 Ifäl teje ta n-Älyähudəyät, oläs tikawt n-ta n-Galila

4 mäšan, i-ad-äj a-wen, ilzam-t ad-ijləy teje ta n-Sämari.

5 Äsookal har dd-iwwäḡ aḡrəm n-Sämari s-isəm-net Sišar, ikkä dihen anu wa ihän ašəkrəš wa iḡäš ännäbi Yaḡub təzzar ikf'-e i-rure-s Yusəf, anu-en, iwär-t isəm wa n-Yaḡub.

6 Osä-dd anu ḡas, äqqimä fäll-emm-net i-ad-isunf a-wa-däḡ has-ija aləḡḡeš n-asikəl. A-wen a itajjän s-tarähut.

7 Äqqiima fäll-emm n-anu-en-däḡ a-s dd-tosa tu-Sämariit dd-təšrajät, inn'-as Ƴisa: «Tamäḡt, säsw'-ahi-dd.»

8 A-s itäj a-wen-däḡ, əkkan inəttulab-net aḡrəm i-ad-dd-žənšən imənsiwän əkšän.

9 Tənn'-as tamäḡt: «Ma käy-äsihälän käyy-i n-ägg-Älyähud, ad-däḡ-i təttäräd aman näkk-i n-tu-Sämariit?» Äzzäman-en, käl-Älyähud d-käl-Sämari, wär-änmännäkän.

10 Inn'-as Ƴisa: «Ənnar təssanäd fäll-isuf n-Mässinäḡ d-ere wa ham-ijännen: <säsw'-ahi-dd>; kämm a has-madän-änn: <säsw'-ahi-dd>; äkf'-im ənta, aman əddärnen.»

11 Tənn'-as tamäḡt: «Äḡalim, anu-i, i šəjreen, käyy daḡ wär led äja, ḡas, əndek əmmək wa s-mad-dd-təjrwäd aman əddärnen wi s-jänned?

12 Ajän tojărăd abba-nänäx ännäbi Yaqub-i hanäx-ikfän anu-i-däx däx-iswa ənta d-aratän-net d-irəzzejän-net?»

13 Inn'-as Ƴisa: «Ere iswän aman n-anu-i-däx, ad-aləs fad

14 mäšan, ere iswän aman-wi t-mad-äkfäx, wär däx-s ilkem fad ed, ad-däx-s umasän aman wi t-mad-äkfäx, a däx-has-dd-təffay tämudre ta täxlälät.»

15 Tənn'-as tamädt: «Älɣalim, säsw'-ahi däx-aman-win-däx i-ad-äbas tifađäx, əbdəwäx s-iyyəd d-ašəroj n-anu-i-däx.»

16 Inn'-as Ƴisa: «Əgləw, idaw-dd d-ähələs-näm, täqqələd-ahi-dd.»

17 Tənn'-as tamädt: «Wär-ədobänäx.» Inn'-as Ƴisa: «Tənned tidət a-s wär tädobänäd

18 fäl-a-s, jed səmmos idubnawän mäšan, təzjərät-tän-dd iket-näsän, ähäləs daɣ wa dər-tärtäyäd äməra-däx, wär tämsäxläläm.»

19 Tənn'-as tamädt: «Älɣalim, hannäyäx a-s käyy ya ännäbi a tämoosäd!

20 Ibda abbatän-nänäx ađax-wa-däx a fäll-ɣabbädän Mässinäx mäšan, käwäned-i n-käl-Älyähud, tənnäm wär t-illa älxibadät n-Mässinäx ar däx-Yərussälam.»

21 Inn'-as Ƴisa: «Tamädt, əfləs-ahi, ilkam älwäqq d-wär mad-täybədəm Abba fäll-ađax-wa-däx wäla däx-Yərussälam.

22 Käwäned, ɣabbädäm a wär təssenäm mäšan, näkkäned nəssan ere wa nəɣabbäd ed, əlxəllas, käl-Älyähud a dd-ifäl.

23 Mäšan, ilkam ässaɣät s-ənta-da-däx nəha

ämära-däx däx-mad-äxbödän imumөнән wi n-tidöt Abba s-tidöt däx-өннийätән-näsän fäl-a-s, inaxbadän өjlaynen šund-win-däx a has-өjraznen.

²⁴ Mässinäx, Unfas, wär-itөtwөнhöy, a-wen-däx a fäl ere t-iхabbädän, iхbөdet-t s-өннийät d-tidöt.»

²⁵ Tөnn'-as tamädt: «Essanäx a-s Wa innөfränän s-itawänna Älmaseх, ilkam ad-dd-ass, afäl dd-osa, ad-hanäx-isөssiхөd däx-härät iket-net.»

²⁶ Inn'-as Yisa: «Näkk-i-däx ham-ämmiijrädän a t-ämoosän.»

²⁷ Ämmiijräd-as Yisa härwa a-s dd-өqqälän inөтtulab-net. Iqqän a-wa s-ämmiijräd i-tamädt iхäfawän-näsän mäšan, hakd a-wen-däx, wär tän-iha-i t-ässistänän d-a-wa däx-s irha wäla a-wa fäl där-s ädiwännät.

²⁸ Toyyä tamädt aхäsис-net dihen-däx, täqqäl aхrөm, төnnä i-äddinät:

²⁹ «Eyyäwät, өnhөywät ähalөs hi-illäхen a-wa s-käla t-jeх iket-net, ämmuukkän a-s өnta-i-däx a-s Älmaseх.»

³⁰ Eзjärän-dd käl-aхrөm, өkkän-dd Yisa.

³¹ A-s itäj a-wen, salхadän inөтtulab äлхalim-näsän i-ad-ämmäkläw

³² mäšan, inn'-asän: «Näkk, leх a өkšөх wär төssenäm.»

³³ Ad-tinmөnnin: «Ajän iwwäy-as-dd äwadөm amөnsi çara-näx?»

³⁴ Inn'-asän Yisa: «Amөnsi-nin, iji n-erhet n-Wa hi-dd-äšmašälän, sөtbөtäx ämašal-net.

³⁵ Wädden a jannem diha-däx s-өkkoз orän ad-ämaläyän išөkraš? Enneх-awän: өnhөywät,

əḍkəlāt tiṭṭawen-nāwān, tək̄yədām dāḡ-išəkraš, əŋŋan, wār-ərhen ɣas ar amili.

³⁶ Āssaḡāt wa d-ijarrāw ānaxdim wa itiləyən išəkraš ālxəq n-tide-net, ənta-da-dāḡ dāḡ-təssəba n-ad-isədəw allon-net i-tāmudre ta təylālāt, i-ad-imzəyyət ānaxdim-wa äddomen d-wa itiləyən tedāwit

³⁷ ed, ozz wa innān: <äddomāt iyyān, olāy wa iyyāḍān>, innā tidət.

³⁸ Näkk, āssokäḡ-kāwān illuy n-išəkraš dāḡ-wān wāren irh' āššahāt, iyyāḍ a tān-ixdāmān, tārbāxām kāwāneḍ-dāḡ āššahāt-nāsān.»

³⁹ Omānān käl-Sāmari n-aḡrəm-ənnin-dāḡ äjjootnen s-Ḣisa dāḡ-təssəba n-tajuhe ta hasān-təja tamāḍt a-s hasān-təna: «Illāḡāt-ahi a-wa s-kāla t-jeḡ iket-net.»

⁴⁰ A-wen-dāḡ a fāl osān-dd Ḣisa ɣas, dālān-t d-ad-ɣur-sān izzāḡ, ija ɣur-sān əssin išilan.

⁴¹ ʔslān-as ənta iman-net ämmijrād ɣas, jān wi sār-s omānnen əjut ojarān wənnin.

⁴² ʔnnān wi sār-s omānnen i-tamāḍt: «Āmāra, ābas sār-s noman dāḡ-təssəba n-a-wa hanāḡ-tənned, nəsl'-as iman-nānāḡ, nomān daḡ a-s ädduuttāt a-s ənta a-s Āmaḡlas n-äddunya.»

Rure-s n-ägg-əlxəkum wa äzozäy Ḣisa

⁴³ Āssakäy Ḣisa əssin išilan-win-dāḡ dihen ɣas, ikkā teje ta n-Galila

⁴⁴ ed, issan a-s: «Wār t-illa ānnābi ätiwāsämḡārān dāḡ-äkall-net.»

⁴⁵ Māšan, diha-dāḡ d-hin-iwwāḍ Galila, ad-t-āsbārrākān käl-äkall ed, ənhāyān dāḡ-sān

i äjjootten dāḡ-wi ässakäyenen ämudd dāḡ-Yārussālam a-wa ija Ḡisa iket-net.

⁴⁶ Iqqāl Ḡisa ḡarāt-a-wen tadābayt ta n-Kāna hāt teje ta n-Galila dāḡ-āsmāskāl aman, ij'-en aman n-lāynāb äxxiimmärnen. A-s itājj a-wen-dāḡ, ih' ägg-əlḡəkum iyyän s-ärhin rure-s aḡrəm wa n-Qāfärnaxum.

⁴⁷ Islä a-s Ḡisa ifäl-dd Älyähudəyät s-Galila ḡas, ikk'-e-hi-dd, ad-t-ilaqqād i-ad-dd-itruur, izuzəy rure-s s-išwar t-äba.

⁴⁸ Inn'-as Ḡisa: «Adiš kāwāneḡ a tökkäm wär tənheyām ijitän n-Mässināḡ d-tikunen, wär-e tamənäm s-Mässināḡ.»

⁴⁹ Inn'-as kābtän: «Älyalim, näglet šik iket-di d-wär-ämmut alyaq-in.»

⁵⁰ Inn'-as Ḡisa: «Egləw, rure-k iddar.» Ifläs kābtän a-wa has-innä Ḡisa, iglä.

⁵¹ Ikka-dd ehän-net härwa a-s has-dd-əlkaḡän inaxdimän-net, ənnän-as: «Rure-k, iddar.»

⁵² Issəstän-tän d-ässayät wa-dāḡ ijrāw älafu, ənnän-as: «Əndəšel s-tezzar ad-t-toyyä tenäde.»

⁵³ Inhäy abba n-alyaq a-s älwäqq-wen-dāḡ iman-net ad-has-innä Ḡisa: «Rure-k, iddar». Omän ašäl-wen-dāḡ s-Ḡisa ənta hakd ejädäš-net iket-net.

⁵⁴ Iji n-Mässināḡ wa-dāḡ a-s wa s-əssin ija Ḡisa ḡarāt efel-net i-Älyähudəyät s-Galila.

5

Anäbdon wa äzozäy Ḡisa

¹ Ijä ämudd iyyän dāḡ n-käl-Älyähud ḡas, oläs Ḡisa tikawt n-Yārussālam.

² Yārussälam, ujəš-net wa s-itawänna wa n-tihatten, h'-e täsahaḡt n-aman s-isəm-net dāḡ-Ÿābranəyya: Bätzata, äḡlaynät-tät səmmosät tisəkla

³ daw-ənsan imarhinän d-iməddorḡal d-inəbdan d-inaḡyabän äjjootnen [äqqalnen i-emäremar n-aman

⁴ fäl-a-s dehiyyän, itizəbbut-dd änjälos n-Emäli dāḡ-täsahaḡt, isəmrumär aman-net. Ere äzzarän s-ujəš n-aman-en-dāḡ darät a-s tän-äsimmäär änjälos, ad-izzəy a tämoos turhəнна-net dāḡ].

⁵ Ins' ähaləs dihen ibdanän a ilan kərəḡät timərwen n-awätay d-əttam.

⁶ Inhäy-t Ÿisa insa, ilmäd dāḡ-iman-net a-s ähoja ässins'-e bəddin-net dihen-dāḡ ḡas, inn'-as: «Ajän tärhed ad-käy-dd-iqqəl ässexät-näk?»

⁷ Inn'-as anəbdon: «Äḡalim, wär ley äwadəm hi-ijärän dāḡ-täsahaḡt e-d ämramärän aman. E-d sär-sän dd-ämhärhämäräḡ-dāḡ, ad-hi sär-sän išwär ere hi-ojärän armud.»

⁸ Inn'-as Ÿisa: «Əbdəd, əḡkəl asəftäḡ-näk, ärjəš.»

⁹ Izzäy ähaləs älwäqq-wen-dāḡ, idkäl asəftäḡ-net, irjäš. Ašäl wa d-itäjǰ a-wen-dāḡ, ašäl n-əssəbət-i n-täsonfat.

¹⁰ Izzäy ḡas, osän-t-dd imizärän n-käl-Älyähud, ənnän-as: «Ajän wär təssenäd a-s ašäl-i, əssəbət-i-dāḡ wär hak-xälal agḡay n-asəftäḡ-näk.»

¹¹ Inn'-asän: «Ähaləs wa hi-äzozäyän, a hi-innän: <Əḡkəl asəftäḡ-näk, ärjəš.> »

¹² Ənnän-as: «Ma ämoos ähaləs wa hak-

innän: <Ǝdkəl asəftäχ-näk, ärjəš?> »

¹³ Ähaləs wa izzäyän, wär-izzey ere wa t-äzozäyän ed äzozäy-t Ƴisa Ʒas, izjār tamətte.

¹⁴ Ämmoqqäs dār-s Ƴisa ɔarāt-a-wen dāχ-ehän n-ämudd wa mäqqārän, inn'-as: «Ämära d-təzzeyäd, wär tolesäd iji n-abäkkad, uksad ad-käy-ijrəw a irnän a-wa s-käla käy-ijräw.»

¹⁵ Igl' ähaləs ɔarāt-a-wen, illäχät i-imizārän n-käl-Älyähud a-s Ƴisa a t-äzozäyän.

¹⁶ Ǝslän i-a-wen Ʒas, ad-tattärän arämas n-Ƴisa ed ämešäl iji n-Mässinäχ wen-däχ dāχ-ašäl n-əssəbət-i n-täsonfat.

¹⁷ Inn'-asän Ƴisa: «Abba-nin, ixdam härkuk, näkk-däχ, a-wen-däχ a jeχ.»

¹⁸ Ämoos a-wen ämära äsaru wa fäl tattärän imizārän n-käl-Älyähud iji n-iman-net ed ənnän, wär-issəmxār ašäl wa n-əssəbət-i n-täsonfat, äsisägdäh daχ iman-net d-Mässinäχ ed, innä Abba-net a ämoos.

Turhajät ta ikfä Mässinäχ Ƴisa

¹⁹ Inn'-asän Ƴisa daχ: «Älleχəχ-awän s-tidət tädduuttet† a-s, wär t-illa a ixaddäm Rure-s n-Mässinäχ ar a-wa s-inhäy Abba-net ixdam-t, a-wa ämešäl Abba iket-net, ad-t-ämašäl Rure-s ənta-däχ

²⁰ fäl-a-s, Abba ikna tärha n-Rure-s, isakn'-e daχ a-wa itamašäl iket-net, ad-t-isəkən daχ ijitän ojärnen wi-däχ təmxäre, əknən iχäfawän-näwän uχən.

† 5:19 5:19 Däχ-Tälyunanit: Amin, amin (S-tidət, tidət).

21 Fäl-a-s, ömmək wa s-dd-isänkar Abba inömmuttan i-ad-tän-isudär, ömmək-wen-däx daḡ a-s ihakk Rure-s tämudre ere wa s-tät-irha.

22 Wär-išörräx Abba äwadəm wäl' iyyän mäšan, ija äššärexa n-härät iket-net jer-ifassän n-Rure-s

23 däx-tössöba n-ad-t-sömyärän äddinät iket-näsän s-ömmək wa s-ässimyarän Abba-net. Ere wärän issömyär Rure-s n-Mässinäx, wär mad-isömyär Abba-i t-dd-äšmašälän.

24 Älleḡeḡ-awän s-tidət tädduuttet a-s ere äsjädän i-mäjräd-in, omän s-wa hi-dd-äšmašälän, ijraw tämudre ta täḡlälät, wär-e inhöy äššärexa, änn-ak, ad-dd-ihlëbbət däḡ-ifassän n-tamättant, ijjöš tämudre ta täḡlälät.

25 Älleḡeḡ-awän s-tidət tädduuttet a-s imal-dd ässaḡät s-önta-da-däx nəha däḡ-mad-öslön inömmuttan i-emäslä n-Rure-s n-Mässinäx. Wi has-maden-isöll, ad-ëddärän

26 fäl-a-s, ömmək-wa-däx s-tämudre, ifassän n-Abba a төha, ömmək-wen-däx daḡ a-s ikfa Rure-s tädabit n-ad-isudär äddinät.

27 Enta a ikfä tädabit n-äššärexa-näsän ed önta iman-net a-s Ägg-ägg-adəm.

28 ḡas, wär täqqännet iḡäfawän-näwän fäl-a-s, imal-dd ässaḡät däḡ-mad-öslön inömmuttan iket-näsän i-emäslä n-Ägg-ägg-adəm.

29 Ašäl-en dd-nakkär tamötte jer-inömmuttan, äddinät wi ämešälnen särho, ad-dd-önkärän i-tämudre ta täḡlälät, wi s-tälläbäst ḡas a ämešälän, ad-dd-önkärän i-äššärexa.»

ḡisa Älmasex, tidət ḡas a isaxra tamötte

³⁰ «Näkk, wär t-illa fäw a tajjäx d-iman-nin xas, tønna n-Mässinäx xas a-s šarräxäx, äššärexa-nin day härkuk oxad ed, wädden erhet wa n-iman-in a-s tattäräx iji-net, wär töttäräx ar iji n-erhet n-Wa hi-dd-äšmašälän.

³¹ Afäl äqqäläx tajuhe i-iman-in, wär mad-tənfəw tajuhe-nin härät.

³² Ere säl näkk a fäll-i itajäyhen, əssanäx day a-s tajuhe-net fäll-i ənta, wär tät-iha äššäk.

³³ Wädden a-s täšmašäläm äddinät s-Exya, äjjəyha fäll-i.

³⁴ Əlmədät a-s näkk, wär t-illa ägg-adəm däx-tattäräx tajuhe mäšan, a-wa hawän-ənnəx, ənnəx-awän-t däx-derhan n-ad-täxləsäm.

³⁵ Exya, a-s dd-osä, ämoos tefätelt tärxat, tämiläwlaw mäšan, wär tətteräm ar tedäwit n-ässaxät əndärrän däx-ännur-net.

³⁶ Näkk, lex tajuhe tojarät ta fäll-i ijä Exya fäl-a-s, ijitän wi s-hi-ikfa Abba tädabit-näsän, əntäned-en-däx a äsidättätnen s-ənta a hi-dd-äšmašälän.

³⁷ Abba day-i hi-dd-äšmašälän, äsidättät a-wa ənnəx mäšan, wär käla təsläm i-eməsli-net, wär käla t-tənhäyäm day,

³⁸ tänimäšräyäm day i-mäjräd-net ed, wär tomenäm s-ere wa dd-äšmašäl.

³⁹ Əlkəttabän n-Mässinäx di-däx safäykem, tammäxäm däx-sän i-tämudre ta täxlälät, a tajäyhanen fäll-i

⁴⁰ mäšan, hakd a-wen-däx, tunjayäm s-ad-hi-dd-təkkəm näkk, i-ad-təjrəwäm tämudre ta täxlälät.

⁴¹ Təmmal-in wädden dägg-adəm a dd-təfal

⁴² māšan, əzzayǎχ-kāwǎn, əssanǎχ a-s wār təha tārha n-Mässinǎχ ulhawǎn-nǎwǎn.

⁴³ Näkk-i dd-osǎn fäll-isəm n-Abba-nin, tənkarǎm-ahi māšan, afäl kāwǎn-dd-osa ere iglan dǎχ-ǎlhimmät n-iman-net, šik a-s mad-t-tǎqbəlǎm.

⁴⁴ Əndek əmmək wa s-mad-tamənǎm kāwǎneḍ-i wǎren ətəmmǎχ ar i-təmmal jer-iman-nǎwǎn, a-s ija a-wen, wār təmməχǎm i-təmmal ta dd-fälät Mässinǎχ-i n-iyyǎn.

⁴⁵ Wār teχalät näkk a kāwǎn-e-isəḍləmǎn dat-Abba, ǎnnǎbi Mosa-i s-tənnǎm ənta a dǎχ-jarǎm ǎtṭǎma, a kāwǎn-e-isəḍləmǎn

⁴⁶ fäl-a-s, ənnar təflasǎm ǎnnǎbi Mosa, tamənǎm sār-i ed, isǎlan-nin, iktab-tǎn.

⁴⁷ Ƴas, šǎmad wār təfləsǎm a-wa iktǎb, əndek əmmək wa s-mad-təfləsǎm a-wa hawǎn-janneχ?»

6

ǎsyǎwǎn Ƴisa səmmos afdǎn n-ǎwadəm (Mǎtti 14:13-21; Marqəs 6:30-44; Luqa 9:10-17)

¹ Ijlǎy Ƴisa darät-a-wen s-asǎlim n-əjǎnš wa iyyǎḍǎn n-Galila s-itawǎnna wa n-Tibǎryad.

² Əlkǎmǎn-as-dd ǎddinät ǎjjootten hannǎynen ijitǎn n-Mässinǎχ wi s-izizuy imarhinǎn.

³ Iwwǎn taḍayt ənta d-inəṭṭulab-net, ǎqqima fǎlla-s.

⁴ Azzǎman-en, ohaz-dd ǎmudd n-kǎl-ǎlyǎhud wa s-itawǎnna Faška.

⁵ Iḍkǎl Ƴisa akǎyad-net, inhǎy tamətte ta tǎjjet t-dd-tökkät Ƴas, inna i-Fəlibb: «Əndek

diha d-mad-nəžānš tijəlwen äššikšānen tamətte-ta-dāḡ?»

⁶ Irrum ḡas a t-itajj ed issan ḡur-iman-net a-wa mad-āj.

⁷ Äwwežāb-as Fəlibb, inn'-as: «Kud-nəžžənša tijəlwen n-sānatāt timaḍ n-ārriyal n-azrəf-dāḡ, wār mad-igdāh a-wen i-tamətte jat əjut-wa-dāḡ kud-dāḡ s-afārs-afārs.»

⁸ Iggād-dd iyyān dāḡ-inəṭṭulab wa s-isəm-net Idris n-āṇṇa-s n-Simyōn Bəṭrus, inn'-as:

⁹ «Ill'-e alyaq diha ilan səmmosāt tijəlwen n-tārruza d-əssin imānan māšan, a-wen ma ikna dāḡ-tamətte jat əjut-wa-dāḡ?»

¹⁰ Inn'-asān Ḡisa: «Sāqqəymāt tamətte.» Eddäg-en, ässiidwāl teyəšše, tāqqima fälla-s tamətte iha a iwwādān səmmos afdān n-āhaləs.

¹¹ Iḍkāl Ḡisa tijəlwen ti n-səmmosāt, ämmoy i-Mässināḡ təzzar, āzun-tānāt i-tamətte. Ija a-wen-dāḡ daḡ i-imānan wi n-əssin, təkša tamətte har tässakāy.

¹² Älwäqq wa d-əkšān, əyyəwānān, innä Ḡisa i-inəṭṭulab-net: «Sādwāt-dd ifārsān wi əjolāšnen i-ad-wār-ibāxxəs əttāḡam.»

¹³ Äsdāwān-dd a-wa dd-əjlāšān äddināt, osānt idnāy māraw deketān d-əssin n-tijəlwen.

¹⁴ Ənhāyān äddināt iji n-Mässināḡ wa s-iket t-ija Ḡisa ḡas, ənnān: «Ädduuttāt a-s ənta-da-dāḡ ännābi wa ilān s-a dd-ass äddunya.»

¹⁵ Ilmād Ḡisa a-s ārhan ad-t-səmmənikəlān s-äššil ḡas, ifāl-tān, olās aggan n-taḍaḡt ənta ḡas.

*Rājjoš n-Ḡisa fäll-aman
(Mätti 14:22-27; Marqəs 6:45-52)*

16 Ijä ehäð ɣas, ätrarän-dd inəṭṭulab-net ejänš,

17 əjjäšän turäft n-aman, ad-jalläyän ejänš s-efäyy wa n-aɣrəm wa n-Qäfärnaxum. A-s itäjj a-wen-däɣ, janät tihay, wär tän-dd-äwweð daɣ Ƴisa härwa.

18 Inkär-dd fälla-sän aɟu äšsoohen, änmäntaş ejänš.

19 Äɣyämme turäft n-aman-näsän har ujəjän asälim n-ejänš s-a iwwäðän səmmos meɣ säðis kelumetärän təzzar, ənhäyän-t, ikk'-en-dd, irjaš fäll-aman.

20 Ärmäɣän mäšan, inn'-asän: «Näkk a-wa, wär tärməɣäm.»

21 Diha-däɣ d-əttärän ad-dd-ijjəš turäft fälla-sän ad-täsjän, təðäs äkall wa əkkän.

Tajella ta n-tidət häkkät tämudre

22 Äffäw ɣas, əjrähän-in äddinät-wi wärnen asälim n-ejänš wa dd-fälän a-s turäft n-aman tiyyät ɣas a-s käla täsjän dihen mäšan, wär däɣ-s igla Ƴisa, inəṭṭulab a däɣ-s əglänen, äkunän.

23 Osänät-dd daɣ turfen n-aman tiyyäð dd-falnen Tibäryad, əkkanät-dd edägg-wənnin däɣ-əkšän äddinät tijəlwen ɟarät tämayit ta ija Ƴisa i-Emäli.

24 Təjräh-in tamətte a-s Ƴisa hakd inəṭṭulab-net äbas t-əllan dihen ɣas, əjjäšän turfen n-aman ti s-iket dd-osänät, əkkän Qäfärnaxum, əmmaɣän-as.

25 Əjräwän-t fäll-asälim n-ejänš wa iyyäðän ɣas, ənnän-as: «Äɣalim, əmme dd-tosed diha?»

26 Inn'-asän Yisa: «Älleḡeḡ-awän s-tidət tädduuttet† a-s wädden ijitän n-Mässināḡ wi tənḡäyäm a fäl hi-tammāḡäm, änn-ak, tammāḡäm-ahi dāḡ-tössəba n-tijəlwen ti-dāḡ təyyəwänäm.

27 Wār täxdemäm i-išəkša-i s-ilkam ad-tän-iba, änn-ak, äxdəmät i-išəkša wi dd-tiirəwnen sār-wän tämudre ta täḡlälät-i käwän-mad-äkf Ägg-ägg-adəm, ed ənta-en-dāḡ a äswär Abba Mässināḡ ešwäl-net.»

28 Ənnän-as: «Əndək əmmək wa s-mad-näxdəm erhet n-Mässināḡ?»

29 Inn'-asän Yisa: «Erhet n-Mässināḡ a t-ämoosän ad-təfləsäm wa dd-äšmašäl.»

30 Ənnän-as: «Säkən-anāḡ iji n-Mässināḡ wa hanāḡ-käy-madän-isəfləs.

31 Abbatän-nänāḡ a-s əzzaḡän tenere, əkšän tajəlla ta hasän-dd-äsfäl Mässināḡ išənnawän fäl-a-s, iktab a-s:

<Ikf'-en Mässināḡ tajəlla dd-fälät išənnawän i-ad-tät-əkšən.> »

32 Inn'-asän Yisa: «Älleḡeḡ-awän s-tidət tädduuttet a-s wädden ännäbi Mosa a käwän-ikfän tajəlla ta dd-fälät išənnawän, Abba-nin ənta, ad-käwän-äkf tajəlla ta n-tidət dd-fälät išənnawän

33 ed, tajəlla ta ihäkk Mässināḡ a tät-ämoosän ere wa dd-ifälän išənnawän, ənta a ihakkän tämudre i-äddinät.»

34 Ənnän-as: «Äḡalim, ten-dāḡ tajəlla, äkf'-anāḡ-tät härkuk.»

† 6:26 6:26 Däḡ-Tälyunanit: Amin, amin (S-tidət, tidət).

³⁵ Inn'-asän Ƴisa: «Näkk a-s tajølla ta hakkät tämudre, wa hi-dd-ikkän, wär-ilkem ad-älluz, wa sär-i omänän wär-ilkem ad-äffud.

³⁶ Ässiilmädäx-käwän a-s tənähäyäm-ahi mäšan, tunjäyäm tomänäm.

³⁷ Ƴas, əlmədät a-s äddinät-wi hi-ikfa Abba-nin a hi-dd-asən iket-däx-näsän, wär mad-äkfäx däx ärori-nin i-ere hi-dd-ikkan

³⁸ ed, wär dd-feläx išənnawän i-ad-äjäx erhet-in, fäläx-tän-dd i-ad-äjäx erhet n-Wa hi-dd-äšmašälän.

³⁹ Erhet däx n-Wa hi-dd-äšmašälän a t-ämoosän, ad-wär-äsbätäx wäl' iyyän däx-äddinät-wi hi-ikfa, änn-ak, a irha ad-tän-dd-sənkäräx däx-tamättant ašäl wa ilkämän

⁴⁰ fäl-a-s, erhet n-Abba-nin ənta da: e d t-illäm ere sär-i omanän näkk-i n-Rure-s, ad-ijrəw tämudre ta täxlälät, sənkäräx-t-dd däx-tamättant ašäl wa ilkämän.»

⁴¹ Ad-simtəktikän käl-Älyähud jer-iman-näsän fäl-a-s innin inn'-asän: «Näkk a-s tajølla ta dd-fälät išənnawän»,

⁴² tinmənnin: «Ak wa ənta, wädden Ƴisa wa-däx n-ägg Ƴusəf, nəzzay ti-s, nəzzay ma-s? Ƴas, ma t-isawännen išənnawän a dd-ifal?»

⁴³ Äwwežəb-asän, inn'-asän: «Äyyät fälla-wän takšiwən,

⁴⁴ wär t-illa ere äddoben ad-hi-dd-äkk ar s-ad-t-dd-intaş Abba-nin sär-i, ere däx wa sär-i omänän, ad-t-dd-sənkäräx däx-tamättant ašäl wa ilkämän.

⁴⁵ Ajän wädden əktabän ännäbitän a-s: <Ilkam ad-umasän dägg-adəm iket-näsän inəṭṭulab n-Mässinäx>,

ɣas, ere islän i-tønna n-Abba, irða s-a-wa t-issäɣra, ad-hi-dd-äkk.

⁴⁶ Älmäɣna n-a-wen a-s wär t-illa ere inhayän Abba kunta wädden ere wa dd-ašmašäl Mässinäɣ, ənta ɣas a inhayän Abba.

⁴⁷ Älleɣeɣ-awän s-tidət tädduuttet a-s ere wa sär-i omänän, ijraw tämudre ta täɣläläät.

⁴⁸ Näkk a-s tajəlla ta hakkät tämudre.

⁴⁹ Abbatän-näwän a-s əzzaɣän tenere, əksän mana,[†] a-wen tajəlla n-taləmmizt ta hasän-dd-äsfäl Mässinäɣ išənnawän, hagd a-wen-däɣ, ämmun,

⁵⁰ mäšan, tajəlla ta dd-təšräyät dd-fälät išənnawän, ere tät-iksän, wär-e ämmät.

⁵¹ Näkk a-s tajəlla ta n-tämudre dd-fälät išənnawän, ere iksän tajəlla-ten-däɣ, ad-iddar härkuk; taɣəssa-nin a-s tajəlla-ten-däɣ mad-äkfäɣ i-ad-təddär äddunya.»

⁵² Inna ɣisa a-wen ɣas, tənkar tamɣənnant täšsoohet jer-käl-Älyähud, ad-tinmənnin: «Ən-dek əmmək wa s-mad-hanäɣ-äkf taɣəssa-net i-ad-tät-näks?»

⁵³ Inn'-asän ɣisa: «Älleɣeɣ-awän s-tidət tädduuttet a-s afäl wär təkšem taɣəssa-nin näkk-i n-Ägg-ägg-adəm, təswəm daɣ ašni-nin, wär mad-təddäräm.

⁵⁴ Ere iksän taɣəssa-nin, iswä ašni-nin, ijraw tämudre ta täɣläläät, sənkaräɣ-t-dd daɣ däɣ-tamättant ašäl wa ilkämän

[†] 6:49 6:49 A-wa isəm n-amənsi wa dd-äzzäbbät Mässinäɣ fäll-käl-Işrayil äzzäman wa d-hän tanəzruft. Itawänn'-as däɣ-Tälyunanit: Mana; itawänn'-as däɣ-Tämašäɣt: Taləmmizt n-Mässinäɣ.

55 fäl-a-s, taḡessa-nin a-s amənsi wa n-tidət, ašni-nin a-s tesäse ta n-tidət.

56 Ere ikšan taḡessa-nin, iswä ašni-nin, nosäḡ näkk d-ənta, heeḡ-t, ih'-ahi.

57 Emmək wa s-iddär Abba-i hi-dd-äšmašälän, əmmək-wen-däḡ a-s əddaräḡ näkk-däḡ. ʔas, ere ikšan taḡessa-nin däḡ, ad-has-umasäḡ əssəbab n-tämudre täylalät.

58 Enta-da-däḡ tajella ta dd-fälät išənnawän təzläyät d-tajella ta əkšan abbatän-näwän uhən-däḡ, ämmun. Ere wa ikšan tajella ta ämoosäḡ, ad-iddar härkuk.»

59 Enta-da-däḡ älxuṭbät wa ija ʔisa däḡ-ehän n-äddin wa n-käl-Älyähud ihän aḡrəm wa n-Qäfärnaxum.

Mäjräd n-ʔisa, ihakk tämudre

60 ʔslän inəṭṭulab-net äjjootnen i-älxuṭbät wa s-iket t-ijä ʔas, änmännän jer-iman-näsän: «Wa mäjräd, ojar-anäḡ, mi äddoben asjəd-has?»

61 Ilmäd ʔisa ḡur-iman-net a-wa simtəktikän, inn'-asän: «Ajän wa mäjräd, ikm'-iwän?»

62 Kud-täjjəyhäm i-Ägg-ägg-adəm har iqqäl däḡ-išənnawän edägg wa s-käla t-iha s-tizarät, ma mad-tənnəm?

63 Unfas n-Mässinäḡ a ihakkän tämudre, taḡessa mälayəḡna. Iməjridän wi hawän-jəḡ, hen tämudre ed, Unfas Šaddijän a dd-falän

64 mäšan, iyyäḍ däḡ-wän hi-əlkamnen, wär sār-i omenän.» Inn'-asän ʔisa a-wen ed issan ašäl äzzarän äddinät wi has-əlkamnen a-s ija a-wen wär sār-s omenän, issan daḡ däḡ-sän ere wa t-madän-isəssäḡdär.

⁶⁵ Ässewäd Yisa fäll-a-wen, innä: «Ënta-den-däx a-wa fäl hawän-ənnex ihənnin a-s wär t-illa ere hi-dd-madän-äkk ar s-ad-ijraw turhajät n-a-wen xur-Abba.»

⁶⁶ Yur-ten-däx, əqqälän çara-s inalkimän äjjootnen, äbas has-əlkamän.

Tajuhe n-Bətrus fäll-Yisa

⁶⁷ Innäd-dd Yisa çarät-a-wen s-inəttulab-net wi n-märaw d-əssin, inn'-asän: «Käwäneç-i-š, ajän wär tärhem uxəl çar'-i?»

⁶⁸ Inn'-as Simyon Bətrus: «Älyalim, mi mad-näkk? Käyy a ittafan iməjridän-wi hakkänen tämudre ta täxlälät;

⁶⁹ noman sär-k, nəkkas daç äššäk a-s käyy a-s Wa Šaddijän dd-ifälän Mässinäx.»

⁷⁰ Inn'-asän Yisa: «Käwäneç-i n-märaw d-əssin, ajän wädden näkk a käwän-äsnäfranän? Hakd a-wen-däx, iyyän däx-wän, iblis.»

⁷¹ Mäjräd-wen-däx, ij'-e Yisa fäll-Yähudəs Ägg Simyon wa n-Isxaryut fäl-a-s, ənta-i-däx n-iiyän däx-inəttulab wi n-märaw d-əssin a t-madän-isəssäxdär.

7

Täxart n-ulh n-ayətma-s n-Yisa

¹ Ällil Yisa çarät-a-wen teje ta n-Galila fäl-a-s, wär irha ad-ilal ta n-Älyähudəyät ed, äxtafän-as däx-s imizärän n-käl-Älyähud i-ad-t-änxən kərəf.

² Äzzäman-en, ohaz ämudd n-käl-Älyähud wa s-e-d dd-ija ad-əzzäxän daw-ihəktan.

³ Eḡḡādän-dd ayətma-s n-Ŷisa, ənnän-as: «Äkk Älyähudəyät i-ad-ənhəyän inəṭṭulab-näk wi t-əllanən dihen ijitän-näk əntäneḍ-däḡ,

⁴ ed ere irhan ad-sär-s əlmədän äddinät, wär-ixəddəm dəḡ-ufär, ḡas, kunta tajjäd timaşalen oḡdähnen d-a-wa-däḡ asuksäd, äj'-enät dat-äddunya iket-net.»

⁵ Ənnän-as ayətma-s a-wen ed wär sär-s omenän əntäneḍ-däḡ.

⁶ Inn'-asän Ŷisa: «Älwäqq-in wär-ija härwa mäšan, wa-näwän ija härkuk,

⁷ käwäneḍ wär təla äddunya äddälil fäl käwän-təkšär mäšan, näkk təkšar-ahi ed, tajäyheḡ fäll-ijitän-net wi läbasnen.

⁸ Äḡlät ḡas käwäneḍ, äkkät ämudd, näkk wär t-əkkeḡ ed ässaḡät-in, wär-iwwəḍ.»

⁹ Inn'-asän Ŷisa a-wen ḡas, äqqima dəḡ-Galila-en-däḡ.

Tikawt n-Ŷisa i-ämudd wa n-ihəktan dəḡ-Yărussälam

¹⁰ Ekkän ayətma-s ämudd ḡas, ikk'-e ənta-däḡ ḍarät-a-wen, mäšan, dəḡ-ufär i-ad-wär sär-s ilmed äwadəm.

¹¹ Ij' ašäl wa n-ämudd ḡas, ad-has-tammäḡän imizärän n-käl-Älyähud, sastanän d-diha d-t-illa.

¹² Tənkär tamḡənnant dəḡ-tamətte dəḡ-isälānet, ijanna aḡil iyyän: «Äwadəm olaḡän a ämoos», ijanna aḡil wa iyyäḍän: «A fäw, a-di, išinməšrəy tamətte»;

¹³ mäšan, hakd a-wen-däḡ, wär t-illa ere iḍakkälän eməsli-net i-ad-aməl Ŷisa fäl tuksəḍa n-imizärän n-käl-Älyähud.

14 Äzunän išilan n-ämudd ɣas, ikka ʁisa ehän n-ämudd wa mäqqārän, ad-däɣ-s isaɣra.

15 Äkunän käl-Älyähud däɣ-älxikmatän wi tän-isasla har jannen: «Wa älžahil, ənde d-dd-iɣra, mi t-issəlmädän ättäfässir n-əlkəttabän?»

16 Äwwežäb-asän, inn'-asän: «A-wa säɣreɣ, wädden a dd-izjarän erhet-in, erhet n-Mässinäɣ-i hi-dd-äšmašälän a dd-ifal.

17 ʁas, ere irhän ad-ämašäl erhet n-Mässinäɣ, ad-ilməd kunta asəssäɣär wa tajjäɣ Mässinäɣ a dd-ifal meɣ-i dd-əkneɣ ɣur-iman-in.

18 Ere itamäjrädän fäll-iman-net, aɣkul n-iman-net ɣas a itattär mäšan, ere itattärän төmmal n-wa t-dd-äšmašälän, tidət a ijanna, wär t-ihä a ifraɣän.

19 Ajän wädden ännäbi Mosa a käwän-ikfän Ättäwrät? Adiš mafäl wär tömišiläm a-wa hawän däɣ-s inna? Ma hawän-äɣšädäɣ a-s tattäräm tenäɣe-nin?»

20 Ənnän-as: «Tidət-däɣ a-s ih'-ik alšin, mi itattärän tenäɣe-näk?»

21 Inn'-asän ʁisa: «Jeɣ data-wän iji iyyän ɣas, täkunäm däɣ-s,

22 amili, nəssan a-s wädden ännäbi Mosa a fäll-dd-äzzubbät s-tizarät, imɣarän wi has-äzzarnen a fäll-dd-äzzubbät mäšan, omär-käwän sār-s ɣas, ad-samalayäm aratän wäla däɣ-ašäl n-əssəbət-i n-täsonfat.

23 ʁas, šamad wär käwän-äšnämäšräy d-Ättäwrät asəmmili n-ara däɣ-ašäl n-əssəbət-i n-täsonfat, adiš, mafäl käwän fäll-i ih' älhäm fäl-a-s innin äzozäyäɣ äwadəm imdan däɣ-ašäl n-əssəbət?

24 He käwäneḍ! Wār təkkeḍäm äwadəm s-a-wa s-tordäm, hannäyäm fälla-s, əḍkeḍät-t s-a-wa ämoosän tidət.»

25 Innä Ƴisa a-wen ƣas, ad-jannen iyyäḍ dəƣ-käl-Yärussälam: «Ajän wädden ənta-i-däƣ a-s tattärän tenäƣe-net?»

26 Ənhəywät-t, ädiwännät dār-sän s-əmmək wa s-irha uhən wār t-illa a has-ƣaššädän. Tor-dam a-s wädden asədəttu a jän imizärän-nänäƣ a-s ənta-i-däƣ a-s Älmasex?

27 Älwäxla a-s ənta-i, nəssan siha s-dd-iha, a-s ija a-wen Älmasex, wār t-illa ere issanän siha s-mad-dd-ihiy.»

28 İdkäl Ƴisa emäsli-net, härwa isayra dəƣ-ehän n-ämudd wa mäqqärän, innä: «Wädden təzzayäm-ahi, təssanäm dəƣ siha s-dd-heƣ mäšan, hək d a-wen-däƣ, əlmədät a-s wār dd-äšmašäläƣ iman-in, ere wa hi-dd-äšmašälän, wār t-təzzeyäm mäšan, ädduuttät;

29 näkk-i t-dd-ifälän, əzzayäƣ-t ed ənta a hi-dd-äšmašälän.»

30 Əttärän arəmas-net mäšan, wār t-illa ere t-iḍasän ed älwäqq-net, wār dd-iwwəḍ härwa.

31 Omänän äddinät äjjootnen hanen älzəmaƣät-en-däƣ s-Ƴisa ƣas, ad-tinmənnin jer-iman-näsän: «Ak tordam a-s Älmasex fäw kud-dd-osa-däƣ, ajän ad-äj ijitän n-Mässinäƣ ojärnən wi ij' ähaləs-i-däƣ!»

Əttärän imizärän n-käl-Älyähud əmmək s-ärmäsän Ƴisa

³² Ɖslān kāl-faris i-aḍkul wa tēja tamøtte Ƴisa dāḡ-ātuktek ḡas, øssøglān imizārān n-kāl-tikutawen d-kāl-faris ālgomitān n-ehān n-āmudd wa māqqārān i-ad-dd-ārməsān Ƴisa.

³³ Inn'-asān Ƴisa: «Ɖlley jere-wān ālwāqq øndārrān, darāt-a-wen, ad-āqqøläḡ ere wa hi-dd-Åšmašālān.

³⁴ Ilkam dāḡ-wān ad-hi-tømmāḡām māšan, wār mad-hi-tøjrøwām ed siha s-økkeḡ, wār tāddebem aggaḍ-net.»

³⁵ Ānmānān imizārān n-kāl-Ālyāhud jer-iman-nāsān: «Ɖndek ḡas edāgg wa mad-ākk dāḡ-t wār mad-nøjrøw? Tordam a-s irha ad-ākk kāl-Ālyāhud wi ømmāhāšnen jer-kāl-Ālyunan† meḡ tordam a-s kāl-Ālyunan-en-dāḡ a mad-ākk i-ad-tān-isāḡār āmāra?

³⁶ Meḡ ma tordam øndek ālmāḡna n-a-wa s-innā: <Ad-hi-tømmāḡām māšan, wār hi-mad-tøjrøwām> d-a-wa s-innā daḡ: <Siha s-økkeḡ, wār tāddebem aggaḍ-net?> »

Ƴisa a-s aman øddārnen

³⁷ Ašāl wa isrāyān māqqārān d-imiddøw āmudd, ibdād Ƴisa dat-ālžāmaḡāt, iḍkāl emāsli-net, innā: «Ere āffudān-dāḡ, aset-ahi-dd, āswet.

³⁸ Ere sār-i omānān, ad-ønjoyān ijørwan n-aman øddarnen dāḡ-ulh-net s-ømmøk wa s-tān-innā ølkøttab n-Māssināḡ.»

† **7:35 7:35** Itawann'-asān: Gøriktān. (Les Grecs dāḡ-Tøfrānsit). Ɖzzaḡān Erobbā dāḡ-ākall wa itawānna: Gøris (La Grèce dāḡ-Tøfrānsit). Tawalt-nāsān: Tālyunanit.

39 Innä ʕisa a-wen, dāḡ-isālan n-Unfas n-Mässināḡ wa mad-əjrəwān wi maden-amən sār-s ed a-s itājj a-wen-dāḡ, wār dd-āzzubbāt Unfas Šaddijān ed ʕisa wār-ijješ ālxurmāt-net hārwa.

ʔbdān āddināt dāḡ-təssəba n-ʕisa

40 Təslā tamətte ta təsijādāt i-a-wa innä ḡas, inn' aḡil-net iyyān: «Āduuttāt a-s ānnābi wa s-ātwānna ənta-da-dāḡ.»

41 Inn' aḡil iyyān daḡ: «Āmasex lab ənta-da-dāḡ.» Inn' aḡil wa iyyādān: «Ajān Āmasex Galila a mad-dd-ifəl?»

42 Wādden inn'-anāḡ əlkəttab n-Mässināḡ a-s: «Āmasex əzzurəyāt ta n-āmānokal Dawəd d-tadābayt-net Bātlehām ta s-kāla dāḡ-s-izzāḡ a dd-mad-izjār?» »

43 Tāzun tamətte dāḡ-təssəba n-ʕisa,

44 əttārān iyyād dāḡ-sān ad-t-ärməsān māšan, ikkā jere-sān, wār t-illa ere t-iḡasān.

45 ʔqqālān-dd ālgomitān n-ehān n-āmudd wa māqqārān, ənnān-asān imizārān n-kāl-tikutawen d-kāl-faris: «Mafāl wār t-dd-təlweyām?»

46 ʔnnān-asān ālgomitān: «Nākkāneḡ a nəwa-dāḡ, wār kāla nəslā i-āwadəm ijan mājrād irzan wa ija āhaləs-i-dāḡ.»

47 ʔnnān-asān kāl-faris: «Adiš kāwāneḡ-dāḡ, āšnāmāšrāy-kāwān?»

48 Meḡ ajān hannāyām dāḡ-nāḡ āmizār meḡ ere təla taggayt ta n-kāl-faris sār-s omanān?»

49 Ajān wār hənnəyām a-s wār sār-s omen aḡ āddināt wi n-ālžuhāl wāren əssen a ihān Āḡḡāwrāt.»

Irmäs Nikodem ašrut wa n-Ÿisa

⁵⁰ Iggäd-dd Nikodem wa n-u-faris s-käla dd-ädwännät i-Ÿisa s-ehäd, inn'-asän:

⁵¹ «Ajän äššäreŸa-nänäŸ isaqlam äwadem dat-ad-has-öslön äddinät, itwölmöd a-wa iŸšäd?»

⁵² Ænnän-as: «Ajän käyy-däŸ Galila a käy-töläät? Söfföyk Ÿas ölköttabän n-MässinäŸ, tömmaŸ tökkäsäd-dd däŸ-sän ännäbi dd-ifalän Galila.» [

⁵³ Darät mäjräd-wen-däŸ, hak äwadem ikk' ehän-net.

8

Tamädt ta s-ätwännä, tözna

¹ Odwa Ÿisa önta ehäd-wen tađayt ta n-ihöškan wi n-özzäytun.

² Äffäw Ÿas, oläs-dd uŸöl n-ehän n-ämudd wa mäqqārän, täddew-dd sär-s daŸ tamötte iket-net, äqqima, ad-tät-isayra.

³ Ewwäyän-dd älŸulam n-Ätṭäwrät d-käl-faris tamädt tättirmäsät däŸ-özzöna, össöbdädän-tät däŸ-ammäs n-älžämäŸät tözzar,

⁴ önnän i-Ÿisa: «ÄŸalim, ta-däŸ tamädt, a-s tät-dd-näŸdär, izinnöw-tät ähalös iyyän.

⁵ DäŸ-isälan n-tiđeđen-ti maden-ättärmäs däŸ-özzöna, inn'-anäŸ ännäbi Mosa däŸ-Ätṭäwrät a-s ad-tänät-näkf sämmäjori n-tihun. Ämära, nässistän-käy, ma tönned käyy däŸ-isälan-win-däŸ?»

⁶ Otasän älŸulam n-Ätṭäwrät d-käl-faris asöstan-net, wär tömmäŸän Ÿas ar i-äsaru fäl

t-össödlämän. Ænnän-as a-wen ƣas, äddunkät Ƴisa ad-ikattäb fäll-äkall s-assökäđ-net.

⁷ Äxwälän-t s-asəstan ƣas, idkäl-dd sār-sän asəwađ-net, inn'-asän: «Ijäret-tät dāƣ-wän wa s-kāla wār-ofa abäkkäđ s-tāhunt ta täzzarät.»

⁸ Äddunkät daƣ đarät-a-wen, ad-ikattäb fäll-äkall.

⁹ Æslän älyulam n-Ättäwrät d-käl-faris i-a-wa hasän-inna ƣas, əglän s-iyän-iyän, ƣur-wi wäššarnen har wi mäđroynen. Wār dd-äqqima dāƣ-edägg-ənnin-dāƣ ar Ƴisa, təbdad data-s tamäđt, dāƣ-ammās n-edägg wa s-kāla dāƣ-s ibdäd älžämäƣät.

¹⁰ Ibdäd-dd sār-s Ƴisa, inn'-as: «Tamäđt! Ma jän äddinät wi s-kāla kām-əttäfän? Ajän äbas kām-əsiwār äwadəm wäl' iyyän udlem?»

¹¹ Tənn'-as: «Äbo, Älyalim, äbas t-illa äwadəm wäl' iyyän.» Inn'-as Ƴisa daƣ: «Wār kām-össödlämäƣ näkk-dāƣ, ämāra, əgləw mäšan, wār tolesäd iji n-abäkkäđ.»]

Ƴisa a-s ännur n-äddunya

¹² Innä Ƴisa đarät-a-wen i-tamətte: «Näkk a-s ännur n-äddunya, ere-wa hi-ilkämän wār mad-irjəš dāƣ-tihay, änn-ak, ad-ijrəw ännur wa ihäkkän tämudre.»

¹³ Æggädän-dd käl-faris, ənnän-as: «Käyy ya tajäyhed fäll-iman-näk, a-wen-dāƣ daƣ a äsdätten a-s tajuhe-näk, bahu.»

¹⁴ Inn'-asän Ƴisa: «Kud-tajäyheƣ fäll-iman-in-dāƣ, näkk, tajuhe-nin, tädduuttät ed, əssanāƣ siha s-dd-heƣ, əssanāƣ daƣ siha s-häläƣ mäšan

kāwāneḍ, wār tössenäm siha s-dd-heḅ, wāla siha s-əkkeḅ.

¹⁵ Kāwāneḍ, tayette ta n-dägg-adəm a-s šarräḅäm äddinät, näkk wār t-illa ere šarräḅäḅ,

¹⁶ ḍarät-a-wen daḅ, näkk, kud-əšräḅäḅ äwadəm-däḅ, a-s mad-tasəm äššäreḅa-nin, i n-tidət fäl-a-s, wār t-jēḅ d-iman-in ḅas, oharäḅ-t d-Abba-nin i hi-dd-äšmašälän.

¹⁷ Wädden iktab däḅ-alämär-nāwän a-s tēgdäh tajuhe n-əssin äddinät i-asəḅbat n-härät.

¹⁸ Äywa, näkk leḅ sānatät tjuhawen, ämoosäḅ tajuhe fäll-iman-in, äjjəyh'-ahi daḅ Abba-i hi-dd-äšmašälän.»

¹⁹ Innä ḅisa a-wen ḅas, ənnän-as käl-faris: «Abba-näk-i-š, əndek diha t-illa?» Inn'-asän ḅisa: «Wār hi-təzzeyäm näkk wāla Abba-nin ed, ənnär hi-təzzayäm, təzzəyäm daḅ Abba-nin.»

²⁰ A-s ijä ḅisa mäjräd-wa-däḅ, isayra däḅ-ehän n-ämudd wa mäqqärän, edes i-əssendoqq wa däḅ-inass azrəf d-oräḅ wa təkkatän äddinät i-ehän n-ämudd wa mäqqärän mäšan, wār t-illa ere t-irmasän ed, älwäqq-net wār dd-iwwed härwa.

A-wa iqqäl ḅisa Älmasex

²¹ Inn'-asän ḅisa daḅ: «Təlcam däḅ-i tekle, tekle daḅ däḅ-mad-hi-təmmäḅäm mäšan, ad-tämmätäm däḅ-abäkkad-nāwän ed, edägg wa əkkeḅ, wār täddobem aggaḍ-net.»

²² Əslän käl-Älyähud i-a-wen ḅas, änmännän jer-iman-näsän: «Tordam a-s wädden a-s äbok ad-änḅ iman-net a-s ijän: «Edägg wa əkkeḅ, wār täddobem aggaḍ-net.» »

23 Inn'-asän Yisa: «Kăwăneḍ äddunya-i-dăḡ a kăwăn-lăt, năkk iŝənnawăn a hi-lănen, kăwăneḍ, təl'-iwăn äddunya-ta-dăḡ, a-s ija a-wen năkk, wăr hi-təla.

24 A-wen-dăḡ daḡ a făl hawăn-ənnex a-s ad-tämmätăm dăḡ-ibăkkadăn-năwăn ed, ijmăḍ-t äŝŝak a-s afăl wăr tomenăm a-s <Năkk a iḡlalăn>, ad-tämmätăm dăḡ-ibăkkadăn-năwăn.»

25 Ěnnăn-as: «Kăyy-ŝ, mi tămoosăḍ?» Inn'-asän Yisa: «Ămoosăḡ a-di-dăḡ s-ăru d-hawăn-ənnex: <Năkk aḡlalăḡ>.

26 Leḡ a äjjeen fälla-wăn ənnex, ill'-e daḡ uḍlem äjjeen kăwăn-ăswărăḡ măŝan, Wa hi-dd-ăŝmaŝălăn, ädduuttăt, wăr jənnex daḡ i-äddunya ar a-wa s-has-əsley har tăn-innă.»

27 Inn'-asän Yisa a-wen-dăḡ măŝan, wăr əfhemăn s-isălan n-Abba-net a hasăn-itajj.

28 Inn'-asän daḡ älwăqq-wen: «Afăl dd-osa aŝal wa d-tənhăyăm Ägg-ägg-adəm ämmiıḍkăl s-iŝənnawăn dăḡ-ammăs-năwăn, dihen, ad-təlmədăm a-s: <Năkk a iḡlalăn>, təlmədăm daḡ a-s wăr t-illa a tajjăḡ d-iman-nin, wăr jənnex ḡas ar a-wa hi-issăḡra Abba.

29 Ěnta-i hi-dd-ăŝmaŝălăn, idhal-ahi, wăr hi-oyya d-iman-in ḡas ed, ənta ḡas a-s tamaŝalăḡ erhet-net hărkuk.»

30 Orăw-dd măjrăḍ-wen-dăḡ ija Yisa, immun s-ăddinăt äjjootnen.

A-wa isadărfen ägg-adəm

31 Inna Yisa ḍarăt-a-wen i-kăl-Ălyăhud wi săr-s omănnen: «Afăl təkfăm iman-năwăn i-măjrăḍ-in, ad-tumasăm inəṭṭulab ətbatnen,

³² təzzəyäm tidət, səddärfət-käwän.»

³³ Ğnän-as: «Näkkäneḍ-š wädden əzzurəyät n-ännäbi Ibrahim a nämoos, wär käla hanäḡ-ikräš äwadəm wäl' iyyän ḡas, ənnär əmmək wa s-jänned ad-näddärf?»

³⁴ Inn'-asän Ƴisa: «Älleḡeḡ-awän s-tidət tädduuttet† a-s, e d t-illäm äwadəm itamašälän abäkkäḍ, äkkilät-as.

³⁵ Təssanäm a-s akli, wär-itəzzäḡ däḡ-ehän n-mässi-s härkuk mäšan, Rure-s n-mässi-s n-ehän ənta, ad-däḡ-s izzaḡ härkuk.

³⁶ Afäl käwän-äsdärfät Rure-s n-mässi-s n-ehän, ad-təjrəwäm iman-näwän.

³⁷ Ğssanäḡ a-s əzzurəyät n-ännäbi Ibrahim a tämoosäm mäšan, hakd a-wen-däḡ, tattäräm tenäḡe-nin fäl-a-s, wär-ijrew mäjräd-in edägg däḡ-ulhawän-näwän.

³⁸ Näkk, wär hawän-jənnəḡ ar a-wa ənhäyäḡ ḡur-Abba-nin ḡas, käwäneḍ daḡ, wär təjjəm ḡas ar a-wa s-təsläm ḡur-abba-näwän.»

³⁹ Äwwežäbän-as, ənnän-as: «Näkkäneḍ, ännäbi Ibrahim a-s abba-nänäḡ.» Inn'-asän Ƴisa: «Ğnnar ihäyawän n-ännäbi Ibrahim a tämoosäm, ikad-di, tämašäläm a-wa ämešäl

⁴⁰ mäšan ämära, käwäneḍ-da-däḡ, tattärnen tenäḡe-nin fäl-a-s innin ənnəḡ-awän tidət-ta s-əsleḡ ḡur-Mässinäḡ, täkunt šund-ten, wär tät-ija Ibrahim.

⁴¹ A-wen-däḡ a fäl hawän-janḡeḡ a-s käwäneḍ, ijitän n-abba-näwän ḡas, a tamašäläm.» Ğnän-as: «Näkkäneḍ ya, wädden ikzewän a nämoos, Abba iyyän a nəla, a t-ämoosän: Mässinäḡ.»

† **8:34 8:34** Däḡ-Tälyunanit: Amin, amin (S-tidət, tidət).

⁴² Inn'-asän Yisa: «Ennar ämoos Mässinäḡ Abba-nāwän, tärhəm-ahi ed ənta a dd-əzjaräḡ, ənta daḡ a dd-fäläḡ, wär dd-əgleḡ d-iman-in, ənta a hi-dd-äšmašalän.

⁴³ Ajän ma hawän-igdalän ad-təjrähäm a-wa hawän-janneḡ? Igdal-awän-t a-wa-däḡ s-tunjäyäm asjed i-mäjräd-in.

⁴⁴ Iblis a-s abba-nāwän, ənta a-s täqbaläm amišəl n-derhanän-net, ənta-i-s s-aläšäl däḡ-emäj n-iman, wär käla ibdäd fäll-tidət ed, tidət fäw a wär-issen. E-d imməjräd-däḡ, bahu ḡas a ijanna ed a-wen-däḡ a-s agna-net fäl-a-s, änəsbahu a ämoos, ənta daḡ a-s abba n-bahu.

⁴⁵ Näkk wär hi-təflesäm ed tidət a hawän-janneḡ.

⁴⁶ Əndek däḡ-wän ḡas wa äddoben ad-äjjäyh a-s käla ämešäläḡ abäkkad? Šamad tidət a hawän-janneḡ, adiš mafäl wär hi-fəlləsäm?

⁴⁷ Ere wa ila Mässinäḡ, asjed a itajj i-a-wa innä Mässinäḡ mäšan, käwäneḡ, wär tämoosäm aratan n-Mässinäḡ, a-wen-däḡ a fäl wär hi-səjidäm.»

Yisa Älmaseḡ, ojär ännäbi Ibrahim

⁴⁸ Äwwežabän-as käl-Älyähud, ənnän-as: «A-wa tidət-däḡ a-s nənna käyy u-Sämari a tämoosäd, ih'-ik alšin.»

⁴⁹ Inn'-asän Yisa: «Näkk lab, wär h'-iha alšin, semḡar ḡas a jeḡ Abba-nin, a-s ija a-wen käwäneḡ, tunjayäm s-asəḡar-in.

⁵⁰ Näkk, wär tətäräḡ ad-hi-səḡarän äddinät, ill'-e ere wa itattärän ad-hi-səḡaräm, ənta-endaḡ a käwän-madän-išräḡ.

51 Älleḡeḡ-awän s-tidət tädduuttet a-s ere iṭṭafän mäjräd-in, wär däḡ-s ilkem ad-inhay tamättant.»

52 Ğnnän-as käl-Älyähud: «Ḥur-ta-däḡ, ad-nəlmäd s-tidət-däḡ a-s ih'-ik alšin, ajän wädden Ibrahim hakd ännäbitän wi iyyädnen, төmmärtän-in tamättant, ḡas käyy, ma käy-äsihälän төнна n-a-s: «Ere iṭṭafän mäjräd-in, wär däḡ-s ilkem ad-inhay tamättant.»

53 Adiš käyy ija ḡur-k a-s tojărăd abba-nänäḡ Ibrahim d-ännäbitän wi iyyädnen ämmutnen? Ajän käyy, ma s-täḡeläd tämoosäd-t?»

54 Inn'-asän Ḥisa: «Ğnnar iman-in ḡas a timəlayḡ, wär-inəffəw a-wen härät, Abba-nin-i s-tənnäm Emäli-näwän a ämoos, ənta a hi-itiməlän.

55 Abba-nin-en, əzzayäḡ-t mäšan käwäned, wär t-təzzeyäm. Afäl hawän-ənnəḡ wär t-əzzeyäḡ, ad-umasäḡ änäsbaḡu dār-wän olähän. Ädduuttät a-s Abba-nin, əzzayäḡ-t, tamašaläḡ daḡ mäjräd-net.

56 Ännäbi Ibrahim daḡ-i s-jannem abba-näwän a ämoos, iddəwät däḡ-derhan n-ahänay n-ašäl wa n-tiwit-in, inhäy-t ḡas, ija tedäwit təmdat.»

57 Innä Ḥisa a-wen ḡas, ənnän-as käl-Älyähud: «Käyy, wär led wäla-däḡ səmmosät timərwen n-awätay, uhən-däḡ, häläd ad-tənnəd, tənhayäd ännäbi Ibrahim?»

58 Inn'-asän Ḥisa: «Älleḡeḡ-awän s-tidət tädduuttet a-s dat-tiwit n-Ibrahim, əlleḡ-t ed <Näkk äḡlaläḡ.> »

59 Ğdkälän älwäqq-wen-däḡ tihun i-ad-t-əjrən sār-snät mäšan, iffär-asän däḡ-tamətte, izjār

ehän n-ämudd wa mäqqärän.

9

Äzozäy Yisa emödderyəl iyyän

¹ Ašäl iyyän, irjaš Yisa a-s inhäy ähaləs s-a-s dd-iwa-däx därçal.

² Əssəstänän-t inəttulab-net, ənnän-as: «Älyalim,[†] ak ähaləs-i-däx s-ad-dd-iwa-däx därçal, ənta a ämešälän abäkkad wa has-ämoosän əssəbab n-täddäryält meχ imärawän-net?»

³ Äwwežäb-asän, inn'-asän: «Wär-ofa abäkkad ənta wäla imärawän-net, änn-ak Mässinäχ a irhan ad-äj älyib-net əssəbab s-issəkna tärna-net.

⁴ Iwar-anäχ ad-näxdəm tärha n-Wa hi-dd-äšmašälän härwa ij' ašäl fäl-a-s, imal-dd ehäd s-wär t-illa ere äddoben älxidmät däx-s.

⁵ A əkkeχ heχ äddunya-ta-däx, näkk a-s ännur-net.»

⁶ Innä Yisa a-wen χas, ässotäf fäll-äkall, issəbdäj tälaxt s-tisutaf-net təzzar, isəls'-et tiṭṭawen n-emödderyəl.

⁷ Inn'-as darät-a-wen: «Egləw, ärdəb däχ-täsahaχt n-aman ta n-Silwi.» (Silwi, älmäχna-net: änämmašul.) Iglä, irdäb-dd, a-s dd-iqqäl, ihannäy.

⁸ Ənhäyän-t änhärajän-net d-äddinät wi t-əzzäynen härwa därçal χas, änmännän: «Ka! Ajän wädden a-wa emödderyəl wa itaxäy men däχ-täšarrit itattär takute däχ-äddinät?»

[†] 9:2 9:2 Rəbbi däχ-Yäbranəyya.

⁹ Inn' aḡil-nāsän: «Ewällä ənta.» Inn' aḡil wa iyyädän: «Aa fäw! Wädden ənta, milhaw ḡas a jan.» Iggäd-dd emədderḡel iman-net älwäqq-wen, inn'-asän: «A-wa näkk wədi-däḡ təzzäyäm.»

¹⁰ Ənnän-as: «Əndek əmmək wa s-ämeränät tiṭṭawen-näk?»

¹¹ Inn'-asän emədderḡel: «Ähaləs wa s-isəm-net ḡisa a issəbdäjän tələḡt, issələs'-et tiṭṭawen-in təzzar, inn'-ahi: <Əgləw, ärdəb dəḡ-täsahəḡt n-aman ta n-Silwi>. Əkkeḡ təsahəḡt n-aman älwäqq-wen-däḡ, ärdäbäḡ-dd dəḡ-s.»

¹² Ənnän-as äddinät: «Wa käy-äzozäyän-š, ma ija?» Inn'-asän ähaləs: «Wär-əssenäḡ.»

Asəstan wa jän käl-faris i-emədderḡel wa izzäyän

¹³ Əmdän äddinät d-asəstan n-ähaləs wa s-käla dərḡal ḡas, äwwäyän-t s-käl-faris

¹⁴ fäl-a-s, ašäl n-əssəbət-i n-täsonfat a dəḡ-issəbdäj ḡisa tələḡt-ta äswär tiṭṭawen-net, or'-enät.

¹⁵ Osä-dd emədderḡel wa izzäyän käl-faris ḡas, əssəstänän-t d-əmmək wa s-izzäy. Inn'-asän: «Äswär ḡisa tələḡt tiṭṭawen-in, ärdäbäḡ, ənhäyäḡ.»

¹⁶ Inn' aḡil n-käl-faris iyyän: «Wa-däḡ ḡisa, wär-ämoos änəmmašul n-Mässinäḡ ed ənnar t-ämoos, isəḡär ašäl wa n-əssəbət-i n-täsonfat.» Inn' aḡil-nāsän wa iyyädän: «Ajän anəsbäkkad wär-idhel Mässinäḡ, äddoobät amišəl n-ijitän wi itäj ähaləs-i-däḡ?» Əqqälän-dd ḡas ämiḡännänän jer-iman-nāsän dihen-däḡ.

17 Ǝssəstānān ɖarāt-a-wen emədderyəl wa izzāyān, ənnān-as: «Kāyy ma tənned, ma iqqal āhaləs wa orān tiṭṭawen-nāk?» Inn'-asān: «Ūn ānnābi a āmoos.»

18 Äyrān-dd imizārān n-kāl-Älyāhud ɖarāt-a-wen imārawān n-emədderyəl fāl-a-s, wār-əflesān a-s kāla dāryal, izzāy.

19 Osān-dd imārawān n-āhaləs ɣas, əssəstānān-tān: «Ak rure-wān wa s-tənnām a-s dd-iwa-dāɣ, dāryal, ənta-da-dāɣ meɣ? Kunta daɣ a dd-iwa-dāɣ, dāryal, əndek əmmək wa s-āmāra, ihannāy?»

20 Ǝnnān-asān imārawān n-āhaləs: «Tidət lab a-s a-wa rure-nāɣ, wār t-ih' əššāk daɣ s-a-s dd-iwa-dāɣ, dāryal

21 māšan, dāɣ-isālan n-əmmək wa s-ihannāy āmāra d-ere wa orān tiṭṭawen-net, a-wen, wār hanāɣ-ha tijya-net, səstənāt-t ənta iman-net ed āhaləs iššamān a āmoos, äddoobāt ad-āj isālan n-a-wa t-iqqālān.»

22 Tuksəɖa n-imizārān n-kāl-Älyāhud a təswānnāt imārawān-net a-wen fāl-a-s, əssiibdādān imizārān n-kāl-Älyāhud s-e d t-illām ere irɖān a-s: «ɣisa a-s Älmasex», ad-has-əgdəlān uješ n-ehān n-äddin wa n-kāl-Älyāhud.

23 Dāɣ-tuksəɖa n-a-wen-dāɣ a fāl ənnān imārawān n-āhaləs: «Ähaləs iššamān a āmoos, səstənāt-t ənta iman-net.»

24 Olāsān-dd kāl-faris teɣäre n-āhaləs wa s-kāla dāryal, ənnān-as: «Änn tidət i-Mässināɣ fāl-a-s, nəssan a-s wa kāy-əzozāyān, anāsbākkaɖ a āmoos.»

²⁵ Inn'-asän: «Kunta anäsbäkkad a ämoos wäla, wär-essenäx; härät iyyän a əssanäx: käla därçaläx, ämära, hannäyäx.»

²⁶ Ənnän-as dax: «Läxät-anäx ma hak-ija? Əndek əmmək wa s-ora tiṭṭawen-näk?»

²⁷ Inn'-asän ähaləs: «Wädden äru d-hawän-tän-ənnex mäšan, wär hi-täsjadäm xas, mafäl tärham dax ad-hawän däx-s äqqələx? Adiš a tärham ad-tumasäm käwäneḍ-däx härät däx-inəṭṭulab-net?»

²⁸ Inn'-asän a-wen xas, ad-t-gaggärän, jannen-as: «Aa təfəw! Käyy xas a-s änəṭṭalib-net, näkkäneḍ, inəṭṭulab n-ännäbi Mosa a nämoos,

²⁹ nəssan dax a-s ännäbi Mosa imməjräd-as Mässinäx mäšan, wa-hi, wär nəssen e-s dd-iha.»

³⁰ Inn'-asän emədderxəl wa izzäyän: «Adiš täqqän n-eḡäf təja härwa ed, ənta a orän tiṭṭawen-in mäšan hakd a-wen, wär təssenäm e-s dd-iha.»

³¹ Inn'-asän dax: «Nəssan a-s Mässinäx, wär ixəbbəl tittar n-inäsbäkkadän mäšan, ixabbäl tittar n-e d t-illäm ere t-äksuḍän, itamašalän erhet-net.

³² Nəssan dax a-s wär käla ätwäsla äwadəm oran tiṭṭawen n-ere s-a-s dd-iwa-däx, därçal.

³³ Xas, ähaləs-i-däx, ənnär wädden Mässinäx a dd-ifal, wär-ikərrəš tədabit n-a-wa itäjj.»

³⁴ Issəmdä emədderxəl wa izzäyän d-mäjräd xas, ənnän-as: «Ewad! Käyy iket-näk abäkkad a däx-wed, ma käy-äsihälän älxuṭbät wa hanäx-täjjäd?» Äššewäjän sār-s ḍarät-a-wen har t-əzzəzjārän ehän n-äddin wa hän.

Käl-faris, wär-əzleyän d-iməddorçal

³⁵ Islä Yisa a-s əkkäsän-t dāx-ehän n-äddin-näsän ɣas, os'-e-hi-dd, inn'-as: «Ak käyy tomanäd s-Ägg-ägg-adəm meɣ?»

³⁶ Inn'-as ähaləs wa s-käla dārɣal: «Äɣalim, säkən-ahi-t ɣas ad-sär-s amənäɣ.»

³⁷ Inn'-as Yisa: «Tənhäyäd-t ed, ənta-da-däɣ hak-ämmijrädän ämära-däɣ.»

³⁸ Inn'-as ähaləs älwäqq-wen: «Äɣalim, omanäɣ sär-k.» Irkäɣ dat-Yisa ässaɣät-wen-däɣ.

³⁹ Innä Yisa i-tamətəte ɗarät-a-wen: «Näkk, oseɣ-dd i-ad-əbɗəwäɣ jer-äddinät: wi dārɣalnen, ad-ənhəyän, wi hannäyänen, ad-äddārɣälän.»

⁴⁰ Əslän käl-faris wi t-əllänen ɣur-Yisa i-mäjräd-wen-däɣ ija ɣas, ənnän-as: «Ajän näkkäneɗ-däɣ iməddorɣal a nämoos?»

⁴¹ Inn'-asän Yisa: «Ennär tämoosäm iməddorɣal, wär käwän-itəgger uɗlem wa n-abäkkad mäšan, dāx-təssəba n-a-di-däɣ s-tənnäm hannäyäm, a fäl, tumast-näwän i-inäsbäkkadän, tətbat.»

10

Tangalt ta n-a-s Yisa a-s Amäɗan n-iman

¹ Inn'-asän Yisa ɗarät-a-wen: «Älleɣeɣ-awän s-tidət tädduuttet† a-s e d t-illäm ere dd-ijjašan afäraj n-arəzzej s-ašrut säl wa n-emmet, emäkräɗ d-änarkab a ämoos,

² mäšan, amäɗan n-tihatten ənta, emm n-afäraj a-s dd-itajjáš fäll-tihatten-net.

† **10:1 10:1** Däɣ-Tälyunanit: Amin, amin (S-tidət, tidət).

³ E-d tänät-dd-osa, ad-has-arr änaɣlaf-näsnät s-ehäd emm n-afäraj. Afäl has-ämera afäraj har dd-ijjäs fölla-snät, ad-öslönät tihatten-net i-emäslī-net, iyär hak iyyät s-isəm-net təzzar, izəzjār-tänät,

⁴ afäl tänät-dd-izzəzjār iket-näsnät, ad-iməl data-snät, əlkəmnät-as ed, əzzaynät emäslī-net.

⁵ Amādan-en, tihatten-net, wär mad-əlkəmnät i-amäjar, änn-ak, ad-has-əffoqqətnät ed, wär-əzzeynät emäslī-net.»

⁶ Äsnäfäqq'-asän ʔisa isälan-win-däɣ mäšan, indär-asän ad-əfhəmän a däɣ-hasän-ässewäl.

ʔisa a-s amādan wa oläɣän

⁷ Oläs daɣ, inn'-asän: «Älleɣəɣ-awän s-tidət tädduuttet a-s näkk a-s emm n-afäraj wa s-tajjäsnet tihatten,

⁸ äddinät-wi hi-dd-äzzarnen, imäkrädän d-inarkabän a ämoosän iket-däɣ-näsän, wär hasän-äsjadnät tihatten;

⁹ näkk a-s emm n-afäraj, ere sär-i t-dd-ijjäsän-däɣ, ad-ixləs, ad-igilləw, itaqqäl-dd, ijarrāw daɣ amādon.

¹⁰ Emäkräd ənta, wär dd-itis ar i-tikra d-aɣäras d-ahälak; näkk, oseɣ-dd i-ad-əjrəwän dägg-adəm tämudre, əjrəwän-tät daɣ s-tänoflayt.

¹¹ Näkk a-s amādan wa oläɣän, amādan wa oläɣän iman-net a ihakk i-ad-äɣləsnät tihatten-net

¹² mäšan, ere wa s-tefert a fäl ixdam, wär-ämoos amādan oläɣän, wädden ənta a-s mässi-s

n-tihatten. A-wen-däx a-s, afäl inhäy taḡəssit dd-malät, ad-əjawäd, äyy tihatten d-iman-näsnät, təjjəš-tänät taḡəssit, šəmməhəš-tänät,

¹³ ed issan a-s tefert ḡas a fäl ixdam, wär-äkkul a jänät tihatten.

¹⁴ Näkk a-s amädan wa oläḡän, əzzayäḡ tihatten-in, əzzaynät-ahi daḡ.

¹⁵ Əzzaynät-ahi s-əmmək wa s-əzzayäḡ Abba, izzay-ahi daḡ ənta. Hakkäḡ-tänät tämudre-nin,

¹⁶ leḡ härwä tihatten äjjootnen wären ha afäraj-wa-däḡ, iwar-ahi s-ad-tänät-dd-əwətäḡ, əslənät əntänätə-däḡ i-eməsli-nin, təməl-t tiyyät tahrut idan iyyän n-amädan.

¹⁷ Abba ənta, irh'-ahi ed hakkäḡ tämudre-nin, siḡuläḡ-tät-dd iman-in.

¹⁸ Wär t-illa ere äddoben ad-däḡ-i ahäḡ tämudre-nin, hakkäḡ-tät d-iman-in, siḡuläḡ-tät-dd däḡ d-iman-in, ənta-den-däḡ turhajät ta əjräwäḡ ḡur-Abba-nin.»

¹⁹ Əslän käl-Älyähud i-mäjräd-wen-däḡ ija Ḳisa ḡas, tənkar tamḡənnant daḡ jere-sän.

²⁰ Əggädän-dd däḡ-sän iyyäd äjjootnen, ad-jannen: «Ak mafäl täsijädäm i-ere ih' alšin, äbbuddäl?»

²¹ Jannen wi iyyädnen: «Mäjräd wa dd-izjarän emm n-ähaləs-i-däḡ, wädden mäjräd s-äddoobät ad-t-äj ere ih' alšin, nəssan daḡ a-s ere ih' alšin, wär-äddoobät ad-arr tiṭṭawen n-iməddorḡal.»

Unjäyän käl-Älyähud äqbälän Ḳisa

²² Äzzäman-en, ijä ämudd n-tasäktot n-ašəšdaj wa jän käl-Älyähud i-ehän n-ämudd wa mäqqärän ihän Yärussälam s-tajrəst,

23 irjāš Ƴisa dāḡ-ehān n-āmudd wa māqqārān dāḡ-tele n-edāgg wa s-itawānna: Wa n-Sulāyman,

24 əžžəmmāḡān-dd fälla-s käl-Ālyāhud, ənnān-as: «Ēkkəs-anāḡ dāḡ-tayḡdārt, kunta kāyy a-s Ālmaseḡ, ānn'-anāḡ-tān, ma s-tāqqalād, təkəkəsād-anāḡ dāḡ-tāqqān n-eḡāf-ta-dāḡ?»

25 Āwwežāb-ašān, inn'-ašān: «Wādden, əllāḡeḡ-awān māšan, tunjāyām tomānām sār-i, ənhəywāt ḡas ijitān wi s-hi-ikfa Abba-nin turhajāt n-amišəl-nāsān, əntāneḡ-en-dāḡ a tajāyhanen fäll-i.

26 Kāwāneḡ, wār sār-i tomenām fāl-a-s wār tāḡḡdinām dāḡ-āḡḡdināt wi hānen tahrut ta n-inalkimān-in.

27 Tahrut ta leḡ n-inalkimān-in, sallān i-emāslin, əzzayāḡ-tān, əlkamān-ahi daḡ.

28 Wi leḡ, hakkāḡ-tān tāmudre ta tāḡlālāt, wār dāḡ-sān təlkeḡ tamāttant, wār tān-mad-ahāḡ daḡ āwadəm wāl' iyyān dāḡ-āfuss-in

29 fāl-a-s, Abba-nin-i hi-tān-ikfān, wār t-illa ere s-wādden ill'-e jənnəj-s, wār t-illa daḡ ere āḡḡooben ukəs-nāsān dāḡ-āfuss-net.

30 Nākk d-Abba, iyyān hārāt, wār nəžley.»

31 Innā Ƴisa a-wen ḡas, obārān-dd sār-s tihun i-ad-t-əkḡən sāmājori-nāsnāt māšan, inn'-ašān:

32 «Lāḡātāt-ahi ḡas dāḡ-ijitān n-Abba wi-dāḡ āḡuskātneḡ jeḡ jere-wān, əndeḡ dāḡ-sān wa ilān āḡḡālil n-tenāḡe ta s-tārham ad-hi-tāt-təjəm?»

33 Ēnnān-as käl-Ālyāhud: «Wādden dāḡ-təssəba n-iji āḡusken jed a fāl kāy-nəhakk tamāttant, ānn-ak dāḡ-təssəba n-asəkkufar wa

jed ed käyy-i n-ägg-adəm, täsisägdähäd iman-näk d-Mässinäḡ.»

³⁴ Inn'-asän Ḣisa: «Ajän wädden iktab dāḡ-Äṭṭawrät-nāwän a-s, Mässinäḡ, innä:

‹Äxläkäḡ-dd dāgg-adəm dāḡ-milhaw-in›.

³⁵ Wädden, nəssan daḡ a-s mäjräd n-Mässinäḡ, iḡlal, wär-itəmöttəy. Ḣas kunta äddinät wi əlkämnen i-mäjräd-en, ixläk-tän-dd dāḡ-milhaw-net,

³⁶ mafäl jannem äskafäräḡ, näkk-i äsnäfrän Abba, äšmašäl-ahi-dd s-äddunya fäl-a-s in-nin ənneḡ-awän: ‹Näkk Rure-s n-Mässinäḡ a ämoosäḡ.›

³⁷ Ämära kunta ḡas a-wa tamašaläḡ wädden Abba-nin a dd-ifal, adiš wär sār-i tomenäm mäšan,

³⁸ kunta a-wa tamašaläḡ Abba-nin a dd-ifal, adiš kud-dāḡ wär sār-i tomenäm näkk, ämənät s-timašalen-en-dāḡ i-ad-təlmədäm, səbbuyənäm a-s näkk, ärtayäḡ d-Abba, irtay dār-i daḡ ənta, heeḡ-t, ih'-ahi.»

³⁹ Äsmägäggäyän daḡ käl-Älyähud dāḡ-arəmas-net mäšan, äzläbbät-dd Ḣisa dāḡ-sän, iglä.

⁴⁰ Ikka ḡarät-a-wen asälim wa n-emäynäj n-ejänš wa n-Ḣurdəni, dāḡ-edägg wa s-käla dāḡ-s isalmaḡ Exya äddinät, izzäḡ dihen-dāḡ.

⁴¹ Əkkän-t-dd äddinät äjjootnen, jannänen: «Exya, wär-ija tākunt wäl' iyyät mäšan, a-wa inna fäll-ähaləs-i-dāḡ, itbat iket-net.»

⁴² Omänän äddinät äjjootnen s-Ḣisa dāḡ-edägg-en-dāḡ.

11

Issenkär-dd Yisa Lazar jer-inəmmuttan

¹ Äzzäman-wen-däx ad-ärhin Lazar wa n-taxrəmt ta n-Bitanya n-änḡa-s n-Marta d-Märyäma

² ta s-käla tössənyäl adutän fäll-iḡarän n-Ḣisa tözzar, ad-tän-timəs s-tišəkkaḡ-net. Ənta-i-däx a-s ämära, ärhiin äḡḡa-s, Lazar.

³ Ärhin ḡas, ässawäynät šätma-s ämašal s-Ḣisa, ənnänät-as: «Äḡalim, äss-dd, emärh-näk Lazar ärhiin.»

⁴ Iwwäḡ-dd ämašal Ḣisa ḡas, innä: «Turhəna ta tärmäsät Lazar, wädden ənta a t-madät-tawəy s-älaxärät, turhəna-net ta-däx a madät-tumas əssəbab fäl ätwäsämḡär Mässinäx, itwəsəḡär daḡ Rure-s.»

⁵ Tärha ta ija Ḣisa i-Lazar, ənta daḡ a ija i-Marta d-wälätma-s Märyäma.

⁶ Əjjäšan isälan n-turhəna n-Lazar Ḣisa mäšan, ässakäy däx-edägg-ənnin-däx əssin išilan tözzar,

⁷ innä i-inəṭṭulab-net: «Äqqəlät-anäx Älyähudəyät.»

⁸ Ənnän-as inəṭṭulab-net: «Äḡalim, ajän wädden a äynayän tattärän käl-Älyähud, ad-käy-əkfen sämmäjori n-tihun däx-teje-ten-däx, ḡas ma däx-s taqqaläd?»

⁹ Inn'-asän Ḣisa: «Ajän wädden märaw ässaḡätän d-əssin a hanen ašäl? Ere irjašan härwa ijä ašäl, wär mad-äjjärtäqqəl fäl-a-s ihannäy data-s

10 māšan, āwadəm irjašan s-ehād, ad-
 äjjärtäqqäl ed irjaš dāḡ-tihay.»

11 Ija ʿİsa mājrad-wen-dāḡ ḡas, inn'-asān:
 «Emārh-nānāḡ Lazar, iṭtas māšan, əgley i-ad-t-
 dd-sənkārāḡ.»

12 Ənnān-as inəṭṭulab-net: «Älyalim, adiš
 kunta eḡəs ḡas a ija, ill'-e äṭṭāma n-ad-izzəy.»

13 Mājrad wa hasān-ija, ij'-asān-t i-ad-tān-
 isəlməd a-s Lazar āba-t māšan, əbdadān
 ənniyātān-nāsān fäll-eḡəs wa n-ere ilḡad eḡəs.

14 Ij'-asān ʿİsa ḡarāt-a-wen mājrad s-
 äddooben afāham-neṭ, inn'-asān: «Əlmədāt
 a-s Lazar ya āba-t, māšan,

15 äddiwey dāḡ-təssəba-nāwān ed a-s ārhin,
 wār ḡur-s t-əlley, ätiwatās a-wen i-ad-sār-i
 tamənām; āmāra, ənkārāt, äkkāt-anāḡ-t.»

16 Iggād-dd Tomi wa s-itawānna Didim, a-
 wen älmāḡna-net: ekne, innä i-inəṭṭulab wi
 iyyādnen: «Äḡlāt-anāḡ nākkāneḡ-dāḡ i-ad-
 nahār d-älyalim-nānāḡ tamättant.»

ʿİsa Älmasex, isidur

17 A-s hin-osa ʿİsa Bitanya, ila Lazar əkkoḡ
 išilan dāḡ-azəkka.

18 Bitanya-i dāḡ-t-āba, wār jere-s t-illa d-
 Yārussālam ar kāraḡ kelumetārān.

19 Āba Lazar ḡas, osān-dd käl-Älyāhud
 äjjootnen Marta d-Māryāma, ad-sasmaḡān
 ulhawān-nāsnāt.

20 Təsla Marta a-s imal-dd ʿİsa ḡas, təlkaḡ-as,
 a-s ija a-wen Māryāma ənta, təqqima-hin ḡur-
 ehān.

21 Tämموqqäs d-Ûisa ȝas, tønn'-as: «ÄĶalim, əssanäȝ a-s ənnär telled diha-däȝ, wär-itiba äŋŋa-ȝ.

22 Mäšan hakd a-wen-däȝ, əssanäȝ a-s käyy a tättäräd, däȝ-Mässinäȝ-däȝ, ad-hak-t-äkf.»

23 Inn'-as Ûisa: «Äŋŋa-m a dd-inkär däȝ-tamättant.»

24 Tønn'-as Marta: «Əssanäȝ lab s-ad-dd-inkär däȝ-tamättant ašäl wa ilkämän.»

25 Inn'-as Ûisa: «Näkk a-s Wa dd-isänkarän däȝ-tamättant, näkk a ihakkän tämudre, ere sär-i omänän-däȝ, ad-iddar härkuk kud-däȝ ämmut,

26 ere iddarän daȝ har sär-i omän, wär däȝ-s tøkem tamättant fäw. Ak kämm Marta, təflasäd a-wen meȝ?»

27 Tønn'-as Marta: «Ëyya ÄĶalim, omanäȝ a-s käyy a-s Älmasex wa n-Rure-s n-Mässinäȝ s-ätwänna ilkam ad-dd-ass äddunya.»

Issänyäl Ûisa imeŧŧawän däȝ-təssəba n-Lazar

28 Təja Marta mäjräd-wen-däȝ ȝas, təglä, tökkäs-dd wälätma-s s-takše, tønn'-as: «ÄĶalim ya, osä-dd, inn'-am ad-t-in-tasəd.»

29 Təsla Märyäma i-a-wen ȝas, təggäd ässaȝät-wen-däȝ, tökkä Ûisa.

30 A-s itäjj a-wen-däȝ, wär dd-ijješ Ûisa aȝrəm härwa, ih' edägg-wənnin-däȝ däȝ-där-s tämmoqqäs Marta,

31 əllan-t daȝ imänokalän n-käl-Älyähud iyyäd ȝur-Märyäma däȝ-ehän, sasmađän ulh-net.

Ənhäyän-tät a-s təbdäd šik, təzjär ƣas, əlkämän-as ed ija ƣur-sän a-s Lazar a təkka i-ad-tälh fäll-azəkka-net.

³² Təwwäḍ-in Märyäma diha t-illa Ƴisa, tənähäy-t ƣas, tärkäƣ-as, tənn'-as: «Emäli, əssanäƣ a-s ənnär telled diha-däƣ, wär-itiba äŋŋa-ƣ.»

³³ İnhäy-tät Ƴisa hall ənta d-wi dār-s äddewnen, ƣas, äsnin, əkmän-t iman-net,

³⁴ inn'-asän: «Säknät-ahi azəkka wa däƣ-jäm Lazar.» Ənnän-as: «Əyyäw, ənhöy-t.» İnhäy-t ƣas,

³⁵ ilhä Ƴisa.

³⁶ Ənnän iyyäḍ däƣ-imänokalän n-käl-Älyähud: «Təmyäre n-tärha ij'-et i-Lazar»,

³⁷ ənnän wi iyyäḍnen: «Ənta-i orän tiṭṭawen n-emədderƣəl, indär-as ad-igdəl i-Lazar tamättant?»

İssənkär-dd Ƴisa Lazar jer-inəmmuttan

³⁸ Oläsän-t iman-net təkma, iglä ḍarät-a-wen, ikk' azəkka wa iha Lazar iƣäšän däƣ-esəwəl, ihar s-tähunt mäqoorät.

³⁹ Osä-dd Ƴisa azəkka ƣas, innä i-äddinät: «Əkkəsät-in tähunt ta härät azəkka.» Təggäḍ-dd Marta ta n-wälät ma-s n-enəmmettən ässaƣät-wen, tənna i-Ƴisa: «Älyalim, Lazar ya äru d-irkäh, ašäl-net wa s-əkkoz a-wa ih' azəkka.»

⁴⁰ Inn'-as Ƴisa: «Ajän wädden Marta äru d-ham-ənney a-s afäl sār-i tomänäd, ad-tənhöyäd tärna n-Mässinäƣ?»

⁴¹ Əkkäsän-in äddinät tähunt fäll-emm n-azəkka ƣas, äjozäy Ƴisa išənnawän, innä:

«Abba, ämmoyäx-ak aḡäbal wa jed a-wa däx-k öttäräx,

⁴² əssanäx day a-s ḡabbäläd tittar-in härkuk mäšan, ämmijrädäx-ak ämära däx-təssəba n-älžämaḡät-wa-däx ibdädän, däx-təssəba n-ad-amənän äddinät a-s käyy a hi-dd-äšmašälän.»

⁴³ Innä ḡisa a-wen ḡas, idkäl emäsli-net, innä: «Lazar, əzjār-dd!»

⁴⁴ Izjār-dd Lazar azəkka, äqqanän ifassän-net d-iḡarän-net s-isəssora, ilsä ekäršäy idəm-net. Inn'-asän ḡisa älwäqq-wen: «Arät-t, təbḡəwäm-t d-ikäršäyän-wi-däx ittäl, təyyəm-t ad-igləw.»

*Äswärän imizärän n-käl-Älyähud udlem ḡisa
(Mätti 26:1-5; Marḡəs 14:1-2; Luḡa 22:1-2)*

⁴⁵ Osän-dd käl-Älyähud äjjootnen, ənhäyän a-wa ija ḡisa ḡur-Märyäma ḡas, omänän sär-s

⁴⁶ mäšan, əglän iyyäd däx-sän, osän käl-faris, əlläḡen-asän a-wa ija ḡisa.

⁴⁷ Əžžəmmäḡän-dd imänokalän n-käl-tikutawen d-käl-faris d-älžämaḡät wa n-käl-Sinhidrin-i[†] iḡattäsän äššäreḡa, änmännän: «Əndek äddäbara? Wa äwadəm, əjjətän fällanäx ijitän-net wi ässuksädnen!

⁴⁸ Əlmədät a-s afäl t-noyya s-əmmək-wa-däx, ad-sär-s amənän äddinät iket-näsän. Afäl ämoos a-wen a ijan, ad-ärzən käl-Roma-i hanäx-äsitäḡmärnen ehän n-ämudd-nänäx wa šaddijän, ättäḡtäḡän äkall-nänäx.»

[†] 11:47 11:47 A-wa älzämaḡät n-inušämän d-imizärän n-käl-Işrayil wa itirən äššäreḡa, əntäneḡ a-s älcəllitän, osəḡän day tamətte d-əlxəkum d-äddin.

49 Iggäd-dd dāḡ-sän Qayäfi s-ənta a äminakälän fäll-käl-tikutawen awätay-wen-dāḡ, innä: «Ijmaḍ-t äššäk a-s wär t-illa a tøjrahäm iket-dāḡ-nāwän,

50 ajän wär hönneyäm a-s uf'-awän, ad-ämmät äwadəm iyyän dāḡ-tössəba n-tamətte uhən ad-tämmät tamətte iket-net.»

51 Mäjräd-wen-dāḡ ija Qayäf, wädden a dd-ifalän tayətte-net mäšan, šamad ənta a äminakälän fäll-käl-tikutawen awätay-wen-dāḡ, ikf'-e Mässinäḡ mäjräd hin-ässawäḍ tamətte n-a-s ilkam ad-ämmät ʔisa, dāḡ-tössəba n-tamətte ta n-Işrayil iket-net.

52 Təzzar daḡ wädden käl-Işrayil ḡas a-s mad-ämmät, ad-ämmät i-ad-dd-isədəw aratan n-Mässinäḡ wi əmmähäşnen jer-ikallän, umasän tiyyät taḡəssa.

53 Äxtäsän ḡur-aşäl-wen-dāḡ n-a-s wär-e sunfən fäw wär jen iman-net.

54 Ixtäf ənta-dāḡ ḡur-aşäl-wen-dāḡ i-räjjoş dāḡ-edägg t-hannäyän käl-Älyähud. Ifäl äkall-wen-dāḡ hän, ikkä teje ta tohäzät tanəzruft, izzäḡ ənta d-inəṭṭulab-net dāḡ-aḡrəm s-isəm-net Ifyahim.

55 Ohäz-dd ämudd n-käl-Älyähud wa n-Faşka ḡas, ähhujjäjän-dd äddinät äjjootnen s-Yärussälam i-ad-şəşdəjän iman-näsän dat-ämudd-en-dāḡ,

56 ad-tammäḡän iməhhujjaj iket-näsän i-ʔisa, tinmənnin jer-iman-näsän dāḡ-ehän n-ämudd wa mäqqārän: «Ak, tordam a-s ihäl a dd-äkk ämudd meḡ?»

⁵⁷ A-s jännen a-wen-däx, omarän imänokalän n-käl-tikutawen d-käl-faris s-ere ilmädän diha t-illa Yisa iket-net, isäxdäret-t i-ad-ättärmäs.

12

Tössänxäl Märyäma adutän fäll-Yisa (Mätti 26:6-13; Marqəs 14:3-9)

¹ Ašäl wa s-sädis dat-ämudd wa n-Faşka, ikkä Yisa tayrəmt ta n-Bitanya däx-izzäx Lazar wa dd-issenkär jer-inəmmuttan.

² Tössəskär-dd Marta imənsiwän dat-Yisa, äniḡäyma d-Lazar d-iməjarän wi iyyädnen.

³ Tədkäl Märyäma ɗarät-a-wen täzune n-litär n-adutän lanen älqim wär-iqquer härät, ad-tän-sanxal fäll-iɗarän n-Yisa, timəs-tän s-tišəkkaɗ-net. Äbḡänxälän adutän däx-ehän-ənnin-däx iket-net.

⁴ Iggäd-dd iyyän däx-inəttulab n-Yisa wa s-isəm-net Yähudəs wa n-Isxaryut-i t-e-isəssäxdärän, innä:

⁵ «Mafäl adutän-wi-däx wär hin-ənšen kərəɗät timaɗ n-ərriyal n-azrəf ämoosnen takute i-tiläqqiwen.»

⁶ Innä a-wen wädden däx-a-s innin ozar däx-a əjrəwnät tiläqqiwen, änn-ak fäl-a-s innin emäkräɗ a ämoos, ənta a-s änazraf n-taggayt ta n-inalkimän n-Yisa, a ätwäjjän däx-əssəndoqq wa n-azrəf-däx, ad-där-s in-išləy.

⁷ Inn'-asän Yisa: «Äkfät-tät älyafyät, a-wa təja, təj'-e däx-tössəba n-ašäl wa d-mad-əjjəšäx azəkka.

⁸ Tiläqqiwen ya, ɔllanät ɣur-wän härkuk mašan näkk, ilkam ad-käwän-äfläx.»

Utär n-iji n-iman n-Lazar

⁹ Ǝslän käl-Älyähud äjjootnen a-s iha Ƴisa taɣrəmt ta n-Bitanya ɣas, fälän-dd Yärussälam, ɔkkän-t-dd mašan, wadden ɔnta ɣas a-s otasän ahänay-net, ɔrhan daɣ, ad-ɔnhöyän Lazar wa dd-issənkar jer-inəmmuttan,

¹⁰ äɣtäsan imänokalän n-käl-tikutawen s-ad-ɔjən iman n-Lazar ɔnta-däɣ

¹¹ ed hannäyän a-s, däɣ-tössəba n-asənkär wa t-dd-ija Ƴisa jer-inəmmuttan a fäl, taqqälän imänokalän n-käl-Älyähud äjjootnen ɗarät käl-tikutawen, timənən s-Ƴisa.

Ujəš n-Ƴisa i-Yärussälam

(Mätti 21:1-11; Marqəs 11:1-11; Luqa 19:28-40)

¹² Äffäw ɣas, təslä tamətte ta täjjet dd-tökkät ämudd a-s Ƴisa ikkä-dd Yärussälam.

¹³ Ǝjjäšan-tät isälan ɣas, ad-dd-ɣattäsän äddinät iləktan n-tišday, lakkäɗän-as, säɣären s-afälla:

«Ozana! Ija Mässinäɣ älbäraka däɣ-ämänokal wa n-Işrayil dd-osän fäll-isəm n-Emäli.»

¹⁴ Ijräw Ƴisa äza iyyän däɣ-zäbo, inäy-t, ämoos a-wen a ässitbätän a-wa iktäbän däɣ-əlkəttab n-Mässinäɣ a-s innä:

¹⁵ «Yärussälam ta dəyät fäll-taɗaɣt ta n-Sayon, wär tärməɣäd, ɔnhöy ɣas ämänokal-näm imal-dd inay ara n-teşədt.»

¹⁶ Aşäl wa d-jän härätän-winnin-däɣ, wär tän-əfhemän inəɣtulab n-Ƴisa mašan, aşäl wa d-ijjäs

təmyərə n-älxurmät-net, əktän-dd a-s ənta-en-däx a fäl əktäbän ännäbitän härätän-win-däx, ämeşäl-tän dax.

¹⁷ Aşäl-wen-däx, tässoyal tamətəte iket-net a-wa ijä Yisa ed, täjjöyha a-s dd-issenkär Lazar jer-inəmmuttan, ikkäs-t-dd däx-azəkka.

¹⁸ Təlkäd-dd tamətəte-en iket-net i-Yisa däx-təssəba n-iji n-Mässinäx wa-däx s-təslä ij'-e.

¹⁹ Ənhäyän käl-faris a-wen xas, änmännän jer-iman-näsän: «Tənhäyäm ämära a-s a-wa wädden a dd-nəkka d-härät, tamətəte iket-däx-net a dāra-s toşalät.»

Äsdärhänän käl-Älyunan iyyäð ahänay n-Yisa

²⁰ Osän-dd härät däx-käl-Älyunan† s-ijraz äddin wa n-käl-Älyähud, əkkan-dd daw-ämudd-i-däx i-ad-äybədän Mässinäx däx-Yärussälam,

²¹ əjräwän änättalib wa s-isəm-net Fəlibb wa n-taxrəmt ta n-Bätsäyda ta n-Galila, ənnän-as: «Ähaləs, nārha ad-nənhöy Yisa.»

²² Iglä Fəlibb, ija isälan däx-Idris, äddewän issənän-essän s-Yisa, əlläxen-as.

²³ Əwwäðän-dd Yisa xas, inn'-asän: «Ässaçät wa däx-mad-ijjəş Ägg-ägg-adəm älxurmät-net, osä-dd.

²⁴ Ällexəx-awän s-tidət tädduuttet† a-s a təkäs temätəwt n-älkäma wär tənbel däx-äkall

† **12:20 12:20** Itawann'-asän: Gərikän. (Les Grecs däx-Təfränsit). Əzzaçän Erobbä däx-äkall wa itawänna: Gəris (La Grèce däx-Təfränsit). Tawalt-näsän: Tälyunanit.

† **12:24 12:24** Däx-Tälyunanit: Amin, amin (S-tidət, tidət).

tämmät, ad-tämoos tiyyät tablalt ɣas mäšan, afäl tənbal däx-äkall har tämmut, a dd-tarəw tiblalen äjootnen.

²⁵ Ere wa wärän itəttär ar əmmək s-ijmār iman-net däx-äddunya-ta-däx, ad-ifut däx-älžännät, mäšan, əwadəm wa irdän äfota däx-iman-net, däx-äddunya-ta-däx, däx-äddimmät-nin, ad-ijrəw tämudre ta täɣlälät.

²⁶ Ere däx-wän irhän tumast n-änaxdim-in-däx adiš, ilkəmet-ahi fäl-a-s, näkk edəgg wa däx-mad-əzzäɣäx, ənta daɣ a däx-mad-izzäx ənaxdim-in, ijrəw semɣar ɣur-Abba.»

Äloläy Ƴisa däx-isälan n-tamättant-net

²⁷ «Äryän iman-in, äryän ämära-däx, ak ma he-ännäx fäw? Abba, äɣləs-ahi däx-ässaxät-wa-däx? Fäw, näkk, əssanäx a-s tössəba n-ässaxät-wa-däx a fäl dd-ämešäläx.

²⁸ Abba, səkən äddinät təmɣäre n-älxurmät n-isəm-näk.» Ifäl-dd emäsli älwäqq-wen-däx išənnawän innän:
«Isəm-in, əssəmɣäräx-t,
ad-t-aləsäx daɣ asəmɣar.»

²⁹ Təslä tamətte ta t-təllät dihen i-emäsli-ənnin-däx ɣas, innä aɣil-net iyyän: «Ak salläm i-ejjaj wa ijjäjän?» Inna aɣil wa iyyädän: «A-di wädden ejjaj, änjälos a has-imməjrädän.»

³⁰ Inn'-asän Ƴisa daɣ: «Emäsli wa s-iket has-təsläm, wädden tössəba-nin a däx-ija, tössəba-näwän käwäneɗ a däx-ija.

³¹ Elmədät a-s ämära-däx, ad-mad-tətwəšärräx äddunya, itwəstäx daɣ ämänokal-net Iblis,

³² näkk daḡ, afäl əmmədkäläḡ, ad-dd-äḡrəḡ s-
iman-in äddinät iket-näsän.»

³³ Innä a-wen-däḡ i-ad-tän-isəlməd əmmək wa
s-mad-ämmät.

³⁴ Tənn'-as tamətte: «Ajän wädden näḡra
däḡ-Ättäwrät a-s Älmaseḡ, wär-e ämmät, iḡlal,
adiš ma käy-isawännen: <Ägg-ägg-adəm, ad-
ämmädkäł?> Wa Ägg-ägg-adəm fäl wär nəssen
madän-ämmädkäł, mi ämoos?»

³⁵ Inn'-asän Ḳisa: «Ännur, wär has-in-äqqima
ar a əndərrän ill'-e jere-wän, äsimätäräḡ-käwän
d-ad-has-təlkəmäm i-ad-wär käwän-ḡäddärnet
tiḡay fäl-a-s, ere irjašän däḡ-tiḡay, wär-issen e-s
ihäl.

³⁶ Iket-di täzzegäzäm a-wen, a ikkäs ännur ill'-
e jere-wän, amənät sār-s i-ad-tumasäm dägg-
ännur.» Innä Ḳisa a-wen ḡas, ifäl tamətte, iffär.

Täḡart n-ulhawän n-tamətte

³⁷ Ija Ḳisa data-sän ijitän n-Mässinäḡ-i-däḡ
äjootnen mäšan, unjäyän sār-s omänän,

³⁸ ämoos a-wen a ässiitbätän mäjräd wa ikfä
Mässinäḡ ännäbi Saya† a-s innä däḡ-əlkəttab n-
Mässinäḡ:

«Emäli, mi omänän s-a-wa nənna?

Mi s-dd-tänfaläl tärna n-äfuss n-Emäli?»

³⁹ Äqqurän ulhawän n-käl-Iḡrayil fäl-a-s, innä
ännäbi Saya daḡ:

⁴⁰ «Äsdärḡäl-tän Mässinäḡ,

äsḡär ulhawän-näsän i-ad-wär hənnəyän s-
tiḡtawen-näsän,

† 12:38 12:38 A-wa ännäbi dd-äzzarän i-Ḳisa, äloläy
däḡ-isälan-net əssayät timad n-awätay dat-tiwit-net.

əjrähän härät s-ulhawän-näsän,
utabän i-ad-tän-izuzəy Mässinäx.»

⁴¹ Mäjräd-wen-däx, ij'-e ännäbi Saya äzzäman
wa d-has-dd-änfaläl älxurmät n-Ûisa, ädwännät
däx-isälan-net.

⁴² Hakd a-wen-däx, omänän imizärän n-käl-
Älyähud äjjootnen s-Ûisa mäšan, tögdal-asän
tuksəda n-käl-faris ad-sətbətän immun-näsän,
fäl-a-s äksudän ad-tän-əkkəsän däx-ihänen n-
äddin-näsän,

⁴³ äsofän tömmal ta dd-fälät däg-g-adəm
uhən ta n-Mässinäx.

Ûisa Älmasex a-s ilkam ad-işrăx däg-g-adəm

⁴⁴ İdkäl Ûisa emäsli-net, innä: «Ere sār-
i omänän-däx, ilmədet a-s wädden näkk a-s
omän, Mässinäx-i hi-dd-äşmaşälän a-s omän,

⁴⁵ ere dağ wa hi-inhäyän, ilmədet a-s
Mässinäx-i hi-dd-äşmaşälän a inhäy.

⁴⁶ Näkk a-s ännur, ämeşäläx-dd s-äddunya
däx-tössəba n-ad-wär-itəzzäx fäw ere sār-i
omanän däx-tihay,

⁴⁷ ere islän i-mäjräd-in wär t-iṭṭef, wädden
näkk a t-madän-işrăx fäl-a-s, wär dd-ämeşäläx i-
ad-əşrăxäx äddunya, änn-ak, ämeşäläx-dd i-ad-
tät-äḫləsəx.

⁴⁸ Ere sār-i unjäyän, unjäy s-mäjräd-in,
mäjräd-en-däx a t-e-işrăxän aşäl wa ilkämän

⁴⁹ fäl-a-s, mäjräd wa jeḡ iket-net, wädden
a dd-əkkasäx däx-eyäf-in ḡas, Abba-nin ənta
iman-net-i hi-dd-äşmaşälän a hi-ikfän turhajät
n-ad-ännäx a-wa hi-inna, äjäx dağ isälan-net i-
äddinät.

⁵⁰ Æssanäx day a-s e d t-illäm äwadəm ilkamän i-a-wa innä, ad-ijrəw tämudre ta täxlälät. A-wen-däx a fäl näkk, a-wa jänneḡ iket-net, jänneḡ-tän s-əmmək wa s-hi-tän-innä Abba.»

13

Æsseräd Yisa iḍarän n-inəṭṭulab-net

¹ Ehäd wa n-dat-wa n-ämudd wa n-Faška, ilmäd Yisa s-ässäḡät n-ajmuḍ-net i-äddunya i-ad-akk Abba, iwwäd-dd. Ehäd-en-däx, issəmdä-dd təmḡäre n-tärha-net s-inəṭṭulab-net, issəkn'-en tärha tokäyät ta tän-isakna hak ašäl a ija a-wa-däx.

² Härwa tamänsawän a-s ija Iblis däḡ-ulh n-Yähudəs Ägg Simyon wa n-Isxaryut erk ənniyät wa n-ad-isäḡdär Yisa.

³ Däḡ-təlluləya-net, issan Yisa a-s wär t-illa a-s wädden ij'-e Abba-net däḡ-ifassän-net, issan day a-s Mässinäḡ-i t-dd-äšmašälän, ənta a iqqal.

⁴ Æssəmdän tetäte ḡas, ibdäd Yisa, ikkäs emäls-net, iḍkäl-dd ekäršäy iyyän, ijbäs sär-s,

⁵ ijä ḍarät-a-wen aman däḡ-tazəwat, ad-isarad iḍarän n-inəṭṭulab-net, itiməs-tän s-ekäršäy wa s-ijbäs.

⁶ Iwwäd-dd ässäḡät wa n-asirəd n-iḍarän n-Simyon Bəṭrus ḡas, iggäd inna i-Yisa: «Xäša Äḡalim! Näkk a iwar asirəd n-iḍarän-näk wädden käyy.»

⁷ Inn'-as Yisa: «A-wa hi-išlän, wär mad-təjrahäd älmäḡna-net ämära-däḡ mäšan, ilkam ad-t-təfhəməd.»

8 Inn'-as Bətrus älwäqq-wen: «Käla käla Älyalim, näkk lab wär-ilkem ad-ärdey tässerädäd idarän-in.» Inn'-as Yisa: «Äfäl wär-ässerädäy idarän-näk, wär hak t-illa ad-nahär.»

9 Innä Simyon Bətrus: «Adiš Älyalim, wär təbdeäd xur-idarän-in xas, sirəd daḡ eḡäf-in hakd ifassän-in.»

10 Inn'-as Yisa: «Wädden ere ässerädän telämäkt-net, wär-ämyatär s-ad-aləs asirəd daḡ kunta wädden idarän-net ed, šäddij iket-net, käwäneḡ, a-s tökkäsäm iyyän däḡ-wän, šäddijäm.»

11 Mäjräd-wen-däḡ, ij'-e Yisa ed, issan ere wa t-madän-isəssäḡdär. Däḡ-təssəba n-a-wen-däḡ a fäl hasän-innä iyyän däḡ-sän, wär šäddij.

12 Ässeräd idarän-näsän xas, ils' emäls-net, iqqäl-dd, äqqima däḡ-edägg wa n-imənsiwän, inn'-asän: «Ak, käwäneḡ, təfhamäm a-wa s-iket hawän-t-jey meḡ?

13 Wädden a hi-jannem: <Älyalim d-Emäli,> ikna ed a-wen-däḡ a ämoosäḡ

14 xas, šämad näkk-i n-Emäli d-älyalim, ässerädäḡ idarän-näwän, adiš käwäneḡ-däḡ, iwar-käwän ad-tinməsiridäm idarän jer-iman-näwän;

15 əssəknäḡ-käwän älmital he-tinməjjim jer-iman-näwän s-əmmək-wa-däḡ s-hawän-t-jey.

16 Älleḡeḡ-awän s-tidət tädduuttet† a-s wär t-illa akli ojarän mässi-s, wäla änəmšašal ojarän ere wa t-äšmašälän.

† 13:16 13:16 Däḡ-Tälyunanit: Amin, amin (S-tidət, tidət).

17 Təndəd-awän kunta tössanäm s-härätän-wi-däx, ad-tän-tamaşaläm.

18 A-wa hawän-jannex, wädden iket-näwän a fäl t-jannex fäl-a-s näkk, əzzayäx inəttulab-in wi əsnäfränäx, əməra, məjräd n-Mässinäx a madän-isətbət a-wen ed, iktab dəx-s a-s:

«Wa dər-i ohärän äkoss,
ənta a-s ašanjo-nin.»

19 Əkkasäx-käwän dəx-taydärt n-härätän-wi-dəx härwa wär-ətbətän dəx-tössəba n-a-s afäl jän, ad-tamənäm a-s: «Näkk, äyläläx».

20 Ällexeş-awän s-tidət tädduuttet a-s ere əsbärräkän ere hin-əsimasäläx, a əmoos-dəx, näkk a əsbärräk, ere dəx wa hi-əsbärräkän, Wa hi-dd-əşmasälän a əsbärräk.»

Əloläy Yisa dəx-isälan n-əməxdar-net

(Mätti 26:20-25; Marqəs 14:17-21; Luqa 22:21-23)

21 A-s issəmda Yisa məjräd-wa-dəx, əkman-t iman-net, inn'-asän: «Ällexeş-awän s-tidət tädduuttet a-s iyyän dəx-wän a hi-madän-isəssəxdär.»

22 Əslän inəttulab i-a-wen xas, ad-tinməkyidän, tinməsəstinän d-ere wa s-iha ti-net.

23 A-s itäj a-wen-dəx, əsişämär ənəttalib wa ikna Yisa tərha edes-has,

24 inzäj-as Simyon Bətrus tişt, inn'-as, ad-isəstən Yisa d-ere wa s-iha ti-net.

25 Əsmätäktäk ənəttalib-en i-Yisa, inn'-as: «Əlşalim, mi käy-madän-isəssəxdär?»

²⁶ Inn'-as Ƴisa: «Ere wa s-mad-səlmäxäx afärs n-tajəlla dāx-ədrəz, ənta-en-dāx a hi-madän-isəssäxdär.» Issəlmäx Ƴisa afärs n-tajəlla dāx-ədrəz, ikf'-e Ƴähudəs wa s-itawänna Isxaryut n-əgg Simyon.

²⁷ Diha-dāx d-irmäs Ƴähudəs afärs n-tajəlla-ənnin-dāx, ad-innähd Iblis dāx-ulh-net, inn'-as Ƴisa əlwəqq-wen: «Ƴähudəs! A-wa təjjäd, əj'-e šik.»

²⁸ Ijä Ƴisa i-Ƴähudəs məjräd-wen-dāx məšan, wär t-illa dāx-inəttulab-net wi iyyädnen əsiiḡämärnen dāx-isəftax i ifhamän a-wa innä,

²⁹ əḡelän a has-innä: «Žänš-dd a-wa s-nəmiḡatär i-ämudd wa n-Faška» meḡ «Äkf härät tiləqqiwen» fäl-a-s, ənta a-s ənazraf-näsän.

³⁰ Irmäs-dd Ƴähudəs afärs n-tajəlla wa has-dd-izzäl Ƴisa ḡas, izjär. Isəlan-wi-dāx, ehäd a-s tajjän.

Alämär wa əynayän ikfä Ƴisa inəttulab-net

³¹ Izjär Ƴähudəs ḡas, innä Ƴisa i-inəttulab-net: «Ämära-dāx ad-mad-itwəsəḡär Ägg-əgg-adəm, itwəsəḡär daḡ Mässinäx dāx-təssəba-net,

³² äkf Ägg-əgg-adəm əlxurmät ḡur-iman-net, äkf'-as-t daḡ šik.

³³ Ilyadän-in, wär-e əhajäḡ əllex jere-wän, əssanəḡ a-s ilkam ad-hi-təmmäḡäm məšan, ənnəḡ-awän a-wa s-käla tän-ənnəḡ i-käl-Älyähud wi iyyädnen: «Edəgg wa əkkeḡ, wär mad-tudabem aggaḡ-net».

³⁴ Ämära, ɔnta-da färəð wa äynayän əfrädäx fälla-wän: <Nəməjjät jer-iman-näwän anmärh šund wa hawän-jex, nəmärhät jer-iman-näwän,
³⁵ anmärh jer-iman-näwän en-däx a he-isəlmədän äddinät a-s tidət-däx a-s inəttulab-in a tämoosäm.> »

Äloläy Yisa däx-isälan n-akuddəl wa t-e-äj Bətrus
 (Mätti 26:31-35; Marqəs 14:27-31; Luqa 22:31-34)

³⁶ Issəmdä Yisa mäjräd-wen-däx xas, iggädd Simyon Bətrus, innä: «Älyalim, ɔndek siha s-təkkeð?» Inn'-as Yisa: «Edägg wa əkkex, wär täddobed ad-hi-sär-s təlkəmäd ämära-däx mäšan, ilkam däx-k ad-hi-dd-tawəðäd däx-s.»

³⁷ Inn'-as Bətrus: «Älyalim, mafäl wär-äddobex alkum-hak ämära-däx? Äddobex-t, näkk, äsidäwäx wäla i-tamättant däx-tössəbanäk.»

³⁸ Inn'-as Yisa: «Wädden tənned täsidäwäd wäla i-tamättant däx-tössəba-nin? Ikna mäšan, äsidättey-ak a-s, wär-e iwət ekäz äxora wär hitäkkuddäläd har kərəð ihändäggan.»

14

Yisa Älmasex a-s tabarät ta tiyədät s-Mässinäx

¹ Inn'-asän Yisa dərät-a-wen: «Wär rammäxnet ulhawän-näwän, amənät s-Mässinäx, amənät sär-i,

² ehän n-Abba-nin, han-t idäggan äjjootnen, önnär wär-itbet a-wen, wär hawän-jønney əgleɣ i-ad-hawän-səmməjnux edəgg,

³ afäl əgleɣ har hawän-äsmäjney edəgg, ad-käwän-dd-äqqələɣ, ədkələɣ-käwän, təmləm diha t-əlleɣ.

⁴ Edəgg daɣ wa əkkeɣ, təssanäm tabarät-net.»

⁵ Iggäd-dd änätṭalib wa s-isəm-net Tomi, inn'-as: «Äɣalim, näkkäneḍ lab, wär nəssen siha s-təkkeḍ, əndek əmmək wa s-mad-nəlməd tabarät-net?»

⁶ Inn'-as Ƴisa: «Näkk a-s tabarät, näkk a-s tidət, näkk daɣ a-s təmudre, wär t-illa fäw ere äddooben aggaḍ n-Abba ar s-ad-hi-ija əssəbab n-a-wen.

⁷ Šämad daɣ näkk təzzayäm-ahi, ad-təzzəyäm Abba-nin, šämad təzzayäm-t, adiš, tənähayäm-t.»

⁸ Iggäd-dd wa s-isəm-net Fəlibb, inn'-as: «Äɣalim, səkən-anəɣ ɣas Abba, igdäh-anəɣ a-wen-däɣ.»

⁹ Inn'-as Ƴisa: «ɣas Fəlibb, a-wa-däɣ jeɣ iket-net ärtayäɣ dər-wän, wär hi-təzzeyäd? Wa hi-inhäyän, inhay Abba, ɣas əndek əmmək wa s-jänned: <säkən-anəɣ Abba>.

¹⁰ Ajän wär tomenäd a-s näkk ärtayäɣ d-Abba, irtay dər-i daɣ ənta, heeɣ-t, ih'-ahi? A-wen-däɣ a fäl iməjridän wi hawän-täjjäɣ, wädden a dd-əkkasəɣ däɣ-eyäf-in ɣas, Abba-i dər-i irtayän a ämoosän əssəbab n-ijitän wi tamašaläɣ iket-näsän.

¹¹ Amənät a-s näkk ärtayäɣ d-Abba, irtay dər-i daɣ ənta, heeɣ-t, ih'-ahi. Kunta daɣ wär

tomenäm s-mäjräd-in, amənät bännan s-ijitän-wi tamašaläḡ.

¹² Älleḡeḡ-awän s-tidət tädduuttet† a-s ere sār-i omänän-däḡ, ad-äj ənta-däḡ ijitän-wi jeḡ, äj fäw-i tän-əknanen mijraw ed näkk, əkkeḡ Abba.

¹³ A-wen-däḡ a fäl a təttäräm-däḡ s-isəm-in, ad-t-äjäḡ i-ad-ijrəw Abba älxurmät däḡ-təssəba n-Rure-s.

¹⁴ A təttäräm-däḡ s-isəm-in, ad-hawän-t-äjäḡ.»

Unfas wa s-ilkam ad t-dd-isəssiwəy Mässinäḡ

¹⁵ «Kunta tidət-däḡ a-s tärham-ahi adiš, əṭṭəfät fārəḡän-in,

¹⁶ ad-hawän-ädələḡ Abba i-ad-käwän-əkf änabdid iyyän ḡur-wän e-illan härkuk,

¹⁷ ənta a-s Unfas wa s-tidət ḡas a t-dd-zajjərät, wär täddoobät äddunya ad-t-täqəbəl fäl-a-s wär täddobät ahänay-net wəla muzəyät-net mäšan, käwəneḡ, təzzayäm-t ed äheräj dār-wän, izzaḡ daḡ däḡ-ulhawän-näwän.

¹⁸ Wār käwän-mad-äyyäḡ täjohäläm, ad-käwän-dd-äqqələḡ,

¹⁹ äqqim-in a əndärrän i-ad-äbas hi-hannäy äddunya mäšan käwəneḡ, a hi-hannäyäm fäl-a-s, əddaräḡ, təddaräm.

²⁰ Ašäl-wen-däḡ ad-mad-təlmədäm a-s näkk ärtayäḡ d-Abba, tärtayäm dār-i käwəneḡ, ärtayäḡ dār-wän daḡ näkk.

²¹ Ere wa iknän uḡəf n-fārəḡän-in, ənta a-s emärh-in, ere daḡ wa hi-irhän, ad-t-ärh Abba-nin, ärhäḡ-t näkk-däḡ, sənnəfilələḡ-as-dd daḡ iman-in.»

† 14:12 14:12 Däḡ-Tälyunanit: Amin, amin (S-tidət, tidət).

22 Inn'-as ānāṭṭalib wa s-isəm-net Hudd izleyān d-Yāhudəs wa n-Isxaryut: «Ālyalim, əndek əmmək wa s-mad-hanāḡ-dd-sənnəfiləlād iman-nāk wār tən-dd-tāsnāfalālād i-āddunya?»

23 Inn'-as Ƴisa: «Ere hi-irhan, ad-agəz məjrād-in, dihen, ad-t-ārḡ Abba-nin, nidaw-dd sār-s, nəzzāḡ Ƴur-s.

24 Ere wa hi-wārān-irḡa, wār mad-itṭəf məjrād-in. Məjrād wa s-təslām Ƴur-i, wādden a dd-əkkaşāḡ dəḡ-eḡāf-in Ƴas, Abba-nin-i hi-dd-āşmaşālān ahi-ikfān turḡajāt n-tənna-net.

25 Ƴas, əkkaşāḡ-kāwān dəḡ-tayḡdārt ḡarwa əlley jere-wān,

26 ānabdid daḡ wa s-hawān-ənney, a t-āmoosān Unfas Şāddijān, ad-hawān-t-dd-isəssiwəy Abba s-isəm-in, afāl hawān-t-dd-āssawāy, ad-kāwān-isāḡār ḡarāt iket-net, isəktəw-kāwān-dd a-wa hawān-ənney iket-net.

27 Āmāra, oyyey Ƴur-wān ālḡer, ālḡer daḡ wa s-nākk Ƴas a t-ihakkān a Ƴur-wān oyyey ed nākk, isuf-wi hawān-tājjāḡ, wār-olehān d-wi hawān-tājj āddunya, wār tāşāwwaşnet ul-hawān-nāwān, wār rāmmāḡāt.

28 Wādden, sallām-ahi a-s hawān-ənney: <Ēgley dəḡ-təssəba n-ad-kāwān-dd-āqqələy>, Ƴas ənnār hi-tārḡam, ijrəz-awān a-wa hawān-ənney ed Abba-i əkkeḡ, oḡār-ahi.

29 ḡarātān-wi-dāḡ, janney-awān-tān āmāra-dāḡ i-ad-kāwān-əkkəsāḡ dəḡ-tayḡdārt ḡarwa wār jen, dihen afāl jān, ad-tamənām sār-i.

30 Igdāḡ dəḡ-məjrād diḡa-dāḡ āmāra fāl-a-s, Iblis-i n-āmānokāl n-āddunya, imal-dd. Ēlmədāt a-s wār fāll-i ila tārna

³¹ māšan, ärheḡ ad-təlməd äddunya a-s näkk ärheḡ Abba, wär təmišiläḡ daḡ ḡas ar erhet-net. Ænkärät ämära, äflät-anäḡ edägg-wa-däḡ.»

15

Yisa a-s ahəšk wa däḡ-ärmamän imumənän

¹ Fälän dihen ḡas, inn'-asän Yisa: «Näkk a-s ahəšk n-läḡnəb wa n-tidət, Abba-nin a-s änäsdamu.

² Kəwəneḡ a-s iləktan n-ahəšk, e d t-illäm eläkät däḡ-i irmamän wärän itirəw, ad-t-in-iḡtəs Abba-nin, eläkät daḡ iket-net itirəwän aratan, ad-hin-isrəmsərəm iləḡan-net, išəšdəj-t i-ad-dd-arəw aratan s-əjut.

³ ḡur-ämära-däḡ, əlmədät a-s šəddijäm däḡ-təssəba n-asəssäḡär wa kəwän-jəḡ.

⁴ A-wen-däḡ a fäl ḡaymät tärtayäm där-i s-əmmək wa s-där-wän ärtayäḡ. Wär t-illa eläkät äddooben tiirwe d-iman-net afäl wär-irmem d-tafäja, əmmək-wen-däḡ daḡ a-s wär t-illa a iha ärramät s-täddobem amišəl-net i-Mässinäḡ ar s-ad-där-i tärtayäm.

⁵ Ässiilmädäḡ-kəwän a-s näkk a-s tafäja n-ahəšk n-läḡnəb, kəwəneḡ a-s iləktan-net. Ere wa där-i irtayän, ärtayäḡ där-s näkk-däḡ, ad-ämašäl i-Mässinäḡ a iha ärramät fäl-a-s, wär t-illa a-s täddobem iji-net wəla näkk.

⁶ Ere där-i wärän irtey iket-net, ad-hin-itwəḡtəs, itwəjär-in šund eläkät äqqurän s-afäl hin-ätwəjär däḡ-efew, ad-ärḡ s-iyyət māšan,

⁷ afäl näkk a ihan inəzjam-nəwän, ad-där-i tärtayäm, tamašaläm məjräd-in, a tətäräm däḡ-Mässinäḡ-däḡ, ad-hawän-t-äkf.

⁸ Afäl inəttulab tamašalnen a iha ärramät i-Mässinäḡ a tämoosäm, ad-hawän-dd-isənniflöl a-wen älxurmät n-Abba-nin.

⁹ Tärha ta-hi ija Abba, ənta a hawän-jeḡ näkk-däḡ; əttəfät tärha-nin, təzzäḡäm däḡ-s.

¹⁰ Tärha-nin daḡ, wär tät-mad-təttəfäm ar s-ad-təttafäm färədən-in s-əmmək wa s-əttafäḡ färədən n-Abba-nin, əlkamäḡ i-tärha-net, əzzaḡäḡ däḡ-s.»

Äsmadaw ḡisa inəttulab-net d-iman-net

¹¹ «Mäjräd-wa-däḡ hawän-jeḡ, jeḡ-awän-t däḡ-təssəba n-ad-təjəm tedäwit šund ta jeḡ, təjəm daḡ tedäwit təmdat.

¹² Ämära, ənta da färəḡ wa käwän-əsiwäräḡ: <Nəmährät jer-iman-näwän s-əmmək-wa-däḡ s-käwän-ärheḡ>.

¹³ Wär t-təlla tärha tojərät ad-äkf äwadəm iman-net däḡ-təssəba n-imidiwän-net,

¹⁴ afäl tamašaläm a-wa fälla-wän əfräḡäḡ, ad-käwän-ḡarräḡ s-isəm: <imidiwän-in>,

¹⁵ ad-äbas käwän-jeḡ eklan-in ed akli, wär däḡ-s itəjj mässi-s isälan-net, änn-ak, ad-tumasäm imidiwän-in fäl-a-s, a-wa s-əsleḡ ḡur-Abba-nin iket-net, əssəlmädäḡ-awän-t.

¹⁶ Wädden käwänəḡ a hi-äsnäfränän, näkk a käwän-äsnäfränän, äḡreḡ-käwän-dd i-ad-tamašaläm a iha ärramät i-Mässinäḡ, umasnät timaşalen-näwän a iḡlalän. Afäl jəm a-wen, a təttäräm däḡ Abba-nin s-isəm-in, ad-hawän-t-äkf.

¹⁷ Ənta da a-wa s-käwän-omaräḡ: <Nəmährät jer-iman-näwän.> »

Äddunya, tašanjot n-älmässexitän

¹⁸ «Kunta tokäḍ dār-wän äddunya, əlmədät a-s tokäḍ dār-i data-wän,

¹⁹ ənnär tämoosäm äddinät ättilälñen a-wa fäll-təgl' äddunya, wär kəwän-kəssən. Ässiilmädäḡ-kəwän a-s wär kəwän-təla äddunya, tokäḍ dār-wän daḡ dāḡ-təssəba n-a-wa s-kəwän-äsnäfränäḡ.

²⁰ Ƴaymät dd-kittəwäm məjrad wa s-kāla hawän-t-jeḡ a-s hawän-ənnəḡ: <Wär t-illa akli ojarän məssi-s.> Kunta, täqquzzäbät-ahi äddunya-ta-däḡ, adiš ad-kəwän-täqquzzəbət kəwänəḍ-däḡ, kunta daḡ täsjäd i-məjrad-in, adiš, ad-hawän-səjəd kəwänəḍ-däḡ

²¹ məšan, əlmədät a-s wär hawän-mad-səjdən äddinät, änn-ak, älḡizabät a kəwän-e-səknən dāḡ-təssəba-nin ed, wär-əzzeyän ere wa hi-dd-äšmašälän.

²² Ənnär wär dd-oseḡ i-ad-hasän-äjäḡ isälan, iket-di, wär tän-itəwwer abäkkäḍ məšan, ämära-däḡ d-hasän-jeḡ isälan, äbas hasän-t-illa äsaru injärän ibäkkäḍän-näsän.

²³ Ere wa dār-i okäḍän, okäḍ daḡ d-Abba-nin.

²⁴ Ənnär wär jere-sän jeḡ ijitän n-Mässinäḡ s-kāla wär tän-ija äwadəm dat-i, äqqayməñ wär tän-iwer abäkkäḍ, məšan ämära-däḡ, d-əñhäyän ijitän n-Mässinäḡ wi jeḡ dat-tittawen-näsän, okäḍän dār-i näkk hakd Abba-nin.

²⁵ Hakd a-wen-däḡ, mikḍaw-näsän dār-i, i n-təssəba n-ad-itbat məjrad n-Mässinäḡ wa iktäbän dāḡ-älämär-näsän a-s tän-iytäl, inn'-asän:

<Okäḍän dār-i dägg-adəm bännan baṭilän.>

²⁶ Afäl hawän-dd-ässawäyäx änanbidid wa tillan xur-Abba, änta-i n-Unfas wa wär dd-zëjjär ar tidöt ta dd-fälät Abba, ad-hawän-äj isälan-in,

²⁷ tumasäm tjuhawen-in fäl-a-s, käwäned-i-däx a-s wi s-a ässöntäx ämašal-in har näkk-da-däx, täddewäm där-i.»

16

Ilkam älyizabät

¹ «Jëx däx-wän isälan-wi-däx i-ad-wär tinmësreyäm.

² Ilkam ad-hawän-ëgdälän käl-Älyähud ämudd däx-ihänan n-äddin-näsän, ilkam fäw äzzäman s-äwadëm inxän iyyän däx-wän, ad-içal teyxë a ikät i-Mässinäx.

³ Ad-ëjön a-wen ed wär hi-ëzzeyän näkk wäla Abba.

⁴ Elläxëx-awän härwa ämära, däx-tössöba n-a-s afäl dd-ëwwädän härätän-win-däx, ad-dd-tëktewäm a-s ällexëx-awän sär-sän härwa wär jen, wär hawän sär-sän ëlläxëx äru ed a-s ija a-wen, ärtayäx där-wän mäšan

⁵ ämära-däx d-ässawädäx uxël n-Wa hi-dd-äšmašälän, wär käwän-iha-i hi-isastanän d-diha ëkkey

⁶ mäšan, äxšadän ulhawän-näwän däx-tössöba n-a-wa hawän-ënnëx.

⁷ Tidöt a hawän-ënnëx, uf'-awän ad-ägläx ed, afäl wär-ëglex, wär mad-käwän-dd-ass änanbidid, afäl ëglex, ad-hawän-t-dd-sukäx.

⁸ Afäl dd-osa änanbidid, ad-isëlmöd a-s toška äddunya däx-a-wa ämoosän abäkkad d-a-wa

ämoosän iqqud d-a-wa ämoosän äššärexa n-Mässinäx;

⁹ ad-isəlməd äddinät a-s oşkan dəx-isälan n-ibäkkadän ed, wär sār-i omenän,

¹⁰ isəlməd-tän a-s oşkan dəx-isälan n-iqqud ed əkkeḡ Abba, wär-ilkem ad-hi-tənhayäm,

¹¹ isəlməd-tän a-s oşkan dəx-isälan n-äššärexa ed Iblis-i n-ämänokal n-äddunya, äššärexa-net, äru d-t-ixtäs Mässinäx.

¹² Leex a äjjeen s-ärheḡ ad-hawän-t-ännäx mäšan, wär täddobem ujreh-net ämära-dəx.

¹³ Afäl dd-osa Unfas wa wär dd-zəjjär ar tidət, ad-käwän-aḡəd dəx-tidət iket-net fäl-a-s, wädden isälan n-iman-net a dəx-e ämmäjräd, änn-ak, ad-äj isälan n-a-wa s-islä, älläḡät-awän härätän-wi dd-malənen.

¹⁴ Afäl dd-osa Unfas, ad-hi-isəmyār fäl-a-s, ad-dd-irməs mäjräd-in, isuḡəl-awän-t.

¹⁵ A-wa ila Abba iket-net, i-nin, a-wen-dəx a fäl hawän-ənnex, ad-dd-irməs mäjräd-in, isuḡəl-awän-t.»

Təssəkma tekle n-Ḳisa iman n-inəṭṭulab-net

¹⁶ «Äqqima-hin a əndärrän i-ad-äbas hi-hannäyäm, akəy dəḡ ässaḡät əndärrän, taləsäm-ahi ahänay.»

¹⁷ Əslän iyyäd dəx-inəṭṭulab-net i-tifer-tin-dəḡ ḡas, änmännän jer-iman-näsän: «Əndek älmäḡna n-mäjräd wa hanäḡ-ija a-s innä: <Äqqima-hin a əndärrän i-ad-äbas hi-hannäyäm, akəy dəḡ ässaḡät əndärrän, taləsäm-ahi ahänay.> Ma ämoos dəḡ älmäḡna n-: <əkkeḡ Abba-nin> wa hanäḡ-innä?»

18 Änmännän daḡ: «Näkkäneḡ ya wär t-illa a nəfham, ma ämoos älmäḡna <n-älwäqq əndärrän> wa s-hanäḡ-ijänna.»

19 Ilmäḡ Ḡisa a-s ärhan ad-t-səstənän ḡas, inn'-asän: «Käwäneḡ, tinmössəstinäm härwa jer-iman-näwän däḡ-a-wa s-hawän-ənnəḡ: <Äqqima-hin a əndärrän i-ad-äbas hi-hannäyäm, akəy daḡ ässaḡät əndärrän, taləsäm-ahi ahänay>.

20 Älleḡeḡ-awän s-tidət tädduuttet† a-s ad-šoršəm, səkkəläläm, a-s ija a-wen äddunya ənta täsriiw, ad-äḡšədän iman-näwän mäšan, ad-dd-təšrəy tedäwit a-wen.

21 Wädden tamäḡt ed, täbok ajäraw n-eḡäf-net, ad-tazär hullan mäšan, afäl təjräw eḡäf-net ad-hin-titaw tizzurt-net tənnin-däḡ iket-net, tisanant-net, ad-has-tät-in-sətəw tedäwit n-ara wa təkräš.

22 Emmək-wen-däḡ a-s käwäneḡ-däḡ ämära-däḡ, äḡšadän iman-näwän mäšan, ad-käwän-aləsäḡ ahänay, äddäwen ulhawän-näwän, əjən daḡ tedäwit-ta-däḡ s-wär t-illa ere äddoben aḡäšad-net.

23 Ašäl-wen d-hi-mad-tənhəyäm, wär mad-t-iməl fäw a-s tämiḡatäräm d-asəstan-in dār-s. Älleḡeḡ-awän s-tidət tädduuttet a-s a təttäräm däḡ-Abba s-isəm-in, ad-hawän-t-äkf.

24 Har ämära-däḡ, wär t-illa a däḡ-t-daläm s-isəm-in, ädələt-t ämära, ad-käwän-äkf a-wa däḡ-s təttäräm i-ad-sär-wän dd-təmdəw tedäwit.»

† 16:20 16:20 Däḡ-Tälyunanit: Amin, amin (S-tidət, tidət).

A ɔttārān imumənan dəx-Mässināx-dəx, ad-hasān-t-əkf

²⁵ «A ija a-wa-dəx, saɣlayəx-kāwān tangalen, sinfaqqeɣ-awān hārātān, māšan, imal-dd əlwāqq d-əbas hawān-e-taməjradəx s-tangalen, ašāl-en, ad-hawān-əjəx isəlan n-Abba s-əmmək əssiifhämān.

²⁶ Ašāl-wen, wər mad-təmɣutārām s-ad-hawān-ədələx Abba, ad-t-tədələm kāwāneɗ iman-nāwān s-isəm-in

²⁷ fäl-a-s, Abba iman-net irh'-iwān ed tərham-ahi, tomanām dəx a-s Mässināx a dd-faləx.

²⁸ Ənta a hi-dd-əšmašälān s-əddunya ɣas, əməra, faləx-tāt, əqqaləx-t ənta-i n-Abba.»

Ikrəš Ƴisa ašäl fäll-əddunya

²⁹ Ənnān-as inəttulab-net: «Nəkkāneɗ iket nəjrāh a-wa hanəx-janned ed, əbas hanəx-saɣlayəd tangalen, a-wa hanəx-janned əməra iket-net, il' ujh.

³⁰ Nəssan əməra a-s wər t-illa a-s wədden təssanəd-t, wər təmɣatārəd s-ad-käy-isəstən əwadəm d-hārāt wäl' iyyān. Dəx-təssəba n-a-wen-dəx a fäl noman a-s käyy Mässināx a dd-faləd.»

³¹ Inn'-asən Ƴisa: «Ak tənnām tomanām sār-i wədden?

³² Ikna māšan, əssiilmädəx-kāwān a-s imal-dd əssaɣāt, əssaɣāt dəx s-išwar dd-osa, ad-tämmähəšäm, ilal hak iyyān dəx-wān tenere n-iman-net, təyyəm-ahi nəkk ɣas māšan, kudhi-fälām-dəx, wər mad-əqqayməx nəkk ɣas ed, idhal-ahi Abba.

³³ Əkkəsəx-kāwān dəx-tayɗärt n-hārātān-wi-dəx i-ad-sār-i tamənām, təjrwäm əlxe.

Ɛlmədät a-s ad-tənhəyäm aḡāna dāḡ-äddunya-ta-dāḡ māšan, wär kǎwän-isärməḡet härät, əkräšāḡ ašäl fäll-äddunya.»

17

Tittar ti n-tinahäyen ija Ƴisa

¹ Ija Ƴisa isälan-win-dāḡ ḡas, äjozäy išənnawän, innä: «Abba, täqqän ta hi-təkfed, täwwäḡ-dd, sətbət təmḡäre n-älxurmät n-Rure-k i-ad-isətbət ənta-dāḡ wa-näk

² fäl-a-s Rure-k, ənta a təkfed tärna fäll-e d t-illäm ägg-adəm i-ad-umas əssəbab wa ihäkkän tämudre ta täḡlälät i-äddinät wi t-təssäḡlāfäd.

³ Tä mudre-en, a tät-ämoosän: ad-käy-əzzəyän, käyy-i n-Mässināḡ wa n-tidət, əzzəyän Rure-k Ƴisa Almaseḡ wa dd-täšmašäläd.

⁴ Ɛssəlmädäḡ s-älxurmät-näk fäll-ärori n-äkall, ässawäḡḡ-in daḡ ämašal wa hi-təssäḡlāfäd,

⁵ ämära Abba, iqqəlet-ahi-dd älxurmät wa ḡur-k ley härwa wär dd-täxlek äddunya.

⁶ Dāḡ-a-wa əkkäsäḡ heḡ äddunya-ta-dāḡ, äsbayänāḡ-käy i-äddinät wi hi-dd-tohäḡäd dāḡ-s, təssäḡlāfäd-ahi-tän; käyy a tän-ilän māšan, təkfed-ahi-tän daḡ ḡas, əlkämän i-mäjräd-näk, əṯṯäfän-t.

⁷ Ašäl-i, əlmädän a-s a-wa hi-təkfed iket-net, käyy a dd-ifal

⁸ fäl-a-s, a-wa hi-tənned iket-net, ənneḡ-asän-t, äqbalän-t, əlmädän daḡ a-s tidət a-s käyy a dd-fäläḡ, əfläsän a-s käyy a hi-dd-äšmašälän.

⁹ Təddaläḡ-käy hasän, wär käy-təddiläḡ i-äddunya ta wärät sär-k tomen, təddaläḡ-käy

i-äddinät wi hi-täsnäfränäd fäl-a-s, äddinät-win-däy a-s wi-näk.

¹⁰ A-wa leḡ iket-net, i-näk, a-wa led daḡ iket-net, i-nin; ɔntäneḍ-en-däy daḡ sär-k omännen a däy-dd-änfaläl älxurmät-in.

¹¹ Šämad näkk ämära, ɔzjaräy äddunya-ta-däy i-ad-käy-in-äkkäḡ, äqqaymən däy-s ɔntäneḍ, ɔttaräy däy-k Abba Šäddijän, ad-tän-tagəzäd s-tärna n-isəm-näk wa hi-təkfed näkk-i n-Rure-k, i-ad-osayän s-əmmək wa s-nosay näkk d-käyy.

¹² Äzzäman wa əkkäsäy jere-sän, ogažäy-tän s-tärna n-isəm-näk, ogažäy-tän daḡ iket-däy-näsän, jeḡ ɔnniyät, wär tän-iha fäw-i hi-änimäšräyän a-s təkkäsäd wa n-ägg-əlhəllak i-ad-itbət a-wa däy-äloläy əlkəttab.

¹³ Ämära, näkk-da-däy s-išwar käy-in-äqqaläy, tajjäy-asän mäjräd-wa-däy, däy-äddunya-ta-däy, i-ad-äddäwen s-tedäwit n-tänoflayt ta s-näkk ḡas a tät-ihakkän.

¹⁴ Ɔssäxläfäy-tän mäjräd-näk mäšan, täššunjät-tän äddunya ed, wär tän-təla s-əmmək wa s-wär hi-təla näkk-i s-omänän.

¹⁵ Abba, wär däy-k təttäräy ad-tän-təkkəsäd däy-äddunya-ta-däy, änn-ak, tattäräy däy-k, ad-tän-tagəzäd däy-a-wa läbasän.

¹⁶ Wär tän-təla äddunya-ta-däy s-əmmək wa s-wär hi-təla näkk-däy-i s-omänän.

¹⁷ Šəšdəj-tän s-mäjräd-näk ed mäjräd-näk a-s tidət ta n-tidət.

¹⁸ Äšimašäläy-tän s-äddunya s-əmmək wa s-hi-dd-täšmašäläd sär-s,

¹⁹ näkk, hakkäy-käy iman-in däy-təssəba-

näsän i-ad-käy-əkfən iman-näsän ɛntäneḍ-däx, šəšdøj-tän s-tidət-näk.

²⁰ Wädden ɛntäneḍ-i-däx ɣas a fäl käy-təddaläx, təddaläx-käy daɣ i-äddinät iket-däx-näsän wi s-ilkam ad-sär-k amənän däx-təssəba n-tajuhe-ta mad-əjən fäll-i,

²¹ umasnet iket-däx-näsän iyyät taɣəssa s-əmmək wa s-nämoos näkk d-käyy iyyän, heɣ-käy, hed-ahi, umasnet ɛntäneḍ-däx iyyän dār-näx i-ad-təfləs äddunya a-s käyy a hi-dd-Äšmašälän.

²² Näkk daɣ, älxurmät wa hi-təkfed, əkfeɣ-asän-t i-ad-osaɣän, ämoosän iyyän s-əmmək wa s-nosaɣ, nämoos näkk d-käyy, iyyän.

²³ Tartit-ta dār-k jeɣ a dār-sän jeɣ näkk-däx i-ad-tumas tartit-näsän ti təmdat, təlməd daɣ äddunya a-s käyy a hi-dd-äšmašälän, təlməd daɣ a-s jed-asän tārha šund ta hi-jed.

²⁴ Ettaräx däx-k Abba a-s edägg wa hi-təkfed, ähräɣet-t ɣur-k daɣ d-äddinät-wi hi-təkfed i-ad-əjjunfun ɛntäneḍ-däx, däx-älxurmät wa hi-təkfed ed, käyy tārha-ta hi-jed, jed-ahi-tät härwa wär dd-täxlek äddunya.

²⁵ Abba, käyy-i oɣädän, tunjäy äddunya-ta-däx s-ad-käy-təzzəy mäšan näkk, əzzäyäx-käy, äddinät daɣ wi sār-i omänner, əflasän a-s käyy a hi-dd-äšmašälän;

²⁶ äzozäyäx-tän isəm-näk, ad-käy-aləsäx daɣ azuzi-hasän i-ad-təjjəš tārha-ta hi-jed ulhawän-näsän, äknäx tartit dār-sän.»

Atärməs n-Ŷisa

(*Mätti 26:47-56; Marqəs 14:43-50; Luqa 22:47-53*)

¹ Issəmnda Ŷisa d-tittar-tin-däx ɣas, iglä ənta d-inəttulab-net, əjläyän tasənjit ta s-itawänna ta n-Şadron, əjjäšan ammas n-aşəkrəş n-ihəşkan ihan asälim n-aman,

² a-wen edägg s-issan Yähudəs-i t-madän-isəssäxdär a-s itakk'-e-hi-dd Ŷisa d-inəttulab-net.

³ Iha Ŷisa ammas n-aşəkrəş-en-däx a-s Yähudəs-da-däx äddew d-əssärdusa d-älgomitän n-ehän n-ämudd wa mäqqärän dd-ässiglän imänokalän n-käl-tikutawen d-käl-faris äwwayän tiftəl d-imämmälän, əşlajän tikobawen.

⁴ Issan Ŷisa ɣur-iman-net a-wa has-iqqälän, izjār-dd sār-sän, inn'-asän: «Mi s-tammäxäm?»

⁵ Ənnän-as: «Ŷisa wa n-Nəşirät.» Inn'-asän Ŷisa: «Näkk da.» Äddinät-en, ih'-en Yähudəs-i t-e-isəssäxdärän.

⁶ Diha-däx d-hasän-innä: «Näkk da», issəkn'-en iman-net, ad-äşkätarəşän, təwät-tän tarəmmeyt s-äkall älwäqq-wen-däx.

⁷ Oläs-tän asəstan, inn'-asän: «Ak kəwəned, mi s-tammäxäm?» Ənnän-as daɣ: «Ŷisa wa-n Nəşirät.»

⁸ Inn'-asän: «Wädden ənney-awän: <Näkk da.> Kunta tidət-däx a-s näkk a-s təmmaxäm adiş, äyyät inəttulab-in ad-əglun.»

⁹ Ijä Ŷisa məjräd-wen-däx i-ad-umas a-äsidätten a-wa s-käla tän-innä a-s innä: «Abba, wi hi-təkfed, wär däx-sän änməşräy wäl' iyyän.»

10 Ilbäy-dd älwäqq-wen-däx Simyon wa s-itawänna Bəṭrus təkoba-net, iwät sār-s Malkus wa n-akli n-ämānokāl n-kāl-tikutawen, inkäḍ-dd taməzzujt-net ta n-aḡil.

11 Iḡtäl Ƴisa Bəṭrus, inn'-as: «Suḡəl təkobanäk titar; wär t-illa əmmək s-unjäyāḡ s-tesäse n-kara n-tisnant wa hi-izzäl Abba ässaḡät-wadäḡ.»

(Mätti 26:57-58; Marqəs 14:53-54; Luqa 22:54)

12 Irmäs kumānda d-əssärdusa-neṭ d-älgomitän-wi dd-äšmašälän imānokälän n-käl-Älyähud Ƴisa, əkrädän-t,

13 əlwäyän-t s-tizarät s-ehän n-Xäna wa n-aḍəggal n-Qayäf-i n-ämānokāl n-kāl-tikutawen awätay-wen-däḡ.

14 Qayäf-en-däḡ a-s kälä innä i-imānokälän n-käl-Älyähud däḡ-isälan n-Ƴisa: «Ufa ämmut ähaləs iyyän uhən təlhäs tamətte iket-net.»

Akuddəl wa ija Bəṭrus i-Ƴisa

(Mätti 26:69-70; Marqəs 14:66-68; Luqa 22:55-57)

15 A-s itäjǰ a-wen-däḡ, äddeew Simyon Bəṭrus d-änätṭalib iyyän, əjan alkum šəjren i-Ƴisa. Änätṭalib-en dār-äddeew Simyon, izzay-t ämānokāl n-kāl-tikutawen, ijrāw-as a-wen-däḡ ad-imzəyyət d-Ƴisa uješ n-äḡalla n-ehän n-ämānokāl n-kāl-tikutawen

16 mäšan, äqqima-hin Bəṭrus ənta ibdad däḡ-təfärre dat-əmm n-äḡalla. Ähoja änätṭalib wa izzäy ämānokāl n-kāl-tikutawen ḡas, izjār-dd, imməjräd i-taməḍt ta tətṭäfät əmm n-äḡalla, toyy'-e, äššojäš-dd Bəṭrus.

17 Təkyäd tənaxdimt ta tət̄t̄äfät emm n-äḡalla dāḡ-Bəṭrus, tənn'-as: «Ajän käyy wädden iyyän dāḡ-inəṭṭulab n-āhaləs-wa-dāḡ s-iket ittärmäs?» Inn'-as Bəṭrus: «Wär t-āmoosāḡ.»

18 Itajj a-wen s-āzzāman n-tajrəst, ässiiryän inaxdimän n-āmānokāl n-käl-tikutawen d-ālgomitän wi äḡläfnen ehän n-āmudd wa mäqqārän efew, əzzahän sār-s, ibdād-dd Bəṭrus edes-hasän, ad-itazzäh ənta-dāḡ.

*Tebädde n-Ḳisa dat-äššäreḡa wa mäqqārän
(Mätti 26:59-66; Marqəs 14:55-64; Luqa 22:66-71)*

19 Issəstän ämānokāl n-käl-tikutawen Ḳisa, ittär dāḡ-s ad-has-āj isālan n-inəṭṭulab-net d-a-wa tən-isäḡra.

20 Äwwežāb-as Ḳisa, inn'-as: «Näkk, wär kälā ənnəḡ hārät fāw i-āddinät dāḡ-ufār, əssäḡrāḡ dāḡ-ihānan n-āddin wi n-käl-Älyähud d-ehän n-āmudd wa mäqqārän-i dāḡ-tazāmmaḡän käl-Älyähud, wär t-illa a ässiḡrāḡ dāḡ-ufār ḡas,

21 mafäl hi-sastanäd? Səstən äddinät-wi əslänen i-a-wa əssäḡrāḡ, əssanän a-wa hasän-ənnəḡ.»

22 Diha-dāḡ d-innä Ḳisa a-wen-dāḡ ad-has-istāḡ iyyän dāḡ-ālgomitän n-ehän n-āmudd wa mäqqārän, inn'-as: «Käyy, ma käy-āsihälän a təjəd erk mäjräd i-amānokāl n-käl-tikutawen?»

23 Inn'-as Ḳisa: «Kunta jeḡ erk mäjräd, sākənät-ahi a-wa dāḡ-änmäšrāyāḡ, kunta daḡ mäjräd oḡadän a jeḡ adiš, mafäl tamätteḡ?»

24 Issəgdäh Xäna dăḡ-isəstanän n-Ÿisa ḡas, ikräd-t, ässawäy-t i-Qayäf-i n-ämänokal n-käl-tikutawen.

25 A-s itäj a-wen-dăḡ, äqqiima Simyon Bəṭrus härwa s-efew, itazzäh. A əndärrän, äkrättät-t äwadəm iyyän, inn'-as: «Wädden käyy-dăḡ iyyän dăḡ-inəṭṭulab-net?» Äkkuddäl Bəṭrus a-wen, innä: «Wär t-ämoosăḡ.»

26 Iggäd-dd iyyän dăḡ-inaxdimän n-ämänokal n-käl-tikutawen, ämoosän ašäqqaqḡ n-ähaləs wa s-dd-ifräs Bəṭrus taməzzujt-net s-täkoba, innä i-Bəṭrus: «Käyy-i-dăḡ, ənhayăḡ-käy täddewäd d-Ÿisa dăḡ-ašəkrəš n-ihəskan wa-dăḡ ittärmäs?»

27 Oläs daḡ Bəṭrus akuddəl n-a-wen. Tamäzäyyat-ten-dăḡ, ad-iwät ekäz äḡora.

Ämewäy Ÿisa s-Bilatəs

(Mätti 27:1-2, 11-14; Marqəs 15:1-5; Luqa 23:1-5)

28 Härwa tifawt ad-fälän d-Ÿisa ehän wa n-Qayäf, əkkän dār-s ehän wa n-gəfär mäšan, unjäyän s-ad-əjjəšän ammas-net fäl tuksəda n-ad-səmmədəsän iman-näsän, igdəl-asän a-wen-dăḡ tetäte n-isän n-taḡsiwen-ti länen s-ad-äḡrəsnät ašäl wa n-ämudd wa n-Faška.

29 Əbdadän dăḡ-ajäma n-ehän-en-dăḡ a-s sār-sän dd-izjār Bilatəs, inn'-asän: «Ma ämoos uḡlem wa täsiwāräm ähaləs wa təlwäyäm?»

30 Ənnän-as: «Ənnär a-s ija a läbasän, wär t-dd-nələwwəy sār-k.»

31 Inn'-asän Bilatəs: «Äglät, əšräḡät-t s-a-wa innä älqanun-näwän.» Ənnän-as imänokalän n-käl-Älyähud: «Näkkäneḡ, dăḡ-a-wa innä

älqanun-nänäx, wär hanäx-t-illa ad-näj iman n-äwadem.»

³² Wär hasän-ijrew älqanun-näsän tenäxe n-äwadem i-ad-tëdduttët tønna n-ÿisa fäl tamättant ta mad-äj.

³³ Oläs Bilatës ujöš n-ehän-net, iyrä-dd ÿisa tëzzar, inn'-as: «Ak, käyy a-s ämänokal n-käl-Älyähud meyx?»

³⁴ Inn'-as ÿisa: «Ak tifer-ti-däx jed ämära-däx, ad-dd-tëkkasäd däx-eḡäf-näk meyx mäsellät a tänät-jed?»

³⁵ Inn'-as Bilatës: «Näkk-š ma äkkuläx, ajän ägg-Älyähud a ämoosäx, täjjäšan-ahi isälan-näk? Tumast-näk d-imänokalän n-käl-tikutawen a käy-dd-äwwäyner sär-i, ḡas, läḡät-ahi, ma täḡsädäd?»

³⁶ Inn'-as ÿisa: «Tëmmənəya-nin, wär tät-təla äddunya-ta-däx, ənnär tät-təla äddunya-ta-däx, iket-di, əknəsän inəṭṭulab-in i-ad-wär hi-jen imänokalän n-käl-Älyähud däx-ifassän-näk, ämära, Tëmmənəya-nin, wär tät-təla äddunya-ta-däx.»

³⁷ Inn'-as Bilatës älwäqq-wen: «Adiš tidət-däx a-s ämänokal a tämoosäd?» Inn'-as ÿisa: «Käyy iman-näk tənnet-tän, ämänokal a ämoosäx. Näkk, ämešäläx-dd s-äddunya-ta-däx, weḡ-dd däx-s i-ad-umasäx tajuhe i-tidət, ere wa ilkämän i-tidət iket-net, ad-isəjəd i-a-wa jänneḡ.»

³⁸ Innä ÿisa a-wen ḡas, inn'-as Bilatës: «Tidət-i-däx fäw, əndek-tät?» Innä Bilatës a-wen ḡas, izjār-dd daḡ s-imänokalän n-käl-Älyähud, inn'-asän: «Ähaləs wa hi-dd-täwwäyäm, wär

fälla-s əjrewäx uđlem t-äsinähäjjän d-tamättant mășan,

³⁹ šămad ässilmädäx-kăwăn a-s hak ämudd n-Faşka, äsiwäyyäx-awăn-in u-takärmüt iyyän, əssənät ten'-i-däx tärham ad-hawăn-in-səwwəyyäx ämänokal n-käl-Älyähud meḡ?»

(*Mätti 27:15-31; Marqəs 15:6-20; Luqa 23:13-25*)

⁴⁰ Eslän i-a-wen ɣas, äşğären däx-işənnawăn, ənnän-as: «Făw, wăr hanäx-t-dd-toyyed, ännak, səwwəyy-anäx-dd Bärğăbbas.» Bärğăbbas-i s-ărhan a hasän-t-dd-isəwwəyy, ätiwässan a-s änaɣtaf a ämoos.

19

Irda Bilatəs s-atwəşləb n-Ŷisa

(*Mätti 27:15-31; Marqəs 15:6-20; Luqa 23:13-25*)

¹ Irmäs Bilatəs Ŷisa, omär əssărdusa i-ad-däx-s əjən tiwit s-ibärtäkän.

² Eɣgädän-dd əssărdusa, əzzän älmät, kورونا, a-wen, takənbut n-isənnanän şund ta täjjän imänokalän təzzar, äswărän-tät eyăf-net, əssəlsän-t anākăbba šəggăğăxän

³ təzzar, ad-t-tiɣliɣələyän, jannen-as: «Ămänokal n-käl-Älyähud, nəj'-ak gărdəbu», sattăğăn-as siha d-siha.

⁴ Izjăr-dd Bilatəs daɣ s-käl-Älyähud, innä: «Eñhəywät, ähaləs-i-däx, äsoɣălăx-awăn-t-in i-ad-kăwăn-səlmədäx a-s wăr t-illa uđlem fälla-s əjrawäx t-äsinähäjjän d-tamättant.»

5 Izjār-dd Ƴisa sār-sān ɗarāt-a-wen, ija takənbut ta n-isənnanān, ilsa anākābba wa šāggāḡān, inn'-asān Bilatəs əlwāqq-wen «Āhaləs-nāwān dədi.»

6 Ĕnhāyān imānokālān n-kāl-tikutawen d-ālgomitān Ƴisa ikk'-en-dd ḡas, əşḡären iket-nāsān, ənnān i-Bilatəs: «Itwəşləbet fäll-tajəttewt, Itwəşləbet fäll-tajəttewt!» Inn'-asān Bilatəs əməra: «Ārməsāt-t, təşləbām-t fäll-tajəttewt kāwāned iman-nāwān fāl-a-s nākk, wār t-illa uɗlem fälla-s əjrawāḡ t-əsināhājjan d-taməttant.»

7 Ĕnnān-as imānokālān n-kāl-Ālyāhud: «Nākkāned, ijraw-anāḡ Ātṭāwrāt iji n-iman-net ed, ija iman-net Rure-s n-Məssināḡ.»

8 Isla Bilatəs i-məjrād-wen-dāḡ ḡas, irmāḡ,

9 ijjäš ehān-net təzzar, innā i-Ƴisa: «Kāyy-i-dāḡ fāw, əndek siha s-dd-hed?» Wār t-illa a has-inna Ƴisa. Inn'-as Bilatəs:

10 «Mafāl wār hi-jənnid hārāt? Ajān wār təssenād a-s nākk leḡ tādabit n-ad-kāy-in-əyyāḡ, leḡ dāḡ tādabit n-ad-kāy-əşləbāḡ fäll-tajəttewt?»

11 Inn'-as Ƴisa: «Wār fäll-i mad-təkrəşād tərna wāl' iyyāt sāl ta kāy-ikfa Məssināḡ dāḡ-əssaḡāt-wa-dāḡ, a-wen-dāḡ a fāl ere wa hi-ijān jer-ifassān-nāk, ojar-kāy tifut n-abākkaɗ.»

12 Ad-itammāḡ ya Bilatəs i-əddābara s-t-in-əşwāyya məşān, əşḡären kāl-Ālyāhud dāḡ-işənnawān, ənnān-as: «Afāl t-in-toyyed, ad-nəlməd a-s kāyy wādden amidi n-Qāyşār a təmoosād fāl-a-s, nəssan a-s ere ijan iman-net əmənokāl iket-net, ad-umas ašanjo n-Qāyşār.»

13 Islā Bilatəs i-a-wen ḡas, izzəzjār-dd Ƴisa

təzzar, äqqima dāḡ-edägg wa dāḡ-iḡattäs äššäreḡa s-itawänna dāḡ-Ŷābranəyya: Ŷābbata.

¹⁴ Itajj a-wen s-tarähut n-ašäl wa n-dat-wa n-ämudd wa n-Faška. Innä Bilatəs i-imänokalän n-käl-Älyähud: «Uhənät, ämänokal-näwän dədi.»

¹⁵ Mäšan, äskälälän iket-näsän, ənnän-as: «Ämmätet, ämmätet, itwəşləbet fäll-tajəttewt.» Inn'-asän Bilatəs: «Ŷas käwäned, äba-hawän ere təşläbäm ar ämänokal-näwän?» Ənnän-as imänokalän n-käl-tikutawen: «Näkkäned, wär nəla ämänokal säl Qäyşär.»

Atwəşləb n-Ŷisa

(Mätti 27:32-44; Marqəs 15:21-32; Luqa 23:26-43)

¹⁶ Ijä Bilatəs Ŷisa jer-ifassän-näsän i-ad-itwəşləb fäll-tajəttewt. Ärmäsän əssärdusa Ŷisa, əlwäyän-t təzzar,

¹⁷ äslänjen-t tajəttewt ta fäll-mad-itwəşləb, əzjārän dār-s aḡrəm, əkkän dār-s edägg wa s-itawänna dāḡ-Ŷābranəyya: «Gälgota»; a-wen älmäḡna-net: «Edägg wa n-akärkor.»

¹⁸ Ašäl-en, ämizäyyen əssin inaytafän atwəşləb d-Ŷisa; iyyän daw-aḡil-net, wa iyyädän daw-täşalje-net, imäl-t ənta jere-sän.

¹⁹ Əşläbän Ŷisa ḡas, issəktäb Bilatəs fäll-ällox iyyän a-s:

«A-WA ŶISA WA N-NÄŞIRÄT

N-ÄMÄNOKAL N-KÄL-ÄLYÄHUD».

Əttəytäyän-t jənnəj-s fäll-tajəttewt ta fäll-ätwəşläb.

²⁰ Akätəb-en, äḡrən-t käl-Älyähud äjjootnen fäl-a-s, edägg wa dāḡ-ätwəşläb Ŷisa, ohaz

aḡrəm. Āllox-en, akātab wa t-iwarān, ija dāḡ kārād iməjridān: Ƴābranəyya, Tāromanit d-Tālyunanit.

²¹ Ƴggādān-dd imānokālān n-kāl-tikutawen d-kāl-Ālyāhud, āsmātārān Bilatəs d-udaḡ ad-iktəb a-s Ƴisa āmānokāl n-kāl-Ālyāhud ānn-ak, iktəbet a-s, innā: nākk, āmānokāl n-kāl-Ālyāhud māšan,

²² inn'-asān Bilatəs: «A-wa s-išwār əktābāḡ-t, əktābāḡ-t.»

²³ Ƴšlābān əssārdusa Ƴisa fäll-tajəttewt ḡas, əjān i-isəlsa-net əkkozāt tiḡunawen, iḡkāl hak iyyān dāḡ-sān tāḡune tiyyāt, wār dd-āqqima ar tanākābbat wār iha aḡāmay wāl' iyyān.

²⁴ Ārmāsān-tāt əssārdusa ḡas, ānmānnān jer-iman-nāsān: «Udaḡ ad-tāt-nəsāḡārriwət, nəjet fälla-s tisāḡeren i-ad-t-ikrəš iyyān dāḡ-nāḡ.» Ƴjān tisāḡeren, āmoos a-wen a əssiitbātān a-wa iktābān dāḡ-mājrād n-Māssināḡ a-s inna:

«Āḡunān isəlsa-nin,

jān tisāḡeren fäll-tanākābbat-in.»

Jān əssārdusa a-wen s-əmmək-wa-dāḡ s-tān-innā əlkəttab n-Māssināḡ.

²⁵ Edes i-tajəttewt ta fäll-ätwāšlāb Ƴisa, təbdad ma-s d-wälātma-s n-ma-s d-Māryāma ta n-hānne-s n-Klufas d-Māryāma ta s-itawānna ta n-Mulāḡdaləyāt.

²⁶ Inhāy Ƴisa ma-s təbdad edes i-ānāḡḡalib wa ikna tārha ḡas, inn'-as: «Anna, rure-m dədi ibdādān edes-ham.»

²⁷ Innā daḡ i-ānāḡḡalib: «Kāyy daḡ, ma-k dədi təbdādāt edes-hak, taḡəlīft-nāk.» Ƴur-ašāl-wen-

däḡ, ij'-et-dd änätṭalib-en s-iman-net, iṭṭäf-as tämudre.

Tamättant n-Ḡisa

(Mätti 27:45-56; Marqəs 15:33-41; Luqa 23:44-49)

²⁸ Ilmäd Ḡisa a-s əssəbab wa fäl dd-əmešäl s-əddunya, əssawäq-t-in iket-net, fäll-tajəttewt-en-däḡ, innä: «Äffuudäḡ.» Ämoos a-wen a əssiitbätän a-wa innä əlkəttab n-Mässinäḡ fällas.

²⁹ Iskar dihen äkoss idkarän bənegär, innä Ḡisa äffuud ḡas, əttälän əssärdusa täduft fäll-äbori, əssəlmäḡän-tät däḡ-bənegär təzzar, əzzälän-as-tät i-ad-tät-isuməm mäšan,

³⁰ äkrəbbät Ḡisa bənegär ḡas, inna: «A-wa s-dd-oseḡ, ijä, imdä». Äskäräyräy-dd eḡäf-net qarät-a-wen, ijmäd-t unfas.

(Mätti 27:57-61; Marqəs 15:42-47; Luqa 23:50-56)

³¹ Itajj a-wen ašäl wa n-dat-wa n-Faşka-i-däḡ sadawän äddinät i-ämudd. Šämad wär-ərhen imänokalän n-käl-Älyähud ad-tän-dd-iḡdär ämudd wa n-Faşka-i əknän asəmyar ed awätay-wen, oḡa ašäl wa n-ämudd fäll-əssəbət-i n-täsonfat, ḡas, osän Bilatəs, əttärän däḡ-s ad-amär i-əssärdusa teräzzə n-iḡarän n-äddinät-wi ätwäšläbnen fäll-tijəttewen təzzar, əkkəsän-tändd fälla-snät.

³² Osän-dd əssärdusa ḡas, äržän iḡarän n-änaxtaf wa äzzarän, okäyän daḡ s-amidi-net wa iyyäḡän, jän-as a-wen-däḡ ənta-däḡ.

³³ Əwwäḡän-dd Ḡisa, ənhäyän-t ämmut ḡas, okäyän-t wär-äržen iḡarän-net

³⁴ māšan, inbäj iyyän dāḡ-əssārdusa tajəzzelt n-Ŷisa s-allaḡ-net, izjār-tāt-dd ašni s-əlkamān aman.

³⁵ Nākk a iktābān isālan-wi-dāḡ ed, äjjəyhāḡ-asān iket-dāḡ-nāsān, tajuhe-nin daḡ, wār tāt-ih' äššāk. Ƴas, siḡulāḡ-tān nākk-i tān-inhäyān s-tiṭṭawen-in dāḡ-təssəba n-ad-tamənām s-Ŷisa.

³⁶ Isālan-wi-dāḡ, jān i-ad-itbət a-wa iktābān dāḡ-mājrād n-Mässināḡ a-s innā:

«Wār mad-ārḡ eḡās-net wāl' iyyän.»

³⁷ Innā daḡ mājrād n-Mässināḡ dāḡ-edägg iyyän sāl-wen:

«Ad-əjjənfun äddināt dāḡ-wa dājän.»

Azəkka n-Ŷisa

³⁸ Osā-dd Yusəf wa n-tadābayt ta n-Arimata. Āmoos ənta iman-net, änätṭalib n-Ŷisa, māšan, iffar a-wen fāl tuksəda n-a-wa dāḡ-s-e-ənnən imānokalān n-kāl-Ālyāhud. Ēnta-en-dāḡ a ihālān tikawt n-Bilatəs, ittār dāḡ-s turhajāt n-ad-dd-ikkəs tafəkka n-Ŷisa fäll-tajəttewt; ikf'e Bilatəs turhajāt n-a-wen Ƴas, ikkäs-dd tafəkka n-Ŷisa fäll-tajəttewt.

³⁹ Osā-dd daḡ dihen Nikodem wa s-kāla dd-ädwännāt i-Ŷisa s-ehäd, iwway a okāyān kāraḡāt timərwen n-kelu n-matälxer d-aḡutān.

⁴⁰ Ārmāsān tafəkka n-Ŷisa, əknān-tāt s-matälxer d-aḡutān təzzar, əttälān-tāt dāḡ-tefit, ed a-wen-dāḡ a tajjān kāl-Ālyāhud i-ere äba təzzar, əjān-t dāḡ-azəkka.

⁴¹ Edägg wa dāḡ-ätwäšlāb Ŷisa, ohaḡ-t ašəkrəš n-ihəškan, iha azəkka s-kāla wār dāḡ-s insa ere äba.

⁴² Azəkka-wen-däx a däx-jän tafəkka n-ÿisa ed, wär tän-ujəj, äsinäkmäm-tän daḡ ämudd-i s-afäl dd-iwwäḍ ässaḡät-net, ad-äbas t-illa emäremar.

20

Tanäkra n-ÿisa jer-inəmmuttan

(Mätti 28:1-10; Marqəs 16:1-8; Luqa 24:1-12)

¹ Abənnəbən n-älxad-i n-ašäl äzzarän däḡ-əssəboḡ, härwa janät tihay, tənšäy Märyäma ta n-Muläždaləyät azəkka wa iha ÿisa, tənḡay a-s tähünt ta mäqqärät härät emm n-azəkka, tämmuqqäs-in.

² Tošäl s-Simyon Bəṭrus d-änätṭalib wa iyyäḍän ikna ÿisa tärha, tənn'-asän: «Tafəkka n-Älḡalim-nänäḡ, təmmäḍkäl, äbas ha azəkka, wär nəssen ənde d-tät-jän ämära.»

³ Iḡla Bəṭrus d-änätṭalib wa iyyäḍän, əkkän azəkka.

⁴ Ošälän issənän-essän mäšan, ijmäḍ änätṭalib wa iyyäḍän Bəṭrus däḡ-azzal, išwār-t-in s-azəkka,

⁵ äddunkät, ässijjä däḡ-amməs-net, inhäy tefit tənsa d-iman-net mäšan, wär-ijješ ammas n-azəkka.

⁶ Iwwäḍ-t-dd Simyon Bəṭrus ḡas, ijjäš ənta azəkka, inhäy tefit ta tənsät d-iman-net,

⁷ oläs daḡ ahänay n-taswəḍt ta s-käla təttäl eḡäf n-ÿisa, tənsa d-iman-net s-edes, toḍha.

⁸ Ijjäš-dd fälla-s ḍarät-a-wen änätṭalib wa iyyäḍän t-dd-išwārän s-azəkka, inhäy, omän;

⁹ fäl-a-s, a-wa-däx jän ärtayän d-ÿisa iket-net, wär-əfhemän a-wa ənnän əlkəttabän däx-isälan-net, a-s ənnän a-s, ilzam ad-t-iba təzzar, inkär-dd jer-inəmmuttan.

¹⁰ Ʒqqälän ɗarät-a-wen ihänan-näsän.

Issəkna Ʒisa iman-net i-Märyäma ta n-Muläzɗaləyät

(Marqəs 16:9-11)

¹¹ Täqqimä-dd ɗara-sän Märyäma, təbdad edes i-azəkka, hall. Halla dihen-däx har šik-däx tässijjä däx-ammās n-azəkka,

¹² tənħäy əssin änjälosän ässiimlälnen, äqqimän däx-edägg wa s-käla däx-s tənša tafəkka n-ÿisa. Äqqiima iyyän däx-edägg wa s-käla däx-s insa eɗäf n-ÿisa, äqqiima wa iyyädän däx-edägg wa s-käla däx-s ənsän iɗarän-net.

¹³ Ʒsəstänän änjälosän Märyäma, ənnän-as: «Märyäma, ma kām-isalhen?» Tənn'-asän: «Tafəkka n-Älyalim-in a təmmäɗkälät, wär-əssenäy ənde d-tät-jän ämära.»

¹⁴ Tənna a-wen ɗas, täšnəšläm, tənħäy Ʒisa ibdad məšan, indär-as ad-t-təzzəy.

¹⁵ Imməjräd-as, inn'-as: «Tamäɗt, ma kām-isalhen? Ma däx-m äba?» Ämmiijräd-as məšan, täxel Märyäma məssi-s n-ašəkrəš a has-ämmiijrädän, tənn'-as: «Ya ähaləs-i-däx, kunta käyy a iɗkälän tafəkka n-Emäli-nin, əttaräx däx-k idəm n-ad-hi-səknəd diha tät-jed i-ad-tät-əɗkələx.»

¹⁶ Iyr'-et Ʒisa s-isəm-net, inn'-as: «Märyäma!» Təggäd təzzar, tənnaɗ-dd sār-s, tənn'-as däx-

Ÿābranəyya: «Rabbuni»; a-wen älmäḡna-net: «Mässi-ḡ.»

¹⁷ Inn'-as Ÿisa älwäqq-wen: «Wär hi-ḡesäd, tawəḡəd-ahi fäl-a-s, wär-oseḡ iḡənnawän-i iha Abba-nin härwa. Ämära, əgləw, läḡät i-ayətma-ḡ a-s əkkeḡ Abba-nin-i s-ənta daḡ a-s Abba-näwän, əkkeḡ Mässi-ḡ-i n-Mässinäḡ-i s-ənta a-s Mässinäḡ-i n-Mässi-wän.»

¹⁸ Təkkä Märyäma ta n-Muläzḡaləyät inəṡṡulab, tənn'-asän: «Näkk, ənhayäḡ Emäli». Ad-däḡ-sän tadj isälan n-a-wa has-innä Ÿisa.

Issəkna Ÿisa iman-net i-inəṡṡulab-net

(Mätti 28:16-20; Marḡəs 16:14-18; Luḡa 24:36-49)

¹⁹ Ehäḡ n-ašäl-wənnin-däḡ n-älxad, äzžiimmäḡän inəṡṡulab däḡ-ehän iyyän, äṡṡubben imawän-net fäll-iman-näsän a-wa hasän-təja tuksəḡa n-imänokalän n-käl-Älyähud. Wär tän-hen isälan a-s ənta iman-net da-däḡ dd-ibdädän jere-sän, inn'-asän: «Ins' älxer n-Mässinäḡ fälla-wän.»

²⁰ Ij'-asän isofan, ad-tän-isakna ifassän-net d-tajəzzelt-net. Älwäqq-i-däḡ t-ənhäyän, əjän inəṡṡulab tedäwit-i-däḡ mäqqärät.

²¹ Inn'-asän Ÿisa: «Ins' älxer n-Mässinäḡ fälla-wän. Ämašal wa ijä Abba däḡ-ifassän-in, jəḡ-t näkk-däḡ ämära däḡ-ifassän-näwän.»

²² Darät-a-wen, äshäḡ Ÿisa jənnəj-iḡäfawän-näsän, inn'-asän: «Uhənät Unfas Šaddijän,

²³ ere wa s-tənšäm ibäkkadän-net, ad-ijrəw tenäšše-näsän, ere wa s-tän wär tənšem, wär mad-ijrəw tenäšše-näsän.»

Issəkna Ƴisa iman-net i-Tomi

²⁴ Ašäl wa d-jän isälan-wi-däx, wär t-illa iyyän däx-inəttulab wi n-märaw d-əssin s-isəm-net Tomi wa s-itawänna Ekne.

²⁵ Osä-dd xas, ənnän-as inəttulab wi iyyädnen: «İsräy-käy-dd Emäli Ƴisa.» Unjäy s-ad-tän-ifləs, inn'-asän: «Näkk xas, a əkkäsäx wär t-ənheyäx s-tiṭṭawen-in, ənhəyäx daḡ idraš n-ibuyəsän däx-ifassän-net, äjäx daḡ assəkäḍ-in däx-adäriš n-ibuyəsän, äjäx äfuss-in däx-tajəzzəlt-net ta inbäj allax, wär mad-əfləsäx a-s dd-inkar jer-inəmmuttan.»

²⁶ Ašäl wa n-əttam ḍarät-a-wen, äžziimmäxän inəttulab däx-ehän äṭṭubben, ih'-en ämära Tomi. Wäla hin-əjrähän a-s dd-ibdäd Ƴisa jeresän, inn'-asän: «Ins' älxer n-Mässinäx fällawän.»

²⁷ Innä Ƴisa i-Tomi ḍarät-a-wen: «Ahəz-ahidd, səjräh ifassän-in, hənda assəkäḍ-näk, äj'e däx-äfuss-in, təjəd-t daḡ däx-tajəzzəlt-in, wär täsxäräd ulh-näk.»

²⁸ Äwwežäb-as Tomi, inn'-as: «Emäli-nin, Mässi-x Mässinäx.»

²⁹ Inn'-as Ƴisa: «Käyy, tənhyäd-ahi təzzar tomänäd, tənḍəd i-äddinät wi hi-wären-ənhey mäšan, omänän.»

Äddälil-wa fäl iktäb Exya əlkəttab-wa-däx

³⁰ Ija Ƴisa dat-inəttulab-net ijitän n-Mässinäx äjjootnen wären əkteb däx-əlkəttab-wa-däx

³¹ mäšan, a-wa däx-sän iktäbän däx-əlkəttab-wa-däx iket-net, iktab däx-təssəba n-ad-tamənäm a-s Ƴisa a-s Älmasex wa n-Rure-s

n-Mässinäx, ere omänän s-isəm-net-däx, ad-ijrəw tāmudre ta täxlälät.

21

Oläs Yisa asəkən n-iman-net i-əssa däx-inəttulab-net

¹ Darät-a-wen-däx ijän, äsnäfaläl-dd Yisa day iman-net i-inəttulab-net däx-asälim n-ejänš wa s-itawänna Tibäryad. Ēnta da əmmək wa s-hasän-dd äsnäfaläl iman-net:

² Ašäl iyyän, äzžiimmäx Simyon Bəṭrus, Tomi wa n-ekne d-Natanähil wa n-taxrəmt ta n-Käna təhät teje ta n-Galila d-dägg-Zäbdi d-əssin inəttulab iyyäd däx,

³ äqqiimän har šik-däx, inn'-asän Simyon Bəṭrus: «Näkk, əkkex ejänš i-ad-əhhuyex imānan.» Ēnnän-as inəttulab wi iyyädnen: «Äqqəl-anäx, näddew dār-k.» Ēzjārän, əjjäšan turäft n-aman, əglän. Okäy-tän ehäd-wen-däx iket-net, wär t-illa a ärmasän.

⁴ Äffäw xas, iwär-dd Yisa asälim n-ejänš mäšan, indär-asän ad-t-əzzəyän.

⁵ Iyr'-en, inn'-asän: «Ilyadän, ajän wär lem a təkšäm?» Ēnnän-aş: «Äbo!»

⁶ Inn'-asän: «Äjrät ämära tätart-näwän s-aşrut wa n-axil n-turäft n-aman, ad-tärməsäm imānan.» Järän tätart-näsän s-aşrut-wen-däx tän-issəkna, əttärän ad-tät-dd-ärkəbän däx-aman mäšan, təndär-asän fäl aḍānay-i-däx təja imānan.

⁷ Inhäy änätṭalib wa ikna Yisa tārha a-wen xas, inna i-Bəṭrus: «Ijmaḍ-t äşşäk a-s a-wa

Emäli-nänäḡ.» Islä Simyon Bəṭrus a-s a-wa Emäli
 ʃisa ḡas, idkäl emäls-net wa ikkäs i-älxidmät,
 ij'-e dāḡ-err-net, ijär iman-net dāḡ-aman, iṣyäf,
 ikk' asälim.

⁸ Äḡyämnen-dd inəṭṭulab wi iyyäḏnen turäft,
 ähoben-dd tätart ta təḏkärät imānan ed, wär t-
 illa jere-sän d-asälim n-ejäns ar sänatät timaḏ n-
 aḡil.

⁹ Ewwäḏän asälim n-aman ḡas, ənhäyän efew
 irḡan fäll-nanḡän imānan d-tajəlla,

¹⁰ inn'-asän ʃisa: «Awəyät-dd a län imānan
 dāḡ-wi s-iket tän-dd-tärmäsäm.»

¹¹ Ijjäs Simyon Bəṭrus turäft ta n-aman,
 ähobät-dd tätart s-asälim n-aman, osän-tät, ih'-
 et a iwwäḏän temeḏe d-səmmosät timərwen n-
 emän d-käraḏ dāḡ-wi ṣuharnen mäšan, hagd a-
 wen-dāḡ, wär ser tätart.

¹² Eḡḡän imānan d-tajəlla ḡas, inn'-asän ʃisa:
 «Eyyäwät, mänsäwät.» Itajj a-wen-dāḡ iket-net
 mäšan, wär tän-iha-i ihälän asəstan-net d-ere wa
 ämoos ed, əssanän ämära a-s Emäli iman-net a-
 wa.

¹³ Idkäl ʃisa tajəlla, äzun-asän-tät, äzun daḡ
 imānan jere-sän.

¹⁴ Eнта-da-dāḡ anfiləl wa s-käraḏ dd-ija
 ʃisa i-inəṭṭulab-net ḏarät tanäkra-net jer-
 inəmmuttan.

Isəstanän wi ija ʃisa i-Bəṭrus

¹⁵ Eḡsän ḡas, innä ʃisa i-Simyon Bəṭrus:
 «Simyon ägg Yunəs, ak torded a-s tojär tärha ta
 hi-jed, ta hi-jän imidiwän-näk?» Inn'-as Simyon:
 «Emäli, təssanäd a-s ärheḡ təmmidəwa-näk.»

Inn'-as Үisa: «Adiš, äj i-inəttulab-in taḡälift ta itäj amädan i-ikərwatän-net.»

¹⁶ Ij'-as Үisa asəstan wa s-əssin, inn'-as: «Simyon ägg Yunəs, ak torded a-s tärhed-ahi?» Inn'-as Simyon: «Näkk lab, ärheḡ təmmidəwanäk.» Inn'-as Үisa: «Adiš, äj i-inəttulab-in tamädint ta itäj amädan i-tihatten-net.»

¹⁷ Ij'-as Үisa asəstan wa s-kəraḡ, inn'-as: «Simyon ägg Yunəs, ak tidət-däḡ a-s tärhed təmmidəwa-nin?» Inxäs a-wen-däḡ iman n-Bətrus d-a-s har kəraḡ ihändəggan isastan-t d-a-s irh'-e meḡ? Inn'-as Bətrus ämära: «Emäli, wär t-illa a-s wädden təssanäd-t, təssanäd a-s jeḡ-ak tärha təmdat.» Inn'-as Үisa: «Adiš, äj i-inəttulab-in taḡälift ta itäj amädan i-tihatten-net.»

¹⁸ Älleḡeḡ-ak s-tidət tädduuttet a-s däḡ-təmmiwəḡa-näk, salsed iman-näk, erhet-näk ḡas a käy-išilləwän mäšan, afäl wäššaräd, ere wär tämoosäd a käy-madän-isäls, tättärmäsäd, tättälwäyäd s-edägg wär tärhed.»

¹⁹ Inn'-as a-wen-däḡ i-ad-isəlməd Bətrus älxal n-tamättant ta has-täqqälät madät-tumas tajuhe ta s-mad-isəməḡär Mässinäḡ. Ij'-as Үisa mäjräd-wen-däḡ ḡas, inn'-as: «Elkəm-ahi.»

Änättalib wa ikna Үisa tärha

²⁰ Äšnəšläm Bətrus ḡara-s, inhäy änättalib wa irha Үisa, ilkam-asän. Änättalib-wen-däḡ a dd-insän fäll-idmarän n-Үisa ehäd wa dər-s ohärän amənsi, ənta-en-däḡ a issəstänän Үisa ehäd-wen a-s has-innä: «Äḡalim, əndek däḡ-näḡ wa käy-madän-isəssäḡdär?»

²¹ Inhäy-t Bəṭrus ilkam-asān ɣas, innä i-Ÿisa: «Emäli, wa hi-š änätṭalib, ma dāɣ-s ilkamän?»

²² Inn'-as Ÿisa: «Kud-ärheɣ ad-iddar har dd-äqqələɣ, ma täkkuuläd dāɣ-a-wen? Käyy, əlkəm-ahi ɣas.»

²³ Mäjräd-wen-dāɣ ija Ÿisa i-Bəṭrus a dd-orāwän a-wa s-jannen inalkimän n-Ÿisa, änätṭalib-en-dāɣ, wär dāɣ-s təkem tamättant mäšan, wär has-inna Ÿisa wär mad-ämmät, ännak a inna i-Bəṭrus: «Ajän kud-ärheɣ ad-iddar har dd-äqqələɣ, ma täkkuuläd dāɣ-a-wen?»

Ajilal n-mäjräd

²⁴ Änätṭalib-wen-dāɣ fäll-ija Ÿisa tajuhe-ten-dāɣ, a äjjəyhän i-isālan-wi-dāɣ, iktäb-tän, nəssan dəɣ a-s tajuhe-net, tädduuttät.

²⁵ Əllan-t härätän äjjootnen ija Ÿisa wären əkteb diha-dāɣ. A-wa ija, ija əjut wa-dāɣ s-ənnär ittär əwadəm akätab-net s-iyyän-iyyän, wär-ordeɣ a-s täddobät təkost n-äkall-i-dāɣ aggay n-əlkəttabän-win-dāɣ he-siwəlneɣ dāɣ-isālan-net. Amin!

Ălənžil n-Ÿisa Ălmasex: Kitab Ălmuqăddăs
Tamasheq: New Testament

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

b95f369b-a236-5ca8-8cab-11f74279d73c